

Ya'ipi ma'sha caniaritërinso'

Yosë nani ma'sha acorinso'

¹ Yosë nani ma'sha acorinso sha'huichinquëma': Iráca co manta ya'huérinhue'. Yoséíchin ya'huérin. Caniaritapon, pi'iro'të'ton acorin. Ina quéran isoro'panta', acorin. ² Naporo' isoro'paso', co ipora pochin nishátërarinhue'. Ya'ipi marësáchin ninin, pa'pi anpotérin. Tashiri noyá i'copitérin. Naporo chachin Yosë ispiritonenso', i' aipi yanpo yanpónantarín.

³ Naporo' Yosë tapon: “¡Tashinantërinso nii'sohuanchin huachi!” ténin. Topachina, nii'sohuantërin huachi.

⁴ Nii'sohuantërinso nöya nicaton, nisha acorin. Tashinta', nisha acorin.

⁵ Nii'sohuantërinsoso': “Tahuëri,” itërin. Tashinaonta': “Tashi'” itërin. Tashirahuatón tahuëriantahuachina, i'huaraya huarë' a'na tahuërica', nanirin huachi.

⁶ Ina quéran Yosë taantarín: “¡Niquë niquë i' ya'huëcaso marë' ya'copinamën ya'huë'in!” ténin. Topachina, inachachin ya'huérin huachi.

⁷ Yoséri i' ya'copinamën nipachina, ina aipi i' ya'huérin. Inaanaquënta', i' ya'huérin.

⁸ Nani acohuachina, inápaqué ya'huërinsoso': “Pi'iro'të'” itërin. Tashiantarahuatón tahuëriantahuachina, i'huaraya huarë' cato tahuëri nanirin huachi.

⁹ Ina quëran Yosë taantarin: “¡Yaniro'pa' ya'nocaso marë' pi'iro'tëanaquë i' ya'huërinso', inaquéráchin niyonto'in!” tënин. Topachina, inachachin ya'huërin huachi.

¹⁰ Yaniro'paso': “no'pa',” itérin. I' niyontoninsoso': “marë,” itérin.

Ya'ipi acorinsopita noyasáchin nisarin ni'nin. Ina nicaton, ¹¹ Yosë taantarin: “¡Nisha nisha sharo'sa papoina!” Nisha nisha panpatororo'santa nisha nisha ya'pirihuánpiso', papoina'. ¡Nisha nisha nararo'santa nisha nisha nitopisopita no'paquë papoina!” tënин. Topachina, inachachin ya'huërin huachi. ¹² Ina nohuanton nisha nisha sharo'sa', panpatororo'sa', nararo'sa', inapita isoro'paqué paporin. Acorinsopita nicaton: “¡Ma nónyacha acorahué paya!” tënин. ¹³ Tashiantarahuaton tahuérian tahuachina, i'huaraya huaré' cara tahuéri nanirin huachi.

¹⁴⁻¹⁵ Ina quëran Yosë taantarin: “¡A'pininsopita pi'iro'tëquë ya'huë'in. Tahuéri, tashi a'pintacaso marë' ya'huë'in. Inapita a'pinpachina, tahuéri, tashi', nisha nisha acoarin. Naporahuaton yoquiro'sa', pi'ipiro'sa', inapitanta piyapiro'sa nitotapi huachi!” tënин. Topachina, inachachin ya'huërin huachi.

¹⁶ Tahuéri a'pinacaso marë' panca masho acorahuaton, tashinta a'pinacaso marë' hua'huishin miachin acorin. Tayoraro'santa acorin.

¹⁷⁻¹⁸ Yosëri inapita isoro'pa' a'pintacaso marë' pi'iro'tëquë acorin. Tahuéri, tashi

- a'pintarin. Acorinsopita nicaton: “¡Ma nójacha acorahuë paya!” tënин.
- 19 Tashiantarahuaton tahuëriantahuachina,
i'huaraya huarë' catapini tahuëri nanirin
huachi.
- 20 Ina quëran Yosë taantarín: “¡Nisha nisha
ma'sharo'sa i'quë ya'huëcaiso marë'
ya'huë'in! Nisha nisha samiro'santa
ya'huë'in. ¡Naporahuaton, nisha nisha
inairaro'sa yanponacaiso marë' ya'huë'in!”
tënин. Topachina, inachachin ya'huërin
huachi.
- 21 Panca ma'sharo'sa nisha nisha nipisopita,
marëquë ya'huëcaiso marë' acorin.
Nisha nisha samiro'santa', acorin.
Anpiantëhuano'santa', acorin. Acorinsopita
nicaton: “¡Ma nójacha acorahuë paya!”
tënин.
- 22 I'quë ya'huëcaiso nipisopita noya yonquirapiton
iso pochin sha'huitérin: “¡Na'amiatatoma
marëro'saquë ya'huëco!” itérin.
Naporahuaton anpiantëhuano'santa',
sha'huitérin: “¡Na'amiatatoma canpitanta
isoro'paquë ya'huëco!” itérin.
- 23 Tashiantarahuaton tahuëriantahuachina,
i'huaraya huarë' a'natérápo tahuëri nanirin
huachi.
- 24 Ina quëran Yosë taantarín: “¡Nisha nisha
ma'sharo'sa ya'huë'in! Tananquë
ya'huëcaiso nipisopita, pë'tahuacaiso
nipisopita, niohuaratacaiso nipisopita.
¡Inapita ya'huë'in!” tënин. Topachina,
inachachin ya'huërin huachi.

- 25 Inapita ma'sharo'sa', ya'ipi Yosëri acorin. Acorinsopita nicaton: “¡Ma nøyacha acorahuë paya!” tënин.
- 26 Naporo tahuëri chachin tapon: “¡Iporaso huachi piyapi niahua! Inaso canpoa pochachin nisarin. Chiníquën nanantaton, samiro'sa', anpiantëhuano'sa', inapita hua'anëntarin. Ma'sharo'sa pë'tahuacaiso nipesopita, tananqué ya'huëcaiso nipesopita, niohuaratérinsopita, ya'ipi inapitanta hua'anëntarin,” tënин.
- 27 Yosëri piyapi acoapon, inaora pochachin acorin. A'nara quëmapi, a'nara sanapi. Inaíchin ninin.
- 28 Noya yonquirapiton iso pochin sha'huitërin: “Nóya ya'huëco’.
- Na'a hua'huasha ya'huëchinquëma'. Shiparimapita na'atona', ya'ipi parti ya'huë'ina'. Ya'ipi hua'anëntoco'. Samiro'sa', ma'sharo'sa', anpiantëhuano'sa', niohuaratérinsopita, inapita hua'anëntoco'”, itërin.
- 29 Napotahuaton, itaantarín: “Ni'quë'. Nisha nisha sharo'sa apapotérahuë nitërinso capamaso marë'. Notohuaro' nisha nisha nararo'santa nitërinso ca'quë', iroquë'. ³⁰ Ma'sharo'sa', anpiantëhuano'sa', niohuaratérinsopita, inapitaso niperinhuë', panpatoro acotérahuë capacaiso marë” itërin. Napotahuachina, inachachin nipi huachi. ³¹ Naporo' Yosëri ya'ipi acorinsopita nicaton: “¡Ma nøyacha ya'ipi acorahuë paya!” tënин. Tashiantarahuaton tahuëriantahuachina, i'huaraya huarë' saota tahuëri nanirin huachi.

2

- ¹ Inapoaton Yosë: Isoro'pa', pi'iro'të', ya'ipi inaquëpita ya'huérinsopitarë chachin ténirin huachi.
- ²⁻³ Ya'ipi acorinsopita ténirahuaton, tahuéririnquë chinotérin. Napoaton, ina tahuëri noya ni'nin. Noya nicaton, chinoto tahuëri acorin. Napoaton piyapi pënënin: "Napor o tahuëri chinotatoma', casáchin yonquico," itérin.
- ⁴ Ina pochin Yosë iráca: Isoro'pa', pi'iro'të', inapita acorin. Ya'ipi no'tëquën sha'huitaranquëma'.

Itin nararoquë piyapi acorinso'

Sinioroso* Yosë ni'ton, inapita ya'nan acoaponahuë', ⁵ co sharo'sa ya'huëyátérarinhuë'. Co panpatoronta papoyátérarinhuë'. Co o'nan téranta acoyátérarinhuë'. Naporahuaton co insonta isoro'paquë sha'tacaso marë' ya'huëyátérarinhuë'. ⁶ Napoaponahuë', no'pa quëran chachin i'sha pipiton, së'cotërotárin. ⁷ Napor'o Sinioroso Yosë ni'ton, yaniro'pa' amocan quëran quëmapi ninin. Nani nisahuaton, nanopicaso marë' pihuinitérin. Inapotohuachina, niirahuaton nanopirin huachi.

⁸ Ina piquëran, Sinioroso noyápiachin nararo Itin itopiquë acorin. Inaso no'pa', Cortanii' quëran pi'i pipirinso parti quëparitérin. Inaqué ya'huëcaso marë' quëmapi niniso acorin. ⁹ Naporahuaton, nisha nisha noyápiachin cashino'sa apapotérin. Yashi yashin ca'chináchin nitérinsopita apapotérin. Nararo huancánachin nanopirin nara apapotérin.

* **2:4** Sinioro: Sinioroso', iráca iprioro'sari Yosë nininën Yapi (YWH) itopi. Ina pochin nohuitopiso', cacharonquë, Sinioro itopi.

Inaquë chachin a'nanta', apapotérin. Anitotacaso nara itopiso'. Ina ca'pachina', noya nininsopita nitotaponahuë', co noyahuë' nininsopitanta nitotapi huachi.

¹⁰ Itinquë a'nara i' pipirin. Ya'ipi nararo asë'coterotacaso marë' naporin. Ina quëran chachin catapini së'parai' pa'térin. ¹¹ Ya'natirinsoso', Pisonii' itopi. Inaso', Apira parti conimarin. Inaquë oro ya'huérin. ¹² Inaquë oro ya'huérinso', noya noya ninin. Pimo yaquinta noya noya nininso ya'huérin. Nisha na'pinta ya'huérin, onisi itopiso'. ¹³ Ina quëran niantarinsonta', Quiconii' itopi. Inaso', ya'ipi Coso parti pa'térin. ¹⁴ A'nanta', Tiquirisii' itopi. Inaso', Asiria ninano pi'i ya'coninso parti quëran acorin. Ya'natomarinsoso nimirinhuë', Iopiratisii' itopi.

¹⁵ Sinioroso Yosë ni'ton, Itin nararoquë quëmapi acorin. Inaquë sacataton a'paicaso marë' acorin. ¹⁶ Naporo' iso pochin camairin: "Ya'ipi isopita nararo'sa nitérinso', noya ca'quë', iroquë', inapoquë'. ¹⁷ Anitotacaso nara nitérinsoíchin, co no-huantérahüë capamaso'. Inaso ca'patan, noya nininso nitotaponahuë', co noyahuë' nininsonta nitotaran. Ama ina nitérinso ca'quësohuë'. Ina ca'patan, têhuëñchachin chiminaran," itérin.

Yosëri sanapi nininso'

¹⁸ Ina quëran Sinioroso Yosë ni'ton, taantarin: "Quëmapi inaora ya'huëcaso', co noyahuë'. A'na nianta'i nipachin, inari noya catahuacaso marë', " tënин. ¹⁹⁻²⁰ Ina quëran ya'ipi ma'sharo'sa', anpiantéhuano'sa', inapita no'pa quëran ninin huachi. Inapita nisahuaton, quëmapi quëshirin

inari nininën acotacaso marë'. Pë'tahuaro'sa', anpiantëhuano'sa', ma'sharo'sa tananquë ya'huë rinsopita, inapita nininën acotérin. Ma nininënsona acotohuachina, ina chachin ninihuapi huachi. Napoaponahuë', co a'na ma'shari téranta nanitérinhue', quëmapi noya catahuacaso'.

²¹ Napohuachina, quëmapi noyá ahuë'etérin. Huë'eso', a'nara nininpítën ocoitérin. Ocoitahuaton, anoyataantarín huachi. ²² Ina nininpítë quëran chachin sanapi ninin. Capayatohuachina, sanapi nininso a'notérin. ²³ Quënanahuaton, quëmapi pa'yanin. Pa'yataton, tapon: “¡Isocha tēhuëñchinsó', ca pochachin Yoséri ninin! Cá quëran ninin ni'ton, sanapi itarahuë,” ténin.

²⁴ Napoaton quëmapi sa'apachin, pa'pin, a'shin inapita patahuaton, sa'iné' nichinpitacaso ya'huërin. Catoya'pi nimirinahuë', a'naíchin pochin nipi huachi.

²⁵ Quëmapiso sa'iné chachin noya ya'huërapi. Co a'moanaponaraihuë', co manta tapanpihuë'.

3

Co Yosë natëtonaraihuë', oshahuanpiso

¹ Siniroso Yosë ni'ton, ya'ipi tananquë ma'sharo'sa ya'huë rinsopita acorin. Ya'huanso nimirinhuë', a'napita ma'sharo'sa quëran yonqui yonquínahuan ninin. Sanapi yanopintaton, paaparin nontacaso marë':

—¿Tēhuëñchachin ta'ma Yosë apiratérinquëma ya'ipi isopita nararo'sa nitérinso capamaso to? itérin.

2-3 —Ya'ipi nitérinso', noya capa'huaiso'. A'naíchin huancánachin huanirinso', co Yosë nohuantérinhuë': "Ama ina nitérinso', ca'cosohuë'. Ama së'huacosohuë'. Ca'patama', tëhuëñchachin chiminarama', itérincoi Yosë, itérin.

4-5 —Co napoarinhuë'. Co chiminaramahuë'. Ca'patamaso', ya'ipi noya nininsopita, ya'ipi co noyahuë' nininsopitanta', nitotarama huachi. Inapita nitotatoma', Yosë pochachin nisarama'. Ina nitotaton, Yosë apiratérinquëma', itérin.

6 Ina natanaton, sanapiso nara nitérinso ni'sárin: Noyápiachin nicaton ca'chináchin cancantérin.

"Ina ca'pato, ya'ipi nitotarahuë huachi," ténin. Napoyan quëran, së'pashorahuaton ca'nin. So'ionta quëtohuachina, inanta ca'nin. **7** Naporo chachin nisha yonquipi huachi: "Tnanpirashité canposo pa'sárë'," niitopi. Ninapotatona', iquira huëron pipitopi. Inapoatona', nipa'shianatopi.

8 I'huanahuanquë huisontapaso', Yosëri nararo-quë huëcapairinso natanpi. Natanahuatona', na'picaiso marë' ta'api. **9** Na'pitopirinahuë', inariso pérarin:

—Atan*. ¿Insëquëta ya'huaran? itérin.

10 Natanahuaton, quëmapiso tapon:

—Co'ta o'maranso' natanai. I'nanpirashitécoi ni'toi, të'huatérainquën. Naporahuaton tapan-tatëinquën, na'pirai, itérin.

11 —¡I'yan! ¿Onporahuatomata nitotapanamaso'? Nara a'naíchin nininso': "Ama isoso nitérinso ca'quësohuë'," itopiranquënhuë': ¡Nani ca'nan! itérin.

* **3:9** Atanso': Piyapi tapon naporin.

12 —Iso sanapi quëtérancoso', quëtérinco ni'ton, ca'nahuë, itérin.

13 Napotohuachina, sanapi ya'huërë' tahuërétahuaton, itapon:

—¿Onpoatonta naporanso'? itérin.

—Ya'huan nonpintérinco ni'ton, ca'nahuë, ténin sanapi.

14 Naporos Sinioroso Yosë ni'ton, ya'huan ya'huërë' tahuërétahuaton, co huachi noya ya'huëcaso marëhuë' sha'huitérin:

—Piyapi nonpintéranso marë' a'napita ma'sharo'sa quëran, pa'pi co noyahue' ni'nanquën. Napoaton ipora quëran huarë' cancanën quëran no'pa' pa'taran. Inapoaton, chiminaquë huarë' nosorotaran. **15** Ca nohuanto sanapi inimicotarinquën. Quëmarinta ina inimicotaran. Quëmá quëran pipipisopitanta', sanapi quëran pipipisopitarë' niinimicotapona'. A'na tahuëri sanapi quëran pipirinsoari† minsëmiatarinquën. Napoaponahuë', quëmarinta chiníquën ina aparisitaran, itérin.

16 Ina quëran sanapi ya'huërë' itapon:

—Co natérancoso marëhuë', hua'huanpatan pa'pi iquin quëran huaiaran. Napoaponahuë', so'yan ya'cariantaran. Naporahuaton, so'yan camaiinquënso ya'huérin, itérin.

17 Ina quëran quëmapinta itapon:

—Sa'an natéton, nara nitérinso co capacasohuë nimirinhue', ca'nan. Naporanso marë' ya'ipiro'pa' co huachi noyatacaso marëhuë' sha'huitarahuë. Napoaton nitapiarin. Pa'pi chiníquën sacataquë

† **3:15** Sanapi quëran pipirinso topachina: Quisocristo ninoton napotérin.

huarë' coshataran. Chiminaquë huarë' inapoaran. ¹⁸ Naporahuaton, nahuano'sa', shihuarino'sa', inapita na'con na'con papotapon huachi. Nisha nisha canoméro'sa', nararayaro'sa', inapita yoniton, capon. ¹⁹ Pa'pi chiníquën sacatahuarë' coshataran. Napoin quëran chiminaran huachi. No'pa quëran ninanquën ni'ton, no'pa chachin niantamaso ya'huërin, itërin.

²⁰ Atanso', sa'in nininën acotërin, Ipa itërin. Ina quëran ya'ipi piyapi na'acaiso ni'ton, ina pochin nohuitërin. ²¹ Quëmapi sa'inë chachin a'mocaiso marë' ma'sha sha'huëtë quëran Yosëri nitërin. Ina quëtohuachina, a'moanpi huachi. ²² Naporo chachin tënин: "Iporaso', piyapi canpoa pochachin nitotërin. Noya nininso nitotahuaton, co noyahuë' nininsonta nitotërin. Ni'quëna nanpirin nara nitërinsonta ca'pachin. Napohuachinso', nanopimiatarin," tënин.

²³ Napoaton Sinioroso Yosë ni'ton, noyápiachin nararo quëran quëmapi ocoirin. Ocoirahuaton, niquë acorin. Inaqué sacatacaso marë' acorin. No'paqué chachin sacatapon huachi. ²⁴ Piyapi ocoirahuaton, pi'i pipirin parti quëran a'paito anquëniro'sa acorin. Inapitaso', quiropino'sa itopi. Noyápiachin nararo a'paicaiso marë' acorin. Ina ya'carinta', sahuëni orotaton huënin huënintárin acorin. Ama incari téranta nanpirin nara ya'caricaso marëhuë', a'pairapi.

4

Atan ya'nan hui'ninpita napopiso'

¹ Atan sa'in hua'huanpachina, quëmapia'huaya huairin. "Yosë catahuarinco ni'ton, quëmapia'huaya hua'huanahuë huachi," ta'ton, nininën acotérin. Caino itérin.

² Ina quëran hua'huaantarin. Quëmapi chachin huaiaantahuachina, Apiri itérin. Hui'napitohuachinara, Apiriso ohuicaro'sa pë'tahuarin. Cainoso nimirinhue', imin camayo.

³ A'na tahuëri cato chachin ofrenda quëcatona', Yosë chinotapi. Cainoso', sha'ninsa quëran Yosë chinotacaso marë' quënin. ⁴ Apiriso nimirinhue', ohuicanënpita ya'nan hua'huatopiso quënin. Amo amoshin nininsopita Yosë chinotaton tēpacaso marë' quënin. Yosëso Apiri nóya ni'nin. Ofrendanëonta nóya ni'nin. ⁵ Cainoso nimirinhue', co noyahuë' ni'nin. Ofrendanëonta co noyahuë' ni'nin. Ina marë' Cainoso', pa'pi no'huitérin. No'huitaton, aquinorárin. ⁶ Ina nicaton, Siniorori itapon: "¿Onpoatonta no'huitaton aquinoráran? ¡Ama huachi no'huitéquësohuë!" ⁷ Noya ninan naporini, noya cancanchitonhuë'. Nimirinhue', co nohuantéranhue' noya nicacaso ni'quëhuarë', co noyahuë' nisápaso marë' oshanën minsëarinquén. Ina nimirinhue', noya nipatan, nanitéran ina minsëcaso!", itérin.

⁸ Natanaponahuë', co yanatétérinhue'. A'na tahuëri iin itapon:

—Huéquë iyara iminquë pa'a, itérin. Inaquë canconpachinara, iin ahuëaton, tēparin.

⁹ Siniorori nitotaton, Caino itapon:

—¡Ma'sona iyaya onporinso', sha'huitoco! itérin. Napotohuachina, Cainoso tapon:

—Co nitotërahuë'. ¡Co ina a'pairápa'huaso ya'huërinhuë! itérin. ¹⁰ Napotohuachina, Siniñorori itapon:

—¿Onpoatonta naporan? Iyaya tēpaton, pa'pi co noyahue' ninan. Huënainën a'patëran ni'ton, co huachi noya ya'huëcamaso marëhuë' sha'huitaranquën. ¹¹ Iya'hua tēparanso marë' pa'pi co noyahue' ni'nanguën. Huënainënquë no'pa' asë'cotetëran ni'ton, ocoiaranquën. ¹² Iminaton, sha'topiranhuë téranta', co huachi noyatarinhue'. Co huachi ya'huëmia ya'huaponhuë', patë patërantapon. Co huachi sano cancantaranhue', itérin.

¹³ —¡Ma'huantacha nisarahuë paya! Co ahuan-tochináchinhue' ana'intaranco. ¹⁴ Ipora tahuëri iso ro'të quëran ocoiaranco. Co huachi ya'huëmia ya'huapohue', patë patëranta'huaso ya'huërin. Co huachi sano cancanta'huaso ya'huaponhuë'. Co chinota'huanquënsi téranta nanitapohue'. Napoat-ton inso téranta quënanpachinco, tēpaponco tēnahuë, itérin Cainori.

¹⁵ —Insosona tēpahuachinquën, inanta na'con na'con ana'intacaso ya'huërin. Canchisëro ana'intacaso ya'huërin, itérin Siniñorori. Napotahuaton marca acotërin. Quënanpachina ama tēpacaiso marëhuë', inapotërin.

¹⁶ Ina quëran Caino pa'nin. Yosë quëran pipirahuaton, Noto parti ya'huëconin. Inaso no'pa', Itin quëran pi'i pipirinso parti quëparitërin.

Caino shinpita napopiso'

17 Caino sa'apachina, hui'nahuanin. Hui'nin nasitohuachina, Inoco itérin. Ina quérان Caino ninano ocoihuachina: "Inoco ninano'," itérin.

18 Inoco hui'nahuanpachina, Irato itérin. Iratonta hui'nahuanpachina, Miocairo itérin. Miocairo ya'huérë hui'nahuanpachina, Mitosairo itérin. Mitosaironta hui'nahuanpachina, Namico itérin. **19** Namicoso', cato sa'ahuanin. A'naso', Ata itopi. A'nanta', Sira itopi. **20** Ataso hua'huanpachina, Caparo itopi. Caparo shinpitaso' pë'tahuatona'piro'sa'. Napoaton në'mëtë pëiro'saquë ya'huëpi. **21** Caparoso', a'nara iya'huain ya'huëtérin, Coparo itopiso'. Coparo shinpitaso', arpa míso pi'nipi. Nisha nisha pirinaonta míso pihuipi. **22** Siraso nimirinhuë', hua'huanpachina, Toparo-caino itopi. Inaso', hua'na camayo ya'conin. Hua'namia nitotahuaton, sha'pi hua'nanta nitotérin. Toparo-cainoso', a'nara oshin ya'huëtérin, Naama itopi.

23 A'na tahuëri Namicoso', sa'inpita itapon: "Natanquë Ata. Quémanta Sira, noya natanco sha'huichinquéma':

A'na quëmapi tëparahuë pë'sharincoso marë'.

Hui'napi nimirinhuë', ahuërincoso marë' napotérahuë.

24 Iin tëparinso marë' Caino tëpahuachinaso', canchisëro aquëtë Yosëri i'huërëtapon.

Caso nimirinhuë', tëpatérahuëso marë' tëpahuachinaco, canchisë shonca canchisëro aquëtë i'huërëtacaiso ya'huërin," itérin.

Sito nasitérinso'

²⁵ Oshaquëran Atan sa'in, hua'huantahuachina, Sito itérin. “Cainori tēparinso ya'huérënamën Yosë quétaantarincó,” ta'ton, ina pochin nininëñ acotérin. ²⁶ Sitonta hui'nahuanpachina, Inosë itérin. Naporo quëran huarë' piyapiro'sa caniaritopi Yosë chinotatona', “Sinioro” itacaiso'.

5

Atan shinpita napopiso'

¹ Atan shinpita napopiso sha'huichinquëma nitotoco'. Yosëri piyapi nipachina, inaora pochachin ninin. ² Quëmapi, sanapi, nisahuaton, noya ya'huëcaiso marë' noya yonquirapiton sha'huitérin. Acorinso tahuëri chachin nohuitaton: “Isopitaso': ‘Piyapiro'sa',’ itarahuë,” ténin.

³ Atan pasa cara shonca pi'ipitaso', hui'nin nasitérin. Nasitohuachina, Sito itopi. Inaso', pa'pin noyá quëparin. ⁴ Sito nasitérin piquëran Atanso', posa pasa pi'i aquëtë ya'huantarin. A'napita hui'ninpitanta quëmapi'sa', sanapi'sa', ya'huëtérin. ⁵ Ya'ipiya quëran Atanso', iscon pasa cara shonca pi'i icanin. Ina quëran chiminin huachi.

⁶ Sito pasa a'natérápo pi'ipitaso', hui'nin nasitérin. Nasitohuachina, Inosë itopi. ⁷ Inosë nasitérin piquëran Sitoso', posa pasa canchisë pi'i aquëtë ya'huantarin. A'napita hui'ninpitanta quëmapi'sa', sanapi'sa', ya'huëtérin. ⁸ Ya'ipiya quëran Sitoso', iscon pasa shonca cato pi'i icanin. Ina quëran chiminin huachi.

⁹ Inosënta iscon shonca pi'ipitaso', hui'nin nasitérin. Nasitohuachina, Cainan itopi. ¹⁰ Cainan nasitérin piquëran Inosëso', posa pasa shonca

a'natérápo pi'i aquëtë ya'huaantarin. A'napita hui'ninpítanta quëmapi'sa', sanapi'sa', ya'huëtérin. **11** Ya'ipiya quëran Inosëso', iscon pasa a'natérápo pi'i icanin. Ina quëran chiminin huachi.

12 Cainan canchisë shonca pi'ipitaso', hui'nin nasitérin. Nasitohuachina, Maarariro itopi. **13** Maarariro nasitérin piquëran Cainanso', posa pasa catapini shonca pi'i aquëtë ya'huaantarin. A'napita hui'ninpítanta quëmapi'sa', sanapi'sa', ya'huëtérin. **14** Ya'ipiya quëran Cainanso', iscon pasa shonca pi'i icanin. Ina quëran chiminin huachi.

15 Maarariro saota shonca a'natérápo pi'ipitaso', hui'nin nasitérin. Nasitohuachina, Carito itopi.

16 Carito nasitérin piquëran Maarariroso', posa pasa cara shonca pi'i aquëtë ya'huaantarin. A'napita hui'ninpítanta quëmapi'sa', sanapi'sa', ya'huëtérin. **17** Ya'ipiya quëran Maarariroso', posa pasa iscon shonca a'natérápo pi'i icanin. Ina quëran chiminin huachi.

18 Carito pasa saota shonca cato pi'ipitaso', hui'nin nasitérin. Nasitohuachina, Inoco itopi.

19 Inoco nasitérin piquëran Caritoso', posa pasa pi'i aquëtë ya'huaantarin. A'napita hui'ninpítanta quëmapi'sa', sanapi'sa', ya'huëtérin. **20** Ya'ipiya quëran Caritoso', iscon pasa saota shonca cato pi'i icanin. Ina quëran chiminin huachi.

21 Inoco saota shonca a'natérápo pi'ipitaso', hui'nin nasitérin. Nasitohuachina, Matosarino itopi. **22** Inocosó', nani tahuëri Yosë chinotaton, ina nohuantérinsoráchin ninin. Matosarino nasitérin piquëran Inocosó', cara pasa pi'i aquëtë ya'huaantarin. A'napita hui'ninpítanta

quëmapi'sa', sanapi'sa', ya'huëtérin. ²³ Ya'ipiya quëran Inocosó', cara pasa saota shonca a'natérápo pi'ipi ya'huëtérin. ²⁴ Inaso', Yosë nohuantérinsoráchin nininso marë' a'nanaya ayarin. Yosëri inápaquë quëparin.

²⁵ Matosarino pasa posa shonca canchisë pi'ipitaso', hui'nin nasitérin. Nasitohuachina, Namico itopi. ²⁶ Namico nasitérin piquéran Matosarinoso', canchisë pasa posa shonca cato pi'i aquëtë ya'huaantarin. A'napita hui'ninpítanta quëmapi'sa', sanapi'sa', ya'huëtérin. ²⁷ Ya'ipiya quëran Matosarinoso', iscon pasa saota shonca iscon pi'i icanin. Ina quëran chiminin huachi.

²⁸ Namico pasa posa shonca cato pi'ipitaso', a'nara hui'nin nasitérin. ²⁹ Nasitohuachina, Noi itérin. "Siniorori piyapi co huachi noya ya'huëcaso maréhuë' sha'huitaton, ana'intérin. Napoaton isoro'pa' nitapirin. Pa'pi chiníquën sacataquë huarë' cosharo manë'. Iso hua'huashaso nipi琳huë', nanan anoyatatonpoa achinotarinfoa'," ta'ton, ina pochin nininën acotérin. ³⁰ Noi nasitérin piquéran Namicoso', a'natérápo pasa iscon shonca a'natérápo pi'i aquëtë ya'huaantarin. A'napita hui'ninpítanta quëmapi'sa', sanapi'sa', ya'huëtérin. ³¹ Ya'ipiya quëran Namicoso', canchisë pasa canchisë shonca canchisë pi'i icanin. Ina quëran chiminin huachi.

³² Noiso', a'natérápo pasa pi'ipitaquë huarë' hui'nin paninantérinso nasitérin. Ina quëran cato hui'ninpita ya'huëtaantarin. Hui'ninpitaso': Simo, Camo, Cahuito, inapita itopi.

6

Piyapi'sa nitapicancampiso'

¹ Piyapi'sa na'asahuatona', yanquëpi huachi. Itohua itohua ninanoro'sa ocoiatona ya'huërapí. Na'a hui'ninapita nano'sa ya'huëtopi. ² Yosë hui'ninpitari* ina nano'sa ni'sahuatona', pa'yatopi. Napoaton huayonatona huayonatona', costapiso mara'piapi. ³ Napoaponahuë', Siniorori co costatonhuë' tapon: "Co piyapi'sa ya'huëmiatápaiso ya'huérinhue'. Piyapi ni'ton, chiminacaiso ya'huërin. Napoaton pasa cato shonca pi'ipira', nanpipona'," ténin.

⁴ Yosë hui'ninpitari ina sanapiro'sa macatona', hui'nahuani. Hui'nahuani pachinara, panca piyapiro'sa ya'huërin huachi. Ina quëran inapitaso', iráca quëran huarë' hua'ano'sa nahuinpisopita ya'huëpi. ⁵ Napoaponaraihuë', pa'pi co noyahue' cancantopi. Co noyahue' nicacaisoráchin yonquipi ni'ton, Yoséri co noyahue' ni'nin. ⁶⁻⁷ Ina nicaton, sëtërin: "Ma'marëcha piyapi acorahuë paya. Ata'huanchi nipachin. Ya'ipi pë'tahuaro'sa', anpiantëhuano'sa', no'paquë niohuaratérinsopita, inapitarë chachin ata'huantarahue' huachi," ténin. ⁸ Napoaponahuë', Noiso nöya ni'nin.

Noi panca nancha nininso'

⁹ Noi naporinso sha'huichinquëma': Noiso Yoséíchin natëton, nöya ninin. Naporo tahuëri'sa inaíchin Yosë nohuantérinso ninin. ¹⁰ Inaso', cara

* **6:2** Yosë hui'ninpita topachina, ma'sona tapon naporinso': co insonta nitotérinhue'. "Yosë imaro'sa hui'nina'," topi a'naquën.

hui'ninpita quëmapisáchin ya'huëtérin: Simo, Camo, Cahuito, inapita.

11-12 Naporo' ya'ipi isoro'paquë ya'huëpisopita nitapicancanpi. Pa'pi co noyahue' nicatona', ahuëtacaisoráchin cancantopi. Napopiso Yosëri ni'nin. **13** Ina nicaton, Noi itapon:

"Ya'ipi piyapiro'sa ata'huantarahuë. Pa'pi co noyahue' nipi ni'ton, piyapi'sa co huachi sano cancantopihuë'. Napoaton ya'ipiro'paquë ya'huëpisopita ata'huantarahuë huachi. **14** Quëmaso nipurinhue', panca nancha niquë'. Yaquihuan nara quëran nisahuaton, aipi quëran, acopo quëran, to'ni pochin nininquë to'niquëtëquë'. Patoanaro'santa acotëquë'. **15** Nancha nipatan, iso pochin acoquë': Pasa cara shonca a'natérápo mitro naporopitérinso'. Cato shonca cato mitro miria panganatérinso'. Shonca cara mitro miria inaparinso'. **16** Naporahuaton, cara pa'cotë acotëquë'. Pëirapiranso ya'cari', miria mitro aquërinquë huintana acotëquë'. Ya'coananta', a'natérana acotëquë'. **17** A'na tahuëri panca pacon a'paarahuë, ya'ipiro'pa' imotarin. Ya'ipi piyapiro'sa', ma'sharo'sa', inapita taquittapi. **18** Quëmaro'coso nipurinhue', anoyatarahuë ni'ton, nancha tënihuatan, sa'anë'quën chachin ya'conaran. Hui'nanpitanta', sa'inare chachin ya'conapi. **19** Naporahuaton, ma'sharo'santa nisha nisha nipesopita quëran, a'nara quëmapi, a'nara sanapi yontonquë'. Inapitanta canpita pochin cha'ëcaiso marë' yontonquë'. **20** Anpiantëhuano'sa', pë'tahuaros'a', no'paquë niohuaratérinsopita, ya'ipi inapita

catoya catoya ya'conapona'. Canpitare
chachin ya'huantacaiso marë' ya'conapona'.
21 Notohuaro' cosharo nisha nisha nininsopita
ayontonahuaton nanchaquë po'moquë'. Canpita
capacamaso nisahuaton, ma'sharo'santa
capacaiso marë' po'moquë' "itérin.

22 Napotohuachina, Noiso' ya'ipi Yoséri
camairinso chachin ninin huachi.

7

Nanchaquë ya'conpiso'

1 Ina quëran Siniorori Noi itapon: "Ya'ipi
ipora ya'huëpisopita a'porinaco. Quëmasáchin
nohuantërahuëso ninan. Napoaton iporaso',
sa'anë'quën chachin nanchaquë ya'conquë
huachi. Hui'nánpitanta', sa'inarë chachin
ya'coina'. **2** Chinotamacoso marë' ma'sharo'sa
tëpacaiso nipisopitaso', canchisë quëmapi nisahu-
aton canchisë sanapi nanchaquë po'moquë'.
Ya'huërë' co ina marë' nipisopitasohuë', a'nara
quëmapi, a'nara sanapi inaíchin po'moquë'.
3 Nisha nisha anpiantëhuano'santa', nanchaquë
po'moquë'. Canchisë hua'anën, canchisë
sanapinëñ na'antacaiso marë' po'moquë'.
4 Canchisë tahuëri quëran ca nohuanto o'nanapon.
Catapini shonca tahuëri, tashirë chachin
o'namiatapon. jInapotato ya'ipi isoro'paquë
acorahuësopita ata'huantarahuël" itérin.

5 Noiso', ya'ipi Siniorori camairinso chachin
ninin.

6 Noi saota pasa pi'ipitaso', paconi isoro'pa'
imotërin. **7** Naporo inaso', sa'inë chachin
nanchaquë ya'conin. Hui'nínpitanta sa'inarë

chachin cha'ëcaiso marë' ya'conpi. **8-9** Yosë chinotacaso marë' ma'sharo'sa tëpacaiso nipesopitanta', Noirë chachin catoya catoya nanchaquë ya'conpi. A'nara quëmapi, a'nara sanapi ya'conpi. Co ina marë' nipesopitahuënta ya'conpi. Anpiantëhuano'sa', niohuaratérinsopita, inapitanta inapochachin ya'conpi. **Yosëri sha'huitérinso chachin nipi.**

10 Yosëri sha'huitérinso chachin, canchisë tahuëri quëran paconi isoro'pa' imotarin huachi. **11** Naporor Noiso', saota pasa pi'i, cato yoqui, shonca canchisë tahuëritarin. Naporor chachin isoro'pa' huëncharoatë pochin ninin. Marënta acoporo ya'huërinso', pipimiatérin. Naporahuaton inapaquënta', i' ya'copinamën ya'huërinso' nii'soatérin. Napohuachina, pa'pi i' isoro'paquë anotimarin. **12** Catapini shonca tahuëri tashirë chachin isoro'paquë o'namiatarin huachi. **13** Naporor tahuëri chachin Noi sa'inë nanchaquë ya'conin. Hui'ninpítanta', Simo, Camo, Cahuito, inapitanta sa'inarë' sa'inarë' ya'conpi. **14** Tananquë ma'sharo'sa ya'huërinsopita, pë'tahuar'o'sa nipesopita, niohuaratérinsopita, anpiantëhuano'sa', inapitanta ya'conpi. **15** Yosë nohuanton, ma'sharo'sa catoya catoya nanchaquë ya'conpi. **16** Nisha nisha nipesopita quëran, a'nara quëmapi, a'nara sanapi ya'conpi. Yosëri Noi camairinso chachin nipi. Nani ya'conpachinara, Siniorori chachin nancha ya'coananëñ oncorapirin huachi.

Pacon pa'ninso'

17 Catapini shonca tahuëri o'nanárin. Pamatohuachina, nanchaso no'pa quëran yanponin huachi. **18** Pamaso' aquëtë chachin mëntaintararin, nanchaso nípirinhuë', noya yanponarin. **19-20** Pa'pi pacon pa'sahuaton, ina inápa motopiro'sa quëran huarë' imotérin. Inapita motopiro'sa imotahuaton, canchisë mitro aquëtë pantarin. **21-22** Naporo' ya'ipi piyapiro'sa isoro'paquë ya'huëpisopita, taquiitopi. Anpiantëhuano'sa', pë'tahuar'o'sa', tananqué ma'sharo'sa ya'huérinso', niohuaratérinsopita, inapitanta ta'huantopi. Ya'ipi nii o'huatona nanopipisopita, taquiitopi huachi. **23** Noisáchin cha'érin. Panca nanchaquë ya'conpisopitarë', cha'érin. A'napitaso nípirinhuë', ya'ipi ta'huantopi. Pë'tahuar'o'sa', anpiantëhuano'sa', niohuaratérinsopita, inapitanta ya'ipi taquiitopi huachi. **24** Pasa a'natérápo shonca tahuëri isoro'pa'iiri imotaton, napotérin.

8

Pacon huinquintomarinso'

1 Naporo' Yosëri Noi, ya'ipi ma'sharo'sa nanchaquë ya'huëapisopita, inapita yacatahuarin. Ina nohuanton pacon huinquintacaso marë' ihuan pa'nin. **2** Co'huara huinquinchátérasohuë', o'nan'ton më'tarin. Naporo' marë acoporo quëran pipirinso', nioncotérin. Inápaquë i' ya'copinamën nii'soatérinsonta inaporin. **3** Pasa a'natérápo shonca tahuëri quëran, i' pi'piyan pi'piyan huinquintomarin. **4** Canchisë yoqui, shonca canchisë tahuëri quëran, Ararato motopiro'sa

hui' nimotënqué nanchaso', ya'mitërin. ⁵ Iscon yoqui nanirahuaton tahuëririnqué, motopiro'sa hui' nimotëna ya'nopi huachi.

⁶ Inapita ya'nohuachinara, catapini shonca tahuëri quëran, Noiso nancha huintananën i'soatërin. ⁷ Naporor' a'nara itatan a'parin. Inaso', itohua itohua yanpo yanpónantarín. I' huinquintacaso ninaton, naporin. ⁸ Ina piquëran, Noiso' i' huinquintérinso nitotacaso marë', nëpë ya'huëre' a'paantarin. ⁹ A'papirinhue', co intopa huënsëcasohue' ni'ton, yanpo yanpónantarín. Naporarin quëran, nanchaque' chachin huënantarin. Huëntahuachina, Noiri masahuaton po'moantarin.

¹⁰ Canchisë tahuëri quëran, naquëranchin a'paantarin. ¹¹ Nëpëso pa'sahuaton, i'huarayasha huarë' huënantarin. Oripo nara së'para'huaya monoquënë chachin naquërahuaton quëntarin. Naporor' Noi, yaniromarinso nitotérin huachi. ¹² Canchisë tahuëri quëran naquëranchin nëpë a'paantapirinhue', co huachi huëntarinhuë'.

¹³ Noi saota pasa a'na pi'itapaso', ya'ipiro'pa' yaniromarin huachi. Caniaritérinso yoquiquë, ya'natirinso tahuëri chachin, napopinchin nancha pëirapirinso oquirin. Naporor' ya'ipiro'pa' yaniromarinso nocorin. ¹⁴ A'na yoqui, cato shonca canchisë tahuëri nanihuachina, ya'ipiro'pa' noyá yaniromarin huachi.

¹⁵ Naporor' chachin Yosëri Noi itapon: ¹⁶ "Iporaso huachi sa'anë'quën chachin nancha quëran pipiquë". Hui'nanpitanta', sa'inarë chachin pipiina'. ¹⁷ Ya'ipi ma'sharo'santa ocoiquë pa'ina'. Anpiantëhuano'sa', pë'tahuaro'sa', no'paquë

niohuaratërinsopita, ya'ipi inapitanta pipiina'. Notohuaro' hua'huatatona', ya'ipiro'paquë yanqué'ina',” itérin.

¹⁸ Napotohuachina, ya'ipi piyapi'sa cha'ëpiso pipipi. ¹⁹ Ma'sharo'santa pipipi: Pë'tahuaro'sa', niohuaratërinsopita, anpiantëhuano'sa', inapitanta pipipi huachi. ²⁰ Nani pipihuachinara, Noiso a'nara artaro ninin. Yosë chinotacaso marë' ma'sharo'sa tëpacaiso nipesopita masahuaton, tëparin. Anpiantëhuano'santa', manin. A'naya a'naya nisha nisha nipesopita quëran tëparin. Tëparahuaton, Sinioro chinotacaso marë' artaro aipi ya'ipi ahuiquitërin. ²¹ Ma'sharo'sa ahuiquitérinso pimóchin imërahuaton, Yosëri nöya ni'nin. Naporor' inaso tapon: “Hua'huatapona quëran huarë' piyapi'sa', co noyahue' nicacaisoráchin cancantopi. Inaso níponahue', co huachi ipora ana'intërahuëso pochin, isoro'pa' ana'intaantapohue'. Co huachi ma'sharo'santa inapotapohue'.

²² Isoro'paquë ya'huapona pochin, piyapi'sa noya sha'tapona'.

Nitérinsonta macapona'.

Huënocanta ya'huërahuaton, sëhuëonta ya'huapon. Pi'ipi tahuëri'santa nanirahuaton, o'napinta na-nípon.

Tahuëri, tashi', inapitanta ya'huapon,” ténin.

9

Yosë Noirë' anoyatërindo'

¹ Naporor' Noi, hui'ninpitarë chachin, Yosëri nöya yonquirapiton iso pochin sha'huitërin: “Na'a hui'nahuanatoma', ya'ipiro'paquë

ya'huëco'. ² Ya'ipi ma'sharo'sa', anpiantëhuano'sa', marëquë ya'huërinsopita, inapita hua'anëntarama'. Inapitaso të'huatarinënquëma'. ³ Carima ya'ipi inapita capamaso marë' quëtaranquëma'. Nisha nisha huërono'santa ca'co'. Ma'sona tëranta nayaramaso ca'co'. ⁴ Huënaiso nimirinhue', ama ca'cosohue'. Ma'sha tëpahuatama', huënainëñ noyá inquitahuatoma', ca'co'. Huënainëni ananpirin ni'ton, ama inaso ca'cosohue'. ⁵ Canpita capiniso', co nitëpamaso ya'huërinhue'. Tëpatohuatama', ana'inta'huanquëmaso ya'huërin. Ma'sharo'sarinta piyapi tëpahuachin, ana'intarahuë. Tëpatohuatama', a'naya a'nayanquëma tëhuëenchachin ana'intaranquëma'. ⁶ Insosona piyapi tëpahuachin, a'nari i'huërëtarin. Cá pochachin nicamaso marë' acoranquëma'. Napoaton, co nitëpamaso ya'huërinhue'.

⁷ [Napoaponahuë', canpitaso na'a hui'nahuanatoma', ya'ipiro'paquë ya'huëco!" itërin.

⁸ Ina quëran itaantarin: ⁹ "Ni'co'. Ipora canpitaro'co anoyatërahuëso', shiparimapitanta yonquiato, napotaranquëma'. ¹⁰ Ya'ipi ma'sharo'santa yonquiato napotaranquëma': Anpiantëhuano'sa', pë'tahuar'o'sa', tananquë ma'sharo'sa ya'huërinso', nisha nisha nipesopita nancha quëran pipipiso yonquiato, sha'huitaranquëma'. ¹¹ Ipora canpitaro'co anoyatato sha'huitëranquëmaso', co onporonta nishataponhue'. Co huachi piyapi'sa', ma'sharo'sa', inapita pacon quëran ata'huantaantapohue'. Co huachi paconi isoro'pa' ata'huantaantapohue'.

12-13 Canpitarë'co nani anoyatomiatërahuë. Ma'sharo'sarë'conta', nani anoyatërahuë. Ina yonquicamaso marë' yahua'tanëhuë inápaquë acoarahue. **14** Chitoro inápaquë ya'nohuachin, yahua'tanëhuënta ya'noarin. **15** Naporö' canpitaro'co anoyatato sha'huitëranquëmaso', yonquiarahuë. Ama huachi i' quëran, isoro'pa' ata'huaanta'huaso marëhuë', yonquiarahuë. **16** Yahua'tan chitorioquë ya'nohuachin ni'sarahuë. Ina ni'pato, ya'ipi piyapi'sarë'co ya'ipi ma'sharo'sarë'co anoyatërahuëso', ayonquiarinco. **17** Nani ina acorahuë ayonquiinpoaso marë'. Canpitarë'co anoyatërahuëso ayonquiarinpoa'. Ma'sharo'sarë'conta anoyatërahuëso ayonquiarinpoa'," itërin. Ina pochin Yosëri Noi sha'huitërin.

Noi hui'ninpitaë' naporinso'

18 Noi hui'ninpita nancha quëran pipipisopita, iso nápo ya'huëpi: Simo, Camo, Cahuito, inapita. Camoso', a'nara hui'nin ya'huëterin. Inaso', Canaan itopi. **19** Caramiáchin Noi hui'ninpita nimirinahuë', inayaquéranchin isoro'paquë piyapi'sa na'antapi. **20** Ina piquëran Noi iminaton, inaquë opasáchin shacaton, oparotërin. **21** A'na tahuëri Noi huino o'ton, no'pirin. No'piton, në'mëtë pëinën huáncana notataton, i'nanpirashitë quëhuëánin. **22** Camoso', inaquë ya'conahuaton ni'pirinhuë', pa'pin no'piton huë'ësárin quënanconin. Quënanahuaton iiinpita sha'huitapon pa'nin: "Tata no'piton i'nanpirashitë quëhuëánin ni'conahuë," itërin. (Nani sha'huirahuëso chachin Camoso', Canaan pa'pin.) **23** Ina natanahuatona', Simo, Cahuito, inapitaso

a'nara a'mopiso mapi. Ina masahuatona', niimopitopi. Niimopitopiquéranchin, pinëna quérän ya'conatona', pa'pina imotopi. Niquë notëtopi ni'ton, co pa'pina ni'pihuë'.

²⁴ Noi nonatohuachina, hui'nin hua'hua ninin-soari, napotérinso natantérin. ²⁵ Natantahuaton, Canaan itapon:

“¡Tata tēhuërin ni'ton, pa'pi co noyahue' nicasquen co huachi noya ya'huëcamaso marëhuë' sha'huitaranquen!

Yosë chiníquen ana'ichinquen.

Ipora quérän huarë' iyaro'sa camaiáponquen.

Shiparimapitanta inaporápona'," itérin.

²⁶ Ina quérän taantarín:

“Sinirosó', Yosënëhuë. Inari Simo noya nicaso noya ya'huëcaso marë' catahuain.

Canaansó', Simo piyapinën niin.

²⁷ Yosë nohuantón, Cahuito, pancana hua'anénchin.

Simo ya'huërinquë noya ninicatona ya'huë'ina'.

Canaansó', Cahuito piyapinën niin," ténin.

²⁸ Pacon pa'ninsó piquérán, Noiso' cara pasa a'natérápo shonca pi'ipi ya'huantarin. ²⁹ Ya'ipiyá quérän iscon pasa a'natérápo shonca pi'i icanin. Ina piquérán chiminin huachi. Ina pochin Noi ninin.

10

Noi shinpita napopiso'

¹ Iporaso', Simo, Camo, Cahuito, inapita shinpita napopiso sha'huichinquëma'. Pacon pa'ninsó piquérán hui'nahuanatona na'antapiso', sha'huichinquëma'. Simo, Camo, Cahuito,

inapitaso nani sha'huirahuëso chachin, Noi hui'ninpita.

² Cahuito hui'ninpitaso', isopita: Comiri, Macoco, Matai, Capano, Toparo, Misico, Tirasi, inapita. ³ Comiri hui'ninpitanta': Asiquinasi, Nipato, Tocarama, inapita. ⁴ Capano hui'ninpitanta': Inisi, Tarsis, Quitimo, Notanimo, inapita. ⁵ Ina nápo Cahuito hui'ninpita, shinpita inapita ya'huëpi. Inapitaso', marë yonsano'sa parti, ya'huëpi. Inatohua ninanoro'sa ocoirahuatona', a'naya a'naya nacionënaquë, a'na huënton a'na huënton, nisha nisha ya'huëpi. Inahuara no'panënaquë ya'huëpi. Naporahuatona', inahuara nonpiso nananquë nonatona', ya'huëpi.

⁶ Camo hui'ninpitanta isopita: Coso, Misiraimo, Oto, Canaan, inapita. ⁷ Coso hui'ninpitanta': Sipa, Apira, Sapota, Naama, Sapitica, inapita. Naama hui'ninpitanta': Sipa, Titan, inapita. ⁸ Cososo', a'na hui'nin ya'huëterin anta', inaso', Nimoroto itopi. Ina'ton chini chiníquën nanantaton, isoro'paquë hua'an ya'conin. ⁹ Nimorotoso Siniorori catahuarin ni'ton, pa'pi míso inantérin. Napoaton piyapi'sa nonpachinara pa'yatopi napocaiso': "Siniorori Nimoroto catahuarin ni'ton, míso inantérin. Inapochachin quëmanta catahuainquën," topi. ¹⁰ Nimoroto hua'anëntérin no'paquë, ninanoro'sa panca panca nipisopita, isopita ya'huërin: Papiri, Irico, Acato, Carini, inapita. Inapita ninanoro'saso', Sinaro parti ya'huëpi. ¹¹ Ina parti quëran Asoronta pipirahuaton, ninanoro'sa ocoirin: Ninhui, Niopoto-iri, Cara, inapita itopiso'.

12 Naporahuaton, Nisin ninanonta ocoirin. Inaso', panca ninano'. Ninihui, Cara, inapita ninanoro'sa huáncana ya'huérin.

13-14 Misraimo shinpitaso': Notoro'sa', anamoro'sa', niapiro'sa', napotoro'sa', patrosoro'sa', casonoro'sa', capotoro'sa', inapita. Capotoro'sa quëran huiristino'sa pipipi.

15 Canaanso', paninan hui'nahuanpachina, Siton itérin. Ina quëran hui'nahuaantahuachina, Iti, itérin. **16-18** Canaan shinpitanta isopita: Quiposoro'sa', amororo'sa', quiriquiro'sa', iporo'sa', arasiro'sa', siniro'sa', arapatiro'sa', simariro'sa', amatiro'sa', inapita. Ina piquëran Canaan huëntono'sa niquë niquë yanquëëpi.

19 Canano'sa no'pa' hua'anëntopiso', Quiraro parti huarë' icanin. Siton ninano quëraonta', Casa ninanoquë huarë' icanin. Naporahuaton, Sotoma, Comora, Atoma, Sipoin, inapita ninanoro'sataquëchin no'pa' mapi. Nasa ninanoquë huarë' no'pa' hua'anëntopi. **20** Ina nápo Camo hui'ninpita, shinpita inapita ya'huëpi. A'naya a'naya nacionënaquë, a'na huënton a'na huënton, nisha nisha ya'huëpi. Inahuara no'panënaquë ya'huëpi. Naporahuatona', inahuara nonpiso nananquë nonatona', ya'huëpi.

21 Cahuito iin mashonënso', Simo itopi. Inanta', hui'ninpita ya'huëtérin: Ipiri hui'ninpitaso', Simo shinpita nipi. **22** Simo hui'ninpita isopita ya'huëpi: Iramo, Asoro, Arapasato, Noto, Aramo, inapita. **23** Aramonta hui'ninpita isopita ya'huëpi: Osi, Ori, Quitiri, Masi, inapita. **24** Arapasatonta', Saro pa'pin. Saronta', Ipiri pa'pin. **25** Ina quëran

Ipirinta cato hui'ninpita ya'huëtérin: A'naso', Piriqui itopi. Naporo tahuëri'sa piyapi'sa itohua itohua yanquéëpi ni'ton, ina pochin ninihuanin. Iya'huainta Cotano itopi. ²⁶⁻²⁹ Cotanoso', iso nápo hui'ninpita ya'huëtérin: Aromota, Siripi, Asaromapi, Quira, Atorambo, Osaro, Tiquira, Oparo, Apimairo, Sipa, Opiro, Apira, Copa, inapita. ³⁰ Inapitaso Misa parti ya'huërahuatona', Sipari parti huarë' ya'huëpi. Ina partiso', motopiro'saráchin niconin. Cortanii' quëran, pi'i pipirinso parti ya'huërin. ³¹ Ina nápo Simo hui'ninpita, shinpita, inapita ya'huëpi. A'naya a'naya nacionënaquë, a'na huënton a'na huënton, nisha nisha ya'huëpi. Inahuara no'panënaquë ya'huëpi. Naporahuatona', inahuara nonpiso nananquë nonatona', ya'huëpi.

³² Ina nápo Noi hui'ninpita quëran pipipi. Nisha nisha huënton nipesopita. Nisha nisha shimashonëna quëran pipitona', nisha nisha parti no'pa' hua'anëntopi. Pacon pa'ninso piquëran itohua itohua yanquépi. Yanquërahuatona', nisha nisha naciono'sa isoro'paquë ya'huërinso ocoipi.

11

Nisha nisha nananquë Yosëri anoninso'

¹ Pacon piquëran notohuaro' piyapi'sa na'antapi. Naporo' ya'ipiya a'na nananquësáchin nonpi. ² Pi'i pipirinso parti quëran pipirahuatona', Sinaro parti canquipi. Inaso no'pa', noyápiro'tëchin ni'ton, inaquë ya'huëcaiso marë' quëparitopi.

³ A'na tahuëri inahua capini ninontatona', napopi: "Huëco pa'ahua', natëricho no'pa quëran nicatehüa', a'pëahua'," nitopi. Ina nisahuatona', natëricho quëran na'pi ya'huërenamën pëipi. Achinpitacaiso marënta', to'ni pochin nininquë achinpitopi. Siminto pochin nininso ya'huërenamën, inaquë achinpitopi. ⁴ Ina quëran ninontaantapi: "Huëco chiniquën cancantatëhua', ninano ocoia'ahua". Ina nisahuatëhua', a'na torinta pi'iro'tëquë huarë' nincaninso niahua'. Inapoatëhua', sacóshin nahuinarihua'. Naporahuaton, co huachi itohua itohua yanquëcaso ya'huaponhuë", nitopi.

⁵ Napopirinahuë', Sinioroso o'marin. O'marahuatón ninano', tori, inapita nisapiso ni'quimarin. ⁶ Ni'quimarahuatón, yonquirin: "Isopitaso inaquësáchin ya'huatona', ina nananquësáchin nonpi ni'ton, nani caniaritopi sacatacaiso'. Po'pachinara, co incari téranta nanitarinhüe atanapitacaso". ⁷ Napoaton acopitacaso marë', pa'matëhua nonpiso anishatahua'. Ama huachi ninatanacaiso marëhuë', napotahua", ténin. ⁸ Inapotaton, Siniorori piyapi'sa itohua itohua ayanquëërin. Ninano nisapisonta a'porahuatona', tananpitopi huachi.

⁹ Inaquë chachin Siniorori, ya'ipi piyapi'sa nonpiso anishatërin. Ina quëran chachin, ya'ipi isoro'paquë ayanquëërin. Napoaton ina ninanoso', Papiri* itopi.

Simo shinpita napopiso'

* **11:9** Papiriso': "Co ninatananpiquëhuë", tapon naporin.

¹⁰ Simo shinpita napopiso sha'huichinquéma'. Pacon pa'ninso piquérان cato pi'ipitapaso', Simo pasa pi'ipitarin. Naporo' a'nara hui'nin nasitérin. Nasitohuachina, Aropasa, itérin.

¹¹ Ina piquérان Simoso', a'natérápo pasa pi'i aquëtë ya'huantarin. A'napita hui'ninpitanta quëmapi'sa', sanapi'sa', ya'huëtérin.

¹² Aropasa cara shonca a'natérápo pi'ipitaso', hui'nin nasitérin. Nasitohuachina, Saro itérin.

¹³ Ina piquérان Aropasaso', catapini pasa cara pi'i aquëtë ya'huantarin. A'napita hui'ninpitanta quëmapi'sa', sanapi'sa', ya'huëtérin.

¹⁴ Saro cara shonca pi'ipitaso', hui'nin nasitérin. Nasitohuachina, Ipiri itérin. ¹⁵ Ina piquérان Saroso', catapini pasa cara pi'i aquëtë ya'huantarin. A'napita hui'ninpitanta quëmapi'sa', sanapi'sa', ya'huëtérin.

¹⁶ Ipiri cara shonca catapini pi'ipitaso', hui'nin nasitérin. Nasitohuachina, Piriqui itérin. ¹⁷ Ina piquérان Ipiriso', catapini pasa cara shonca pi'i aquëtë ya'huantarin. A'napita hui'ninpitanta quëmapi'sa', sanapi'sa', ya'huëtérin.

¹⁸ Piriqui cara shonca pi'ipitaso', hui'nin nasitérin. Nasitohuachina, Nio itérin. ¹⁹ Ina piquérان Piriqui cato pasa iscon pi'i aquëtë ya'huantarin. A'napita hui'ninpitanta quëmapi'sa', sanapi'sa', ya'huëtérin.

²⁰ Nio cara shonca cato pi'ipitaso', hui'nin nasitérin. Nasitohuachina, Siroco itérin.

²¹ Ina piquérان Nioso', cato pasa canchisë pi'i aquëtë ya'huantarin. A'napita hui'ninpitanta quëmapi'sa', sanapi'sa', ya'huëtérin.

22 Siroco cara shonca pi'ipitaso', hui'nin nasitérin. Nasitohuachina, Nacoro itérin.

23 Ina piquérان Sirocoso', cato pasa pi'i aquëtë ya'huantarin. A'napita hui'ninpítanta quëmapi'sa', sanapi'sa', ya'huétérin.

24 Nacoro cato shonca iscon pi'ipitaso', hui'nin nasitérin. Nasitohuachina, Tari itérin. **25** Ina piquérان Nacoroso', pasa shonca iscon pi'i aquëtë ya'huantarin. A'napita hui'ninpítanta quëmapi'sa', sanapi'sa', ya'huétérin.

26 Tari canchisë shonca pi'ipitaso', hui'nin paninatérinso nasitérin. Ina quëran cato hui'ninpita ya'huétaantarin. Hui'ninpítaso': Apran, Nacoro, Aran, inapita.

Tari, naporinso'

27-28 Sha'huitéránquëmaso chachin Tari hui'ninpítaso', isopita: Apran, Nacoro, Aran, inapita. Aran hui'ninso', Noto itopi. Aranso', Orë ninanoquë chiminin. Ina ninanoso', Cartia parti ya'huérin. Co'huara pa'pin chiminyátérashuë', chiminin. Huáhuatérinso ninanoquë chachin naporin. **29** Apranso', Sarai manin. Nacoronta', Mirica manin. Miricaso', Aran hui'nin. Inaso', a'nara caipayain ya'huétérin, Isca itopiso'. **30** Saraiso co hua'huana'pihuë ni'ton, co hua'huanihuë'.

31 Tariso', Orë ninano quëran pipirin. Cartioro'sa ya'huérin quëran pipirahuaton, Canaan parti chinoton, pa'nin. Hui'nin Apran itopiso Sarairë chachin quëparin. Naporahuaton, shionta Noto itopiso quëparin. Pa'sapirinahuë', Aran ni-nanoquë canconpachinara, inaquë quëparitonpi.

32 Inaquë ya'huëasoi', Tariso chiminin. Cato pasa a'natérápo pi'ipitaso chiminin huachi.

12

*Piyapinënpita shimashonën nicacaso marë'
Yosëri Apran acorinsö'*

1 A'na tahuëri Siniorori Apran itapon: "Ya'huëran quëran pipimiatëquë". Quëmopinënpita, tataparin ya'huërinso no'pa', inapita patëquë'. A'na no'pa' carinquën a'notaranquën. Inaquë ya'huëconquë huachi. **2** A'na tahuëri ca nohuanto, shiparinpita panca nacion ocoiapona'. Caringuën catahuamia taranquën. Inapotaranquën ni'ton, sacóshin nahuinaran. Naporahuaton, quëmá quëran a'napitanta catahuararahuë. **3** Inpitasona noya nicatënën catahuahuachinëن, carinta inapita inapotarahuë. Inpitasona co huachi noya ya'huëcamaso marëhuë' sha'huitohuachinëن, carinta inapita napotarahuë. Quëmá quëran, ya'ipi piyapi'sa nisha nisha nipesopita catahuararahuë," itérin.

4-6 Apranso Yosëri sha'huitérinso chachin, Aran ninano quëran pipirin. Canaan parti paacaiso marë' pipirin. Canchisë shonca a'natérápo pi'ipitaso napoarin. Sa'inë chachin pa'nin. Sa'insö', Sarai itopi. Apin Noto itopisonta', quëparin. Ya'ipi ma'shanënapitarë chachin pa'pi. Piyapinënapitanta quëmapi'sa', sanapi'sa asacatacaiso marë' Aranquë pa'anpiso', quëpapi. Ya'ipi quiquipi. Canaan parti canconpachinara, Apranso piyapinënpitarë chachin ya'ipi ina no'pa' pa'tatona', pëntontopi. Siquimo ninanoquë huarë' canconpi. Inaquë panca insina nara

ya'huërin. Ya'huëhuano'sa mamanshinëna moshapiquë ni'ton: "Mori insina," itopi. Ina parti naporo canano'sa ya'huëapi. ⁷ Inaquë Siniorori, Apran ya'notahuaton, itérin: "Ya'ipi iso no'pa', shiparinpita quëtarahuë hua'anëntapona'," itérin. Naporo chachin Apran Sinioro chinotacaso marë' a'nara artaro ninin. Inaquë ya'notérin ni'ton, chinotérin.

⁸ Ina quëran motopiro'sa parti pa'pi. Ina motopiro'saso', Pitiri ninano quëran, pi'i pipirinso parti quëparitérin. Inaquë në'métë pëiro'sa otënpi ya'huëcaiso marë'. Pitiri ninanoso', pi'i ya'coninso parti acorahuatona', Ai ninanonta', pi'i pipirinso parti acopi. Ina huancánachin ya'huëipi. Inaquë naquëranchin Apran Sinioro chinotacaso marë' a'na ya'huërë' artaro niantarin. ⁹ Ina piquëran Apran piyapinënpitarë chachin paantapi. Os-haquëran pa'sápatona', Niquipi parti canconpi.

Apran Iquipitoquë pa'ninso'

¹⁰ Naporo tahuëri'sa ina parti panca tanarotopi. Napoaton Apran piyapinënpitarë chachin Iquipito parti yacapatacaiso marë' pa'pi. Ya'huëpiquë co manta capacaiso ya'huërinhuë' ni'ton, inatohua pa'pi. ¹¹ Iquipito no'paqué ya'caritohuachina Apranso', Sarai itapon: "Ni'quë', quëmaso tëhuëñchachin noyápiroyanchinquën. ¹² Iquipitoro'sa ni'pachinën noyaponën nimara: 'Isoso quëmapi, paso sanapi so'in,' ta'tona', caso tëpaponaco. Quëmaso nipirinhuë', macainëñquënso marë' co tëpaponënhuë'. ¹³ Napoaton ama quëma na'in

quëran tēpainacoso marëhuë': 'Isoso yo'yohuë,' tēquë', topirahuë," itérin.

¹⁴ Iquipito no'paquë Apran camahuachina, Iquipitoro'saso Sarai ni'sahuatona', pa'yatopi: "Ma noyápiroyanchincha paya," topi. ¹⁵ Iquipito copirnoso', "huaraon" itopi. Ina catahuapisopita hua'ano'santa', Sarai ni'pi. Ni'sahuatona', noyápiroyanchin nininso hua'anëna sha'huitonpi. Natanahuaton huaraonso": "Quëshico," ténin. Napoaton Saraiso', ina pëinënqué quëpapi. ¹⁶ Sarai marë' huaraonso', Apran pa'pi payarin. Nani ma'sha topinan quëtérin. Ohuicaro'sa', ohuacaro'sa', camiyoro'sa', moraro'sa', inapita quëtérin. Naporahuaton piyapinënpita camaicaso marë' quëmapi'sa', sanapi'sa', quëtérin.

¹⁷ Napoaponahuë', Sarai na'inin ni'ton, Yosëri huaraon ana'intérin. Sa'in, hui'ninpitarë chachin chiníquën canio quëran ana'intérin. ¹⁸ Napoaton Apran amataton, itapon: "¿Onpoatonta napotéranco? ¡Iso sanapi sa'an nimirinhue', sha'huichitonco pora!" ¹⁹ 'Oshihuë' ténanso marë', cari shimanahuë. ¡Ma'tana sa'an, macaton quëpaquë huachi!" itérin. ²⁰ Napotahuaton piyapinënpita camairin: "¡Apran, sa'inë chachin ocoico pa'in. Ma'shanënpitanta quëpa'in!" itérin.

13

Apran, Notorë' nia'popiso'

¹ Apranso sa'inë chachin Iquipito quëran pipirin. Ma'shanënpitarë chachin Niquipi parti huënantatona ya'huëinantapi. Apin Noto itopisonta', inarë chachin huënantarin. ² Apranso',

notohuar'o' oro, prata, pë'tahuar'o'sa', inapita ya'huëtaton pa'pi ma'huan. ³ Niquipi parti quëran oshaquëran pa'sápatona', Pitiri ninanoquë huarë' huënantapi. Ina quëran paantarahuatona', i'hua ya'huërinquë chachin ya'huëinantapi. Pitiri ninano', Ai ninano', inapita ninanoro'sa huáncana ya'huëinantapi. ⁴ I'hua artaro nininquë chachin, Siniro chinotaantarin. ⁵ Notonta', apin pochachin pa'pi ma'huan. Notohuaro' ohuicaro'sa', ohuacaro'sa', inapita ya'huëtérin. Piyapinënpitanta na'a ya'huëtérin. ⁶ Nipirinhue', notohuar'o' pë'tahua ya'huëtopi ni'ton, co huachi pasto nanirinhue' pë'tahuar'o'sa capacaiso'. Napoaton co huachi nanitopihuë cato chachin inaquéráchin ya'huëcaiso'. ⁷ Apran pë'tahuanën a'paipisopita, Noto pë'tahuanën a'paipisopitarë', pasto niapiratatona yánino'huipi. Naporoso', canano'sa', huirisiro'sa', inapitanta inaquë chachin ya'huërapi.

⁸ Napoaton a'na tahuëri Aprani Noto itapon: "Canposo', quëmopinpo ninë'. Co canpo capini nino'huicaso ya'huërinhue'. Co piyapinënpopitanta', nino'huicaso ya'huërinhue'. ⁹ Niquë niquë nipachin, ya'huëa'a. Ni'quë'. No'paso panca ya'huërin. Insëquësona ya'huëcamaso mare' nohuantëranquë, quëma huayonquë'. Pë'natë parti huayonpatan, caso pëtëtë parti pa'sarahuë. Pëtëtë parti huayonpatan, caso pë'natë parti pa'sarahuë," itérin. ¹⁰ Natanaahuaton Notoso', motopia'hua quëran, Cortanii' yonsan noyarotomarinso nocorin. Sohuaro ninanoa'huaquë huarë' notérinso' icanin. Inaquëso', notohuar'o' i'

ya'huërin ni'ton, pa'pi noyaro'pa' ninin. Sinioro sha'térinqué pochin ni'ton, Iquipito no'pa' pochin ninin. (Ina pochin iráca ina no'pa' nimirinhue', co'huara Siniorori Sotoma, Comora, inapita ninanoro'sa ata'huanchátérasohue', naporin.)

11 Ina ni'sahuaton, Notoso ya'ipi ina no'pa' huayonin. Inaso no'pa', pi'i pipirinso parti ya'huërin. Inapoatona', Apran Notorë' nia'popi.

12 Apranso', Canaan parti quéparitérin. Notoso', Cortanii' yonsan ninanoro'sa parti ya'huëconin. Sotoma ya'cariya ya'huëconin.

13 Inaquëso', ya'huëhuano'sa pa'pi co noyahuë' nipi. Inapoatona oshahuanpi ni'ton, Yosëri no'huípiro ni'nin.

14 Noto pa'pachina, Siniorori Apran ya'notaton itapon: "Huaniran quèran ya'ipi parti notetéquë: Pë'natë parti, pëtëtë parti, pi'i pipirinso parti, pi'i ya'coninso parti, ya'ipi inaquëpita noteton, noya ni'quë". **15** Ya'ipi no'pa' ni'nanso', carinquen hua'anëntacaso marë' quétaranquen. Quëmari hua'anëntomiataran. Naporahuaton, shiparinpitarinta hua'anëntomiatapona'.

16 Ca nohuanto shiparinpita pa'pi notohuar'o na'amiatapona'. Mo'shi co pichicasohue' ninin. Inapochachin shiparinpitanta co onpo pichicasohue' na'apona'. **17** Iporaso', paaton ya'ipi iso no'pa' pa'tëquë'. Itohua itohua pa'tëquë'. Carinquen quétaranquen ni'ton, inapotéquë", itérin.

18 Ina natanahuaton, Apranso piyapinënpitarë chachin né'mëtë pëiro'sa ótënpiso mapi. Masahuatona', insina nararoquë pa'pi. Inaquë pa'sahuatona', ya'huëconpi huachi. Ina nararoso', Mamiri itopisoari hua'anëntérin. Ipron ninano

ya'cariya inaso'. Inaquë Apran Sinioro chinotacaso marë' a'na artaro niantarin.

14

Aprani Noto nicha'érinso'

¹ Naporo' Misopotamia parti: Sinaro ro'tëquë, Amarahuiro itopiso' copirno nisarin. Irasaro ro'tëquënta', Arioco itopiso copirno nisarin. Iran ro'tëquëso nipurinhue', Quitaraomiro itopiso copirno nisarin. Coimo ro'tëquënta', Titaro itopiso copirno nisarin. ²⁻³ Inapitaso', isopita a'natérápo copirnoro'sarë', niinimicotatona niahuerápi: Pira, Pirsa, Sinapo, Simipiri, inapita itopisoarë' niahuerápi. Piraso', Sotoma ninano copirno. Pirsanta Comora ninano copirno. Sinaposo nipurinhue', Atoma ninano copirno. Simipirinta Sipoin ninano copirno. Pira ninanoa'huá copirnonta', inapita catahuarin. (Pira ninanoa'huaso', Soaro itopi anta'.) Inapitarë', a'natérápo copirnoro'sa', Sitin motopiana itopiquë, sontaronënapita yontonpi ahuétacaiso marë'. Inaso motopiana, Chimirii' marë parti quëparitérin. ⁴ Ina nápo copirnoro'sa chachin Quitaraomirori iráca canaton, shonca cato pi'ipi camairin. Napoaponahuë', ina pi'i niantarinquë a'natérápo copirnoro'saso napopináchin yonquiatona', Quitaraomiro yaahuëpi huachi. ⁵ Ina pi'i huëantarinquë Quitaraomiroso', cara copirno catahuarinso-pitarë chachin, huëantarín. Asotaroto Carnain parti huë'sahuatona', nihuaimoro'sa canaipi. Ina quëran sosiro'sa ya'huerë', An ninanoquë

ya'huëpisopita canaantapi. Imiro'santa', Sapiquiritain ninanoquë canaantapi. ⁶ Orioro'santa Sëir motopiro'saquë canatona', Ir-paran ninanoquë huarë' imapi. Ina ninanos', inotëro intonquë ya'huërin. ⁷ Quitaraomiroso cara copirno catahuarinsopitarë chachin tahuëréantarahuatona', In-mispa ninanoquë canquipi. Ina ninanos', Catisë itopi anta'. Huëantapona pochin amaricoro'sa ya'huërinso parti tiquitëriapi. Naporahuaton amororo'santa', Asison-tamarquë ya'huëpisopita inapotopi.

⁸⁻⁹ Naporiatona', Sitin motopianaquë canquipi huachi. Naporo' Sotoma, Comora, Atoma, Sipoin, Pira, inapita ninanoro'sa copirnonënaso', inaquë pa'mapi. Sontaronënapitarë chachin pa'mapi. Inaquë inapita a'natérápo copirnoro'saso', Quitaraomiro, catahuarinsopita, inapitarë' niahuëpi huachi. ¹⁰ Ya'ipi Sitin motopianaquë, notohuaro' to'ni pochin nininso' posoro'sa ya'huërin. Naporo' quira nipachinara, Sotoma, Comora, inapita copirnoro'sa', piyapinënapitarë chachin ta'api. Ta'apirinahuë', ina posoro'saquë anotopi. A'napita cara copirnoro'saso nimirinhue', motopiro'sa ta'atopi.

¹¹ Canatoro'saso', Sotoma, Comora inapita ninanoro'saquë ya'conpi. Inaquë ya'conatona', cosharo', ma'sharo'sa pa'ton nininsopita, inapita ya'ipi macatona quiquipi. ¹² Sotomaquë, Apran apin Notonta', ya'huërin ni'ton, inanta quëpapi. Ya'ipi ma'shanënpitarë chachin quëpapi. ¹³ Napoaponahue', a'nara quira quëran cha'ërahuaton, Apran sha'huitapon pa'nin.

(Apranso', iprio* piyapi itopi.) Naporo' inaso', Mamiriri hua'anéntérinso insina nararoquë ya'huérarin. Mamiriso', amoro piyapi. Iin mashonénpitaso': Aniri, Iscoro, inapita. Inapitaso' Apran payatona', catahuapi.

14 Apranso apin quëpapiso natantahuaton, piyapinénpita natétono'sa nipiso huayonin.

Inapitaso', pëinéñquë chachin hua'huatatona so'sopiso'. Ayontonpachina, cara pasa shonca posa quëmapi'sa ya'ipiya quëran icanpi. Inapitaré', Apran pa'nin copirnoro'sa imacaso maré'. Tano ninanoa'huaquë huarë' imarin.

15 Pa'sahuatona', inimicoro'sa quënanconpi. Yono tashi nisahuaso', ya'copirahuatona', ahuëpi. Copirnoro'sa canarahuatona', imapi. Opa ninanoquë huarë' imapi. Ina ninanoso', Tamasco ninano quëran norti parti quëparitérin.

16 Inapoatona', ya'ipi ma'sha quëpapiso' matopi. Notonta nicha'ërahuatona', ya'ipi ma'shanénpitanta quëpatopiso', mataantarín. Naporahuaton, na'a piyapiro'sa nicha'érin. Sanapi'santa quëparapirinahuë', nicha'érin.

Miriquisori Apran nacapirinso'

17 Apranso' Quitaraomiro canarin. Cara copirno catahuarinopitarë chachin canarin. Inapita canarahuaton huënantarin. Huëntaso', Sotoma copirnori nacapirin. Sapi motopianaquë nacapirin. Inaso', "copirno motopiana," itopi anta'. **18** A'na copirnorinta', Apran nacapirin.

* **14:13** Iprioso': Nisha nisha tapona ina pochin nohuitopi. Co nitotérëhuahuë' ma'chachinsona tapon napopiso'. A'naquëns': "Ipiri shinpita ni'ton, napo nohuitopi," topi.

Inaso', Miriquiso itopi. Sarimoquë copirno ya'conahuaton, corto hua'an nimantarin. Yosë chini chiníquën nanantérinso marë' sacatérin. Inaso Apran a'carahuaton, huinonta o'shitérin. Piyapinënpitanta', a'carin, o'shitérin, napotérin. ¹⁹ Nani a'carahuaton, Miriquisori Apran iso pochin sha'huitérin:

“Yosë chini chiníquën nanantérinso', catahuain-quën.

Inaso', pi'iro'të', isoro'pa', inapita acorin.

²⁰ ¡Ma noyacha Yosëso chini chiníquën nanantérin paya! itahua'.

Ina nohuanton, inimiconënpita minsëran,” itérin.

Naporo Aprani inimicoro'sa ma'sha matérinso', shonca quëran a'nara Miriquiso quëtérin. Inaso', diesmo itopi.

²¹ Ina piquëran Sotoma copirnori, Apran itapon:
—Piyapi'sara' quëtoco, ya'huërë' ma'shasso', quëmari maquë', itérin. ²²⁻²³ Napotopirinhue', Apraniso' itapon:

—Yosë chini chiníquën nanantaton, pi'iro'të', isoro'pa', inapita acorin. Ina ni'sárinco ni'ton, co pi'shi téranta', co sapatë nonin téranta caora marë' macapohue': “Cari, Apran ama'huanahuë.” Ama tēcamaso marëhuë', co macapohue'. ²⁴ Caso caora marë' co manta nohuantérahuë'. Piyapinëhuëpita ca'pisoíchin tēhuëñchinso', nani matatë pochin nitéranchuë'. Naporahuaton, Aniri, Iscoro, Mamiri, inapitanta ahuëta'huaso', catahuarinaco. Inapita tēhuëñchinso' ma'sha mapiso', onpopionta macacaiso ya'huërin, itérin.

15

Yosë, Apranë anoyatérindo'

¹ Ina piquëran Siniorori, Apran ya'notérin. Co huë'éponahuë', hua'narëso pochin nontérindo' natanin:

—Apran, ama të'huaquësohuë', carinquën pa'poyaranquën. Panca acanamiataranquën, itérin. ²⁻³ Napotopirinhuë', Apraniso' itapon:

—Sinioro. Quëmaso Yosënquën. Panca acanamiatopirancohuënta', co hui'nahuë ya'huëtérincohuë' ni'ton, topinan quëran nisarin. Co a'naya téranta hui'nahuë quëtérancihuë ni'ton, piyapinéhuë Irisëro itéraiso ya'huërtaponco. Inaso Tamasco piyapi nimirinhuë', chiminpato ya'huërtaponco, itérin. ⁴ Siniororiso nimirinhuë', itapon:

—Co ina ya'huërtaponquënhuë'. Hui'nan chachin ya'huërtaponquën, itérin.

⁵ Itahuaton, në'mëtë pëinën quëran ocoirin. Ocoirahuaton, sha'huitérin:

—Pi'iro'të në'përahuaton, tayloraro'sa pichiquë'. Nanitohuatan pichiquë'. Ina nápo shiparinpita ya'huëtarinquën, itérin. ⁶ Naporinso natanahuaton: “Yosë no'tequën nontérinco,” ténin Apran. Naporinso marë' Siniorori nóya ni'nin huachi.

⁷ Napoaton itapon:

—Caso Sinioroco. Orë ninano quëran ocoiranquën. Inaquëso cartiaro'sa ya'huërin. Iso no'pa' quëtarinquën hua'anëntomiatacaso marë', itérin.

⁸ —¿Onporahuatota hua'anëntomiata'huaso nito-tapo? ténin Apran.

⁹ —A'nara ohuaca', a'nara capra, a'nara carniro, inapita cara pi'ipitopiso' quëshico. Naporahuaton, a'nara nëpë', a'nara pë'tahua nëpëa'hua', inapitanta quëshico, itërin Yosëri. ¹⁰ Aprani, inapita ma'sharo'sa Yosë quëshirin. Tëparahuaton huancánachin nichatéra'piarin. Nichatérinsopita, cato panshinquë ya'carísha acorahuaton, anotëra'piarin. Inairaro'saso nimirinhue', co nichatérinhue'. ¹¹ Ma'sha tëparinsopita, capita marë' tamëro'sa o'mapirinahuë', Apraniso a'parárin.

¹² Nani tashiahuachina, Apranso' noyá huë'etérin. A'nanaya pa'pi tashirori imotérin ni'ton, tē'huatérin. ¹³ Naporo' Siniorori itapon:

—A'na tahuëri shiparinpita, nisharo'sataquë yacapatapona'. Inaquë piyapitatoná', camaiyapona'. Aparisitapona'. Catapini pasa pi'i inapoapona'. ¹⁴ Cariso nimirinhue', aparisitérinsopita ana'intarahuë. Ina piquëran shiparinpita, noya cha'ëpona'. Ma'huano'sa pipipona'. ¹⁵ Quëmaso nimirinhue', noyá mashoya nicama huarë' chiminapon. Co parisitaranhue'. Inapoaton shimashtonënpita quënancoanan. ¹⁶ Catapini shinpita huënton, ya'huërin piquëran, shiparinpita isëquë chachin huëntapona'. Amororo'sa co noyahue' nipiso', co aquëtë huarë' nishátérarinhuë'. Napoaton naporo tahuëri'sa huarë' ana'intarahuë huachi.

¹⁷ Nani tashihuachina, a'nanaya orno conai' tomontárinso ya'norin. Naporahuaton, panca yanatëtë pochin pën orótahuaton, ma'sharo'sa nichatérinsopita huáncana, na'huërin. ¹⁸ Naporo

tahuëri chachin, Sinioro Apranë anoyatërin. Anoyataton itapon:

—Shiparinpita iso no'pa' quëtarahuë: Iquipito i' quëran huarë' Iopiratisii' pancai'pa', hua'anëntopiso naniarin. ¹⁹⁻²¹ Iporaso': Quiniro'sa', sinisëro'sa', catomono'sa', itiro'sa', huirisëro'sa', nihuaimoro'sa', amororo'sa', canano'sa', quiriquiro'sa', quiposoro'sa', inapitari iso no'pa' hua'anëntapi. Hua'anëntapirinahuë', quëma shiparinpita quëtarahuë, itërin.

16

Ismairo nasitërinso'

¹ Sarai co hua'huana'pihuë ni'ton, co Apran hui'nahaninhuë'. Napoaponahuë', Saraiso a'nara cosonanën ya'huëtërin. Inaso iquipitoron. Acara itopi. ² A'na tahuëri Saraiso', so'in itapon:

—Ni'quëchi, Sinioro co nohuantërinhuë ni'ton, co hua'huanahuë'. Napoaponahuë', cosonanëhuë acoanchinquën topirahuë. Tapona inaso', hua'huana'pi nisápirinhuë'. Hua'huanpachin cari masarahuë hua'huahuë pochachin nicacaso marë', itërin.

Napotohuachina, Apranta nohuantërin. ³ Naporo chachin Saraiso', Acara masahuaton, so'in acoantërin. Nani shonca pi'ipi Canaan parti ya'huapona pochin, napoapi. ⁴ Shiarahuaton Acaraso', cayorin huachi. Inaporahuaton, hua'anën nocanin. Nocanaton, co yanatërinhuë'. ⁵ Naporo' Sarairi Apran itapon:

—Quëma têhuëran ni'ton, Acara nocaninco. Cari chachin acoantopiranquënhuë', iporaso' hua'huanaton, nocaninco huachi. Sinioro

chachin inquënposona tēhuérëso' anitochinpo': Quëma tēhuëmaranquën, ca a'na napomaraco, itérin. ⁶ Napotohuachina, Apraniso' itapon:

—Ni'qué', cosonanënso', natëinquënsa ya'huérin. Ma'sona nohuantéranso' nitëqué', itérin.

Naporo quëran huarë' Saraiso', Acara pa'pi aparisitérin. Napoaton, inaso ta'arin huachi. ⁷ Ta'apirihuë', Sinioro anquëninëni* inotëro parti quënanin. Shor iraquë i'sha pipirinso' ya'cari', quënanin. ⁸ Quënanahuaton, natanin:

—Quëmaso' Acaranquën, nohuitéranso'. Sarai cosonanënquën. ¿Intoparanta huëcaton, intopata pa'saran? itérin.

—Patronanëhuë Sarai itopiso' ta'anapriarahuë, ténin Acara. ⁹ Naporo' Sinioro anquëninëni, itapon:

—Naquëranchin patronanën paapantaquë'. Ma'sona camairinquënsopita, natëqué', itérin. ¹⁰ Napotahuaton itaantarín:

“Ca nohuanto, hua'huayatérahuë amiparinpita ya'huëtarinquëns.

Co pichicasohuë' na'apona'.

¹¹ Ipora cayoranso', quëmapia'huaya huaiyaran. Huaihuatan, Ismairo itéquë'.

Co napión ancantaton na'néranso',

Sinioro nataninquëns ni'ton, ina nininëni acotëqué'.

¹² Mashotohuachin, tanan cahuario pa'pi notéraya pochin nisarin.

Ya'ipiya inimicotarin. Inanta', ya'ipiya quëran, inimicotapona'.

Quëmopinënpitari co quë'yapirinahuë', inahua notënanquë chachin ya'huapon,” itérin.

* ^{16:7} Sinioro anquëninëni topachina: Yosë chachin tapon naporin.

13 Siniōrori nontérin ni'ton, Acaraso' pa'yanénquē tapon: “¿Yosë chachin nontaporahuë co chiminahuë ti?” tēnin. Ina yonquiaton, iso pochin Siniōro nohuitérin: “Nicatonco, catahuarincoso Yosë,” itérin. **14** Napoaton inaqué poso ya'huérinsonta', “Nanpiton, ni'sárinco' posonén,” itopi. Ina pososo', Catisë ninano', Piriti ninano', inapita ninanoro'sari ahuancanapirin. **15-16** Acaraso' anquëni natérahuaton, patronanénquē chachin paantarin. Tahuëri nanihuachina huairin. Apran posa shonca saota pi'ipitaso', hui'nin nasitarin. Nasitohuachina, Ismairo itérin.

17

Marca niacotacaiso' camaitérinso'

1 Apran iscon shonca iscon pi'ipitaso', Siniōrori ya'notahuaton, itapon:

—Caso Yosëco, ya'ipi nanitaparahuë. Natétonco, nohuantérahuësoráchin niqué'. **2** Napohuatan, quëmarë'co anoyatarahuë. Ca nohuanto, hua'huayátérahuë shiparinpita ya'huëtarinquén, itérin. **3** Naporor' Apranso', isonin. Isonin quëran, no'paqué huarë' monshomarin. Inapoaso Yosëri sha'huitaantarín:

4 —Ni'qué', iso pochin quëmarë'co anoyatarahuë. Quémá quëran na'a naciono'sa pipiarin. **5** Naporahuaton, co huachi Apran itaponénhuë'. Ipora quëran huarë' Apraan itaponén. Ca nohuanto na'a naciono'sa quémá quëran pipipona ni'ton, ina pochin nohuitaponén. **6** Carinquén catahuanquén ni'ton, notohuaro' shiparinpita ya'huëtarinquén.

A'naquën shiparinpita, copirno ya'conapona'. A'naquëonta', naciono'sa ocoiapona'. ⁷ Quëmarë'co ipora nani anoyatérahuë. Shiparinpitarë'conta a'na tahuëri anoyatarahuë. Yosënëncö ni'to, catahuaráponquën. Shiparinpitanta inapotápo. ⁸ Ya'ipi Canaan no'pa' ipora ya'huëranquë, hua'anëntacaso marë' quëtaranquën. Shiparinpitanta iso no'pa chachin hua'anëntomiatapona'. Inapitanta', casáchin chinotaponaco, itérin.

⁹ Napotahuaton, taantarin:

—Napoaponahuë', quëmarë'coso nani anoyatérahuë ni'ton, natëco. Inapochachin shiparinpitanta natëinaco. ¹⁰ Ina pochin canpitare'co anoyatérahuë. Canpitanta anoyatéréhuaso yonquicamaso marë' ya'ipi quëmapinquëma', marcahuanamaso ya'huërin. Naporahuaton, ya'ipi shiparimapitanta inachachin natëina'. ¹¹ Taparonëmaquë, sha'huéchin imorayatérinso', niyashítetoco'. Inaporamaso', ayonquiarinquëma carë'quëma anoyatéremaso'. ¹² Ipora quëran huarë' ya'ipi quëmapinquëma ninamasopita, nasitérin quëran posa tahuëritapaso', marcanëñ acotoco'. Hui'namanta', inapotoco'. Piyapinëma nisharo'sa pa'antéramasonta inapotoco'. ¹³ Ya'ipinquëma niacotacaso ya'huërin. Co a'naya téranta topinan nicamaso ya'huërinhuë'. Inapohuatama', canpitare'co anoyatérahuëso', nonëmaquë chachin chiminamaquë huarë' ya'huëápon. ¹⁴ Nipirinhue', insosona co marcanëñ niacotohuachinhue', ya'huërama quëran ocoimiatoco'. Canpitare'co anoyatérahuëso', co natérinhuë ni'ton, inapotoco', itérin.

15 Naporo chachin, Yosëri Apraan itaantarin:
 —Sa'aonta' Sarai itopiramahuë', co huachi
 inapochin nohuitaramahuë'. Ipora quërán
 huarë' Sara* itapoma'. **16** Inanta noya nicato
 catastuararahuë ni'ton, hua'huanarin huachi.
 Tëhuënchachin cari noya nicato inapotarahuë.
 Na'a naciono'sa', ina quërán pipipona'. Ina quërán
 pipipisopita a'naquënso', copirno ya'conapona',
 itérin.

17 Napotohuachina, Apraanso isonin. Isonin
 quërán no'paqué huarë' monshorahuaton
 têhuarin. Tëhuapon pochin yonquirin: “¡Pasa
 pi'ipitohuachinara, co huachi hui'nahuanpihuë'!
 ¡Saranta iscon shonca pi'ipitaton, co huachi
 onporonta nanitérinhue hua'huanacaso!” ténin
 yonquinënqué. **18** Napoaton iso pochin Yosë
 nontérin:

—¡Ma'cha Sinioro sha'huitérancoso chachin Is-
 mairo catastuaranhuë paya! itérin.

19 Yosëriso nipirinhue', itapon:
 —Sa'anqué chachin hui'nahuanaran ta'to,
 napotaranquën. Hui'nan nasitohuachin, Isaco†
 itaran. Quëmarë'co anoyatérahuëso', inanta
 sha'huitarahuë. Sha'huitérahuëso chachin,
 shinpitanta catastuamiatarahuë. **20** Ismairo
 marënta nontérancoso', nani natananquën.
 Inanta catastuaranhuë. Ca nohuanto na'a
 hui'ninpita ya'huëtapon. Ina quërán pipipisopita
 na'amiatapona'. Shonca cato hua'ano'sa
 nicacaiso' hui'nahuanapon. Ina shinpitata quërán
 panca nacion pipipon. **21** Napoaponahuë'

* **17:15** Sarasо': Copirno hui'nin tapon naporin. † **17:19**
 Isacosо': Tëhuarinso' tapon naporin.

quëmaro'co anoyatato sha'huitëranquënsopitaso', Sara hua'huinquën nisarin. A'na pi'i quëran, ipora tahuëri'sa pochin, Isaco nasitapon, itérin. **22** Apraan nontérinso tonitahuaton, Yosëso ina quëran pa'nin huachi.

23 Naporo tahuëri chachin Apraanso', hui'nin Ismairo itérinso marca acotérin. Piyapinënpita pëinënqué chachin nasitopisonta', inapotérin. A'napitanta coriquinën quëran pa'aninso', acotérin. Ya'ipi quëmapi'sa Apraan pëinënqué ya'huëpisopita, marca niacotopi huachi. Yosë camaitérinso chachin nipi. **24-25** Apraan iscon shonca iscon pi'ipitaso', taparonën sha'huëchin yashitëtopi. Ismaironta shonca cara pi'ipitaso', inapotopi. **26-27** Naporo tahuëri chachin ya'ipi quëmapi'sa nipsisopita marca niacotopi. Apraan, Ismairo, inapita niacotopi. Piyapinënpitanta inapopi. A'naquën pëinënqué chachin nasitopi. A'naquënso', coriquinën quëran nisharo'sa pa'antérin. Ya'ipiya niacotopi huachi.

18

Sara hua'huanacaso sha'huitërinso'

1 Insina nararo', Mamiriri hua'anëntérinquë Apraan ya'huëarin. Inaqueë niso', Siniorori, ya'notaantarín. Camotëchin pochin nisapaso' ya'notérin. Në'mëtë pëinën ya'coananënqué huënsaso', napoarin. **2-3** Apraanso ni'pirinhüë', cara quëmapi ina notënanquë huaniapi quënanin. Quënanahuaton, a'naroáchin paaparin nontacaso marë'. Isonin quëran no'paquë huarë' monshorahuaton, itapon:

—Sinioro, pi'pian yanontëranquën. Ama na'huëtocosohuë'. ⁴ Canpita topatama', nipa'morantëcamaso marë' piyapinëhuë i'sha quëshiinquëma'. Inapoatoma', nara tashinantërinquë, na'yapoma pochin, chinototaco'. ⁵ Ya'huërahuëtaquëchin na'huëarama ni'quëhuarë', ma'sha téranta capamaso quëshiinquëma'. Ina quëran chiníquën cancantatoma', paantamaso marë', itérin.

—Naporan ni'quëhuarë', inta nipachin, itopi.

⁶ Napotohuachinara, Apraanso në'mëtë pëinënqué ya'conahuaton, Sara itapon:

—Manorahuaton, cato shonca quiro pochin, noya noya tricoro'mo nininso' maqué'. Ina masahuaton, pan niquë', itérin. ⁷ Sa'in sha'huitahuaton, ta'arë'nachin ohuacaro'sa ya'huarinquë pa'nin. Noya noya nininso' toroa'hua huayonin. Huayonahuaton, a'nara piyapinën quëtérin. Quëtohuachina, inaso' tëparahuaton a'naroáchin capacaiso marë' anpirin. ⁸ Ina a'capon pochin, ohuaca sho'shoi' atachirotopisonta', acotérin. Naporahuaton ohuaca sho'shoi' o'shitérin. Inapoaton, a'capon pochin ninararin pahuantohuachina acotacaso marë'. Ni'toro'sa nara tashinantërinquë coshatasoi naporin.

⁹ Nani coshatohuachinara, ni'toro'sari Apraan natanpi:

—¿Sa'anpo huachi? itopi.

—Ma'tana në'mëtë pëi acoana ya'huëarin, itérin.
¹⁰ Napor' a'nari itapon:

—A'na pi'i quëran, nicaponquën huëantarahuë. Naporo' Sara hua'huanaton, hua'huin ipoarin huachi, itérin.

Napoasoi Sarasо', ya'ipi nonpiso' natanárin. Apraan pinën quëran, në'mëtë pëi acoana, ya'coana pirayan natanárin. ¹¹ Apraan, Sara, inapitaso nani mashotopi. Sarasо yaniton, co huachi onpo hua'huanchináchinhuë', ninin. ¹² Ina yonquiaton, co huachi huina cacotatonhuë', tëhuarin huachi. Tëhuapon pochin, yonquirin: "Inaporahuë naporini, noya cancanchitohuë'. Napoaponahuë', catocoи chachin nani mashotérai ni'ton, co quiyaso inapoasocoihuë' ayapoi," ténin yonquinënqué.

¹³ Siniororiso nipurinhuë', Apraan itapon:

—¡Sara co tëhuacasohuë nipurinhuë', tëhuarin! "Nani paiyaco" ta'ton, ¿co natëtérinhuë' hua'huanacaso ti? ¹⁴ ¡Caso Sinioroco ni'to, ya'ipi nohuantérahuë'so' nanitaparahuë nica'huaso'! A'na pi'i quëran, nicaponquën huëantarahuë. Naporo' Sara hua'huanaton, hua'huin ipoarin huachi, itérin. ¹⁵ Sinioro naporinso natanaton, të'huanënqué Sarasо tapon:

—Co tëhuarahuë', ténin. Napoaponahuë', Siniorori itapon:

—Napopiranhuë', tëhuaranso' nitotérahuë, itérin.

Sotomaro'sa marë' Yosë nontérinso'

¹⁶ Nani coshatohuachinara, paantacaiso marë' ni'toro'saso' huanipi huachi. Sotoma ninanotaquëchin pa'sahuachinara, Apraani chi'yarin. Nontaton patacaso marë' chi'yarin. ¹⁷⁻¹⁸ Papon pochin, Sinioroso' yonquiraarin.

“Apraan quëran a'na tahuëri panca nacion pipiarin. Naporahuaton ina nacionso', chiníquën nanantarin. Napoaton ma'sona yaninahuëso', sha'huita'huaso ya'huërin. Nani sha'huiterahue ya'ipi naciono'sa isoro'paquë ya'huërinsopita, ina quëran catahua'huaso marë'. ¹⁹ Nani ina huayonahuë hui'ninpita, shinpita, inapita noya pënénacaso marë'. A'chinterahue'sopita natëtona', noya nicacaiso marë' pënénarin. Inapohuachin, sha'huiterahue'so chachin quëtarahuë huachi," tënín yonquiaton. ²⁰ Napoaton, Siniorori itapon:

—Sotomaquë, Comoraquë, inaquëpita ya'huëpisopita, panca oshahuanpi. Inapoatona pa'pi co noyahue' nahuinpi. ²¹ Napoaton inatohua pa'sarahuë. ¿Sha'huiterinacoso chachin ta'ma nisapi? ta'to, nitota'huaso marë' pa'sarahuë.

²² Cato ya'piso quëchitahuatona', Sotoma ninanoquë pa'pi. Apraanso nimirinhue', Siniororë' ninontacaso marë' quëparitërin. ²³ Napoaton ya'carirahuaton, natanin:

—Tëhuëpisopitaso' no'tequën chachin ata'huantamaso ya'huërin. Co tëhuëpisopitasohue' nimirinhue', co inapotamaso ya'huërinhue'. ²⁴ Tapona a'natérápo shonca ya'pi', co tëhuëpisopitasohue' ninanoquë ya'huëpi. Ina nápo ya'huëpiso yonquiaton: ¿Co ninano nicha'ësaranhue'? ²⁵ ¡Ama Sinioro napoquësuhue'! ¡Tëhuëpisopita, co tëhuëpisopitahuë' co napopináchin oshahuanpiso pochin ana'intamaso ya'huërinhue'! ¡Ama napoquësuhue'! ¡Quëmaso', noya noya coisë ya'ipi isoro'pa' marë' ninan ni'ton, no'tequënáchin ana'intamaso ya'huërin!

itérin. ²⁶ Napotohuachina, Siniñorori itapon:

—A'natérápo shonca co tēhuëpisopitahuë', Sotoma ninanoquë ya'huëhuachin, inapita nosoroato ya'ipi ina ninanoquë ya'huëpisopita nicha'ësarahuë, itérin. ²⁷ Apraaniso nimirinhue', naquéranchin nontaantarín:

—Quëmaso Yosënquën, caso topinan piyapico nimirahuë', naquéranchin nontaanta'inquën. Ama ina marë' no'huicosohue'. ²⁸ Catapini shonca a'natérápora' co tēhuëpisopitahuë' nanihuachina', a'natérápo pahuaninso' maréáchin, ¿ya'ipi Sotomaquë ya'huëpisopita, ata'huantapon ti? itérin.

—Catapini shonca a'natérápo téranta co tēhuëpisopitahuë' ya'huëhuachina', co ninano ata'huantarahue', itérin.

²⁹ —Tapona catapini shoncara', co tēhuëpisopitahuë' ya'huëpi, taantarín Apraan.

—Ina napoya téranta ya'huëhuachinaso', co ata'huantarahue', ténin Yosë. ³⁰ Apraaniso nimirinhue', naquéranchin Yosë nontaantarín:

—Inachin inachin nontápiranquënhue', ama ina marë' no'huicosohue' topirahuë. Tapona cara shoncara' ya'huëpi, itérin.

—Cara shoncaya téranta ya'huëhuachina', co ata'huantarahue', itérin.

³¹ —Téhuëñchachin caso Siniñoro co natantonhue pochin nontáranquën. Cato shoncara', co tēhuëpisopitahuë' ya'huëhuachina': ¿Onpoaranta'? itaantarín.

—Cato shoncanta co tēhuëpisopitahuë' ya'huëhuachina', co ninano ata'huantarahue', itérin Yosëri.

32 Apraani naquëranchin nontaantararin:

—Iporaíchin Sinioro nontaantaranquën.

Ina quérän co huachi apiponquënhuë ni'ton, ama no'huicosohuë'. Shoncaíchin co tēhuëpisopitahuë' quënanpatan: ¿Onpoaranta'? itérin. Napotohuachina, Siniyorori itaantararin:

—Shoncaya téranta co tēhuëpisopitahuë' ya'huëhuachina', co ninano ata'huantarahuë'.

33 Apraan nontérinso toquitahuaton, Sinioroso pa'nin huachi. Apraaonta', né'mëtë pëinënqué'pa' panantararin.

19

*Sotomaro'sa', Comoraro'sa', inapita
ata'huantérinso'*

1 Nani yatashirahuaso', cato anquëniro'saso Sotoma ninanoquë camapi. Ninano ya'coanaquë chachin Noto huënsaso', camapi. (Inaqué ya'huëhuano'sa niyontonpi ma'sha yonquiatona anoyatacaiso marë'.) Cato ya'pi canquipiso quënanahuaton, paaparin nontapon. Isonin quérän no'paqué huarë' monshorin. **2** Monshorin quérän itapon:

—Caso siniororo'sa piyapinëma pochinco. Huëco pëinëhuëquë onpopionta huë'ëcamaso nohuantoco'. Inaqué nanitërama nipa'morantëcamaso'. Tashiraya yapa'patama paantaco', itérin. Napotopirinhuë', inapitaso co nohuantopihuë'.

—Naporinchi paya. Napopiranhuë' co nohuantérainihuë'. Caniquë téranta noya huë'ëpoi, itopi. **3** Napotopirinahuë', Notori naquëranchin naquëranchin sha'huitohuachina, napoin quérän

p  in  nque   pa'pi huachi. Canconpachinara, noya cosharo nit  rin. Pan co ahu  pocatopinanhue   anpitaton, inapitar  ' acotohuachina, ni'toro'sa coshatopi huachi.

⁴ Napoaponahu  ', co'huara chinoch  t  rasoihu  ' ya'ipi ya'hu  huano'sari Noto p  in  n tancapitopi. Hui'napiro'sa qu  ran, mashoro'saque   huar  ' yamoipi. ⁵ Noto no'huitona', chin  qu  n nontiipi:

—¡Qu  mapi'sa p  in  nque   canquipiso'! ¿Intopata ya'huapi? ¡Ocoiqu   t  cari'i! itopi. ⁶⁻⁷ Naporor' Notoso' p  in  n noy  a oncotahuaton, inapita nontapon pipirin.

—Ama iyaro'sa napocosohu  ', pa'pi co noyahue  ' yonquirama'. ⁸ Cato hui'nahu  pita nano'sa co qu  mapiri s  'huay  t  rarinsuhue  ', ya'hu  t  rinco. Inapita nipachin ocoichinque  ma', nohuant  ramaso' nitoco'. Isopita qu  mapi'saso nimirinhue  ', ama napotocosohu  '. Cari p  rarahue   p  in  nhe  que   ya'conquipi ni'ton, napotaranque  ma', it  rin. ⁹ Inapitariso nimirinhue  ', itapona':

—¡Po'shaque   qu  maso'! Nisha piyapinqu  n nuponahu  ', ¿yacamairancoi ti? ¡Iporaso huachi inapita qu  ran na'con na'con, qu  ma nitarinque  n! itopi. Napotatona', Noto ahu  rapi. P  in  n ya'coananta', yapaparapitopi huachi. ¹⁰ Napoaponahu  ', ni'toro'sari Noto mapi. Masahuatona', acoana po'mopi. Napotatona', ya'coana oncotaantapi. ¹¹ Naporor' chachin piyapiro'sa aipiran nisapisopita, a'naro  chin asomarayapi huachi. Hui'napiro'sa qu  ran, mashoro'saque   huar  ' ya'ipi somarayapi. Ina nimirinahu   t  ranta', amiai huar  ' ya'coana yon  pi.

12 Naporo' ni'toro'sari, Noto itapona':

—¿Ya'huëtérinquën aquëtë huarë' quëmopiro'sa isëquë? Hui'nanpita quëmapi'sa', sanapi'sa', mi'sëro'sa nicacaiso nipsisopita ya'ipi inapita, iso ninano quëran ocoiquë'. Ocoiaton áquë quëpaquë'.

13 Iso ro'të ata'huantarai ni'ton, quëpaquë'. Iso ninanoquë pa'pi co noyahue' nipsis', na'a piyapi'sari Sinioroquë sha'huirapipi. Napoaton, ata'huanta'huaiso marë' a'parincoi, itopi.

14 Napotohuachinara, Notoso mi'sënpita nica-caiso nipsisopita sha'huitacaso marë' pa'nin:

—¡Manóton huëco pa'ahua'! Iso ninano quëran pipia'ahua'. ¡Siniorori iso ninano ata'huantarín ni'ton, huëco pa'ahua'! itérin. Itopirinhue', co natëpihuë'. **15** Nani tahuëri ya'cari nipachina, an-quëniro'sari Noto itapona':

—¡Pashi têquë! Sa'an, cato hui'nanpita, inapita masahuaton, iso ninano quëran ocoiquë huachi. Ninano ata'huantëraiquë, chimintama'. **16** Napotopirinahuë', Notoso' co manorinhuë' ni'ton, Yosëri nosoroaton, yanicha'ërin. Napoaton anquëniro'sari, sa'inë chachin maimirarin. Hui'ninpitanta maimirarahuatona', ninano quëran cha'ëcaiso marë' ocoipi.

17 Ninano quëran nani pipihuachinara, a'na an-quëniri itapon:

—¡Cha'ëcamaso marë' manóton ta'aco'! Ama pinëma parti tahuërëcosohue'. Pa'mia paco'. Ama ma'sha marë' téranta iso motopianaque' chinicosohue'. Cha'ëcaso nohuantohuatama', motopiro'sa parti ta'aco', itérin. **18-19** Notorisó nipsisopita, itapon:

—¡Co Siniororo'sa topirahuë! Tëhuëñchachin canpitaso', na'con catahuaramaco huachi. Noyanquëma ni'ton, nicha'éramaco. Napoaponahuë', motopiro'sa parti ta'aca'huaso', co nanitarahuë'. Huancopi ni'soi', ayaro' icantatoncoi tiquihuachincói. ²⁰ Ni'co', pasëyáquë a'na ninanoa'huaya ya'huërin. Inaquë tëhuëñchinso' noya pac'a'huaiso' topirahuë. Nohuantoco inaquë pa'i cha'ëca'huaiso marë'. ¿Co'ta inaso', co panca ninanoyahuë'? itérin. ²¹ Napotohuachina a'na anquëniri itapon:

—Nani natananquën nontérancoso'. Nohuantéranso chachin nisarahuë. Co ina ninanoso', ata'huantapohuë'. ²² Napoaponahuë', jmanóton inatohua paco'! Inatohua canama huarë' Sotoma ninano ata'huantarai huachi. Napoaton ina ninanoso', Soaro* itopi. ²³ Nani tahuërihuachina Notoso', Soaro ninanoquë camarin. ²⁴ Naporo' Siniorori, pën o'nan pochin a'paimarin. Sha'pi mo'shirë chachin, a'paimarin. Sotoma, Comora, inapita ninanoro'sa aipi a'paimarin. ²⁵ Inapotaton, ata'huantérin. Ya'ipi inaquë ya'huëpisopitarë chachin ata'huantérin. Ina motopianaque papotérinsopitanta', ya'ipi tiquirin. ²⁶ Noto sa'inso niperinhue', co Soaroquë camarinhuë'. Oshaquëran so'in imaquiáponahuë', pinën parti tahuërehuachina, inaquë chachin yamora moto'taranaton, chiminin.

²⁷ Tashiramiachin Apraanso', i'huara Sinioro nontérintaquëchin pa'nin. ²⁸ Ina quëran, Sotoma, Comora, inapita ninanoro'sa nocorin. Ya'ipi ina motopiananta nocomapirinhue', ina ro'të quëran

* **19:22** Soaroso': Pi'pira'huaya tapon naporin.

pa'pi huëhuëpiro conai pipirarin ni'nin. Panca orno quëran tomontérinso pochin, pipirarin. ²⁹ Ina pochin, ina motopianaquë ninanoro'sa Yosëri ata'huantérin. Noto yacapatérinso parti noyá ata'huantérin. Notoso nimirinhue', co ata'huantérinhuë'. Apraan yonquiaton, cha'ëcaso marë' ina quëran ocoirin.

Moaporo'sa', amono'sa', inapita ya'huërinso'

³⁰ Inapita ninanoro'sa ta'huantopi piquéran, Notoso' tē'huatérin. Tē'huataton, Soaroquë ya'huëcaso co nohuantérinhuë'. Napoaton cato hui'ninpitarë chachin motopiro'sa parti, ya'huëcaiso marë' pa'pi. Inaquë a'na motopi naninquë, cara chachin ya'huëpi. ³¹ A'na tahuëri paya paya nininsoari, caia'huain, itapon:

—Ni'quë caira. Ya'ipi parti sanapi'sa ya'huërinso', so'yatona hua'huanpi. Canposo nimirinhue', isoporinquë quëmapi pahuanin quëran, co inapochináchinhue' ninë'. Tataíchin mini nimirinhue', nani inanta mashotarin. ³² Napoaton, huëquë pa'a o'shitatë tēpaita'a. Inapotatë', hua'huanpo ya'huëtiinposo marë' huë'ëpa'a, itérin.

³³ Naporo tashi chachin pa'pina huino o'shitomiati. Nani ano'pihuachinara, paninanso' pa'pin quëhuënaparin. No'pirahuë ni'ton, co nataninhue' hui'nini quëhuënaparinso'. Co pa'ninsa téranta nataninhue'. ³⁴ Tahuëriantarinquë paninanso', caya'huain itaantapon:

—Ni'quë caira, achin tashi caso tata quëhuënaparahuë. Quëma ya'huëre' quëhuënapacaso marë' ipora tashinta ano'pianta'a.

Inapoatë catonpo chachin tatanpo quëran téranta hua'huasha ya'huëchinpo', itérin. ³⁵ Ninapotatona', naporo tashi naquéranchin pa'pina huino o'shitaantapi. Nani ano'pihuachinara, hua'hua nininso ya'huérë', pa'pin quëhuënaparin. No'pirahuë ni'ton, Notoso' co nataninhuë' hui'nini quëhuënaparinso'. Co pa'ninso téranta', nataninhuë'. ³⁶ Inapoatona', cato chachin cayopi. Pa'pina quëran napopi. ³⁷ Paninanso' huaihuachina, quëmapia'huaya huairin. Inaso', a'shini Moapo† itérin. Iso quirica ninshitasoco huarë', ina ipora moaporo'sa ya'huérinso shimashonëna ninin. ³⁸ Hua'hua nininsonta huaihuachina, quëmapia'huaya chachin ya'huëtérin anta'. Inanta a'shini Pin-amif† itérin. Iso quirica ninshitasoco huarë', ina ipora amono'sa ya'huérinso shimashonëna ninin.

20

Apraan Apimiricorë naporinso'

¹ Apraanso', piyapinënpitarë chachin ya'huëapi quëran pipipi. Pipirahuatona', Niquipi parti paantapi. Quiraro ninanoquë canconahuatona', inaquë ya'huëcaiso marë' quëparitopi. Ina ninanoso', Catisë ninano quëran Shor parti ira pa'ninso' huáncana quëparitérin. ² Apraanso inaquë ya'huapon pochin, Sara sa'in nipirinhuë: "Oshihuë," toconin. Napoaton Quiraro copirno Apimirico itopisori yamanin. Camaitohuachina, macacaso marë' Sara quëpatopi. ³ Napoaponahuë',

† **19:37** Moaposo': Pa'pin quëran ya'huérinso', tapon naporin.

‡ **19:38** Pin-amiso': Piyapinëhuëpita hui'nin tapon naporin.

naporor tashi chachin Yosëri huë'ënqué pënénin: "Quëmaso chiminaran. Sanapi mananso so'yahuan ni'ton, chiminamaso ya'huérin," itérin.

⁴ Apimiricoso', co Sara ichihuë'ëshátérarinhuë'. Napoaton Sinioro itapon: "Sinioro co manta onporahuë ni'ton, co tëpaancoso ya'huérinhue'.

⁵ Co'ta Apraan chachin naporin: 'Oshihuë', ténin. Saranta': 'Yo'yohuë,' ténin. Cato chachin napopi ni'ton, co nitotatohuë manahuë" itérin.

⁶ Napotohuachina, Yosérinta huë'ënqué chachin a'paniantarin: "Tëhuëñchachin co nitotatonhuë' naporan. Napoaton ca nohuanto co ichihuë'ëranhuë'. Carinquen ya'copiranquen ama oshahuanaton têhuëtancoso marëhuë'.

⁷ Iporaso niperinhuë', so'in chachin quëtaantaquë'. Inaso pënéntona'pi ni'ton, quëma marë' nontarinco. Ama chiminamaso marëhuë', nontarinco. Co'so' quëtaantahuatanhuë', sa'an, hui'nampita, inapitarë'quën chachin, ta'huantaran," itérin huë'ënqué.

⁸ Tahuërianpitohuachina, Apimiricoso huënséintarahuaton, piyapinënpita amatérin. Huë'pachinara, ya'ipi hua'narinsø sha'huitérin. Natanahuatona', piyapinënpitaso pa'pi pa'yanpi.

⁹ Ina quëran Apraan amatahuaton, itapon:

—¡Ma'huantacha nitapirancoihuë paya! ¡Caso co maquë têranta têhuëtéränquënhuë! Quëmaso niperinhuë', napotatoncoi panca yaaoshahuanpirancoihuë'. Ca aoshahuanatonco, quëmopinëhuëpita, piyapinëhuëpita, inapita, na'inchitonhuë'. ¡Co naporëhuë'!

¹⁰⁻¹¹ ¿Ma'ta yonquiaton, napotopirancoihuë? itérin. Napotohuachina, Apraan itapon:

—Isëquëso', co manta Yosë natëpihuë'. Sa'ahuë

matiinacoso marë' tēpaponaco caso', ta'to naporahuë. ¹² Naporahuaton Saraso', oshihuë anta'. Ina tataquéranchin nipiрайahuë', mamahuëi quéranso', nisha ninai. Napoaton cari manahuë. ¹³ Yosë chachin, tatahuë ya'huërin quéranso' camaihuachincora, sa'ahuë sha'huitërahuë: "Inséquë téranta pa'nëhuaquë: 'Inaso yo'yo masho,' tēquë ta'a, itérahuë," ténin Apraan.

¹⁴ Ina natanahuaton, Apimiricoso sa'in quétaantarin. Naporahuaton, ohuicaro'sa', ohuacaro'sa', inapita quétérin. Piyapinënpita camaicaso marënta': Quëmapi'sa', sanapi'sa', inapita quétérin. ¹⁵ Ina quétahuaton, itérin:

—Ni'quë iya, no'panëhuëso pancana, inséquëso costaranquë ya'huëquë', itérin. ¹⁶ Saranta', itapon:

—Ni'quë imoya, yo'yo masho huaranca coriqui prata quéranso' ninins'o' quétérahuë. Ya'ipiya quéranso' co tēhuëransohuë' nitotacaiso marë' ina nápo quétarahuë. Co insonta pinoinquëns'o' ya'huërinhuë'. ¹⁷ Ina quéranso' Apraan, Yosë nontérin Apimirico marë'. Ina sa'in, cosonanënpita, inapita marënta', Yosë nontérin. Nontohuachina, Yosëri anoyatérin. Naquéranchin hua'huasha ya'huëtaantacaiso marë' anoyatérin. ¹⁸ Siniorori nani Apimirico ya'huërinquë, sanapi'sa ana'intopirinhuë'. Ama hua'huanacaiso marëhuë', Sara na'in quéranso' napotopirinhuë'. Napoaton Apraani Yosë nontérin inari anoyatacaso marë'. Napohuachina, Yosëri Apimirico sa'in, piyapinënpita sa'ina', inapita anoyatérin. Hua'huasha ya'huëtaantacaiso marë' anoyatérin.

21

Isaco nasitérinso'

¹ Sha'huitérinso chachin, Siniорori Sara catahuarin. ² Ina nohuanton napoin quëran cayorin huachi. Tahuëri nanihuachina, quëmapia'huaya huairin. Inaso', Apraan mashoya nicaquë huarë' hui'nahuaninso hua'huatérin. Yosëri sha'huitérinso tahuëri'sa chachin, hui'nin nasitérin. ³ Sa'inqué chachin hui'nahuaninso nasitohuachina, Isaco itérin. ⁴ Yosë camaitérinso chachin posa tahuëritohuachina, marca acotérin. ⁵ Apraan pasa pi'ipitaso', hui'nin Isaco itérinso', nasitarin. ⁶ Naporo' Sara yonquirin: "Yosë catahuarinco ni'ton, capa cancantato, tēhuarahüë. A'napitanta', hua'huanahuëso nitotohuachina', ya'ipiya quëran capa cancantatona tēhuapona'. ⁷ Co hua'huana'picohuë ni'to, co inso tēranta Apraan nontaton: 'Tēhuenchachin Saraguë hui'nahuanaran,' co ichitonhuë'. Inaso nimirihuë', máshoya níponahuë', hui'nahuanin huachi," ténin.

Acara, Ismairo, inapita Apraani a'parinso'

⁸ Isacoa'huaya oshaquëran so'sohuachina, a'shini a'potérin. A'potérinso tahuëri, capa cancantacaiso marë' Apraan panca pita ninin. ⁹ Capa cancantapirinahuë', Sarasó' co noyahüë cancantérin. Cosona hua'huini Isaco monaton ya'nipitarin ni'nin. ¹⁰ Napoaton Apraan sha'huitérin: "¡Cosonaso', hua'huinë chachin, a'paqué pa'in! Isacoso hua'huahuë chachin ni'ton, co nohuantérahuë' quëma ma'shanënpita cosona hua'huionta quëtacaso'," itérin. ¹¹ Ina natanaton, Apraan panca sëtérin. Hui'nin ni'ton,

sëtëyarin. ¹² Sëtopirinhüë', Yosëri itérin: "Ama hui'napi marë' sëtëquësöhuë'. Co cosonanën marë' téranta sétacaso ya'huérinhüë'. Ma'sona Sara nohuantérinso niqué'. Isaco quëran pipipisopita, noya noya catahuararahuë. Inapita mini yonquiato nani sha'huitéranguën nisapaso'. ¹³ Cosona hua'huionta catahuarahuë. Ca nohuanto, shinpita panca nacion ocoiapona'. Hui'nan chachin anta ni'ton, catahuarahuë," itérin.

¹⁴ Tahuéririnquë tashiramiachin Apraanso', Acara quëtacaso marë' cosharo manin. A'nara sha'huëtë morsaquë i'sha ta'panahuaton, quëtérin. Hui'nionta Ismairo itérinso', a'paantérin quëpacaso marë'. Inahuaso pa'pachinara, Piirsipa inotéro parti chihuéatona', topinan pa'sápi. ¹⁵ I'sha sha'huëtë morsaquë ya'huérinso', ta'quipi. Ta'quihuachinara Acaraso', naraa'huaya tashinantérianaquë hua'huin acorahuaton, patérin. ¹⁶ Aquëmiachin pa'sahuaton, huënsëconin. Ama hua'huin chimininsö nicacaso marëhuë', inaquë huënsëconin. Huënsëhuachina, hui'napiso na'nérin huachi.

¹⁷ Yosëri, hui'napi na'nérinso' natanin. Napoaton Yosë anquëninëni, inápa quëran përasahuaton nontérin: "¿Ma'ta Acara onporan? ¡Ama pa'yanquësöhuë! Yosëri, hui'napi na'nérinso' natanin. ¹⁸ Manóton pa'sahuaton, macontaquë'. Ama patëquësöhuë'. Ca nohuanto, hua'huan quëran panca nacion pipipon," itérin. ¹⁹ Naporö' Yosë nohuanton, Acara a'na posoquë i'sha quënanin. Inaquë pa'sahuaton, sha'huëtë morsaquë manin. Ina masahuaton, hua'huin

o'shitonin.

²⁰⁻²¹ Yosëri, hui'napi catahuarin ni'ton, nóya a'shinin. Paran inotéro parti ya'huëpi. Míso pë'chinantérin. Oshaquérán a'shini Iquipito sanapi yoniton, acoantérin.

Apimirico Apraané anoyatopiso'

²² Naporo tahuëri'sa pochin Apimirico pa'nin Apraan nontapon. Huicororë' pa'nin. Inaso', Apimirico sontaronënpita camairinso'. Inaque Apimiricori Apraan itapon:

—Tëhuëñchachin quëmaso' nani ma'sha nipatana, Yosë catahuarinquënso ni'nai.

²³ Napoaton isëqué chachin Yoscoarë' ta'ton sha'huitoco: Ama hui'nahuëpita, shihuëpita, ama ca téranta', ma'sha onpotancoso marëhuë', sha'huitoco. Carinquënso nosoroatëñquën co ma'sha onpotëranquënhuë'. Inapochachin quëmanta noya ni'coi. A'napita ya'huëhuano'santa', noya ni'camaso marë' Yoscoarë' ta'ton sha'huitoco, itérin. ²⁴ Napotohuachina Apraan tapon:

—Yoscoarë' co ma'sha onpotaranquëmahuë', itérin.

²⁵ Napoaponahuë', Apraani itaantapon:

—Carinquëmaso', noya yonquirapiranquëma'. Quëma piyapinënpitaso niperinhuë', a'nara poso ihuaraiso matérinacoi, itérin. ²⁶ Ina natanahuaton, Apimiricori itapon:

—Co sha'huitérancohuë' ni'ton, ipora huarë' namaso natanahuë. Inpitaso inapotomarinquën. Co caso nitotërahuë', itérin. ²⁷ Napotohuachina, naporo tahuëri cato chachin, noya ninitona ya'huëcaiso marë' anoyatopi. Yoscoarë' ta'tona',

anoyatopi. Ina quëran anoyatopiso yonquicaiso marë' Apraani ohuicaro'sa', ohuacaro'sa', inapita manin. Masahuaton Apimirico quëtérin.
28 Naporahuaton canchisë ohuica nanoyan nipsisopita huëntonën quëran nisha acoarin.
29-30 Nisha acoaso', Apimiricori itapon:

—¿Ma'marëta canchisë ohuicaro'sa nisha acoaran? itérin.

—Isopita canchisë ohuica, quëtaranquën: “Tëihuënchachin Apraani ina poso ninin,” ta'camaso marë' quëtaranquën, itérin. **31** Napoaton ina ro'tëso', Piirsipa itopi. Inaquë cato chachin Yoscoarë' ta'tona', anoyatopi ni'ton, ina pochin nohuitopi. **32** Nani anoyatohuachina Apimiricoso', Huicororë chachin huiristino'sa no'panën parti paantapi.

33 Nani pa'pachinara, Apraanso inaranchin Sinioro chinotérin. Inaso': “Yosë ya'huëmiatérinso”, itopi anta'. Inaquë chinotaton, a'nara tamarisco nara sha'nin. Nani sha'huirahuë chachin ina no'paso', Piirsipa itopi. **34** Hua'qui Apraan huiristino'sa no'panënaquë, yacapatérin.

22

Yosëri Apraan tënirinso'

1 Ina piquëran Yosëri: “¿Tëihuënchachin ta'ma Apraan natérinco to?” ta'ton, ténicaso marë' pérarin:

—Apraan, itérin.

—Ma'ta Sinioro ya'huëarahuë, ténin Apraan.

2 Naporö' Yosëri itapon:

—Hui'nan Isaco itéranso', a'naíchin ni'ton, nosoromiatérän. Ina nipiñihuë', masahuaton

Moria parti quëpaquë'. Inaquë canconpatan, a'na motopi a'notaranquën. Inaquë chinotancoso marë' ina tēparahuaton, ya'ipi ahuiquitëquë', itérin.

³ Tahuëririnquë Apraanso', tashiramiachin huënsëntarahuaton, tapatarin huachi. Ihuë Yosë chinotaton ahuiquitacaso marë' pë'shitérinso', moranënquë a'mitérin. Ina quëran hui'nin, cato piyapinënpita, inapita quëparin. Yosëri sha'huitérinquë pa'nin huachi.

⁴ Cara tahuëri quëran Apraanso', Yosëri sha'huitérinso' no'pa' notérin. ⁵ Naporö' piyapinënpita itapon:

—Isëquë ninatacoi. Moranta isëquë patarahuë. Quiyaso' amasha aquëcha pa'sahuatoi, Yosë chinotarai. Nani chinotohuatoi o'manturai, itérin. ⁶ Ihuë Yosë chinotaton ahuiquitacaso', Isaco apitëntérin. Inaoranta cosoroa'hua, pë'to ra'pi, inapita manin. Ina quëran pa'pi huachi.

⁷ Papon pochin Isacori, Apraan itapon:

—¡Tata! itérin.

—¿Ma'ta conpaa'hua'? itérin pa'pini.

—Ni'quë tata, nani ihuë ya'huërin. Pë'to ra'pinta ya'huërin. Carniroa'hua ya'ipi ahuiquitacaso marëso': ¿Intoparanta manë'? itérin Isacori.

⁸ —Yosë nohuanton conpa ya'huapon, itérin pa'pini. Ina quëran, paantapi.

⁹ Yosëri sha'huitérinquë canconpachinara, Apraanso a'nara artaro ninin. Ténirahuaton, ina aipi ihuë acorin. Ina quëran hui'nin tonporahuaton, ihuë aipi acorin. ¹⁰ Inaquë acorahuaton tēpacaso marë' cosoroa'hua manantérin. ¹¹ Naporö chachin Sinioro anquëninëni, inápa quëran përarin:

—¡Apraan! ¡Apraan! itérin.

—Ma'ta Sinioro ya'huëarahuë, itérin Apraani.

¹² Sinioro anquënинëiso', itapon:

—Ama hui'nan tēpaquësohuë'. Tēniponquëen napotopiranquënhuë', iporaso' nani nitotërahuë. Ya'ipi cancanën quëran huarë' imaranco tēnahuë. Hui'nan a'naíchin nimirinhuë', co apiratërancohuë ni'ton, nitotërahuë, itérin. ¹³ Naporo' Apraan tahuérerahuatón ni'pirinhuë', a'nara carniro quënanin. Yosë nohuanton pomonën quëran, nara'huaya së'paquënquë a'ténin. Ina masahuaton hui'nin ya'huërenamën tēparin. Inapotaton, Yosë chinotacaso marë' ya'ipi ahuiquitérin. ¹⁴ Ina quëran Apraani ina ro'të aninihuánin. "Pahuantërinpoaso' Sinioro quëtërinpoaquë," itérin. Napoaton, iporahuanta ina pochin nohuitapi. "Motopiquëso', pahuantërinpoasopita Sinioro quëtërinpoa'," topi nonatona'.

¹⁵⁻¹⁶ Sinioro anquënineni, naquëranchin inápa quëran Apraan pératon itapon:

—Sinioro naporin: "Ya'ipi cancanën quëran huarë' natëtonco, a'naíchin hui'nan nimirinhuë' co apiratërancohuë'. Inaporanso marë' noya ni'nanquëen. Caso Yosëco ni'to, no'tequëen sha'huitaranquëen. ¹⁷ Noya nicatënquëen catahuamiataranquëen. Ca nohuanto shiparinpita, tayloraro'sa nápo na'apona'. Marë yonsanquë inotëra'huaya nápo, na'amiatapona'. Naporahuaton, inapitaso inimiconëna minsëra'piapona'. ¹⁸ Quëma natëranco ni'ton, ya'ipi isoro'paquë naciono'sa ya'huërinsopta, shiparinpita quëran catahuarárahue," itérin.

19 Nani Yosë chinotahuatona', Apraanso hui'ninë chachin piyapinënpita quëparitopiquë, pa'mantapi. Ina quëran ya'ipi chachin, Piirsipaqué panantapi. Inaqué Apraan hua'qui ya'huërin.

Nacoro hui'ninpita nipiso'

20 Hua'quimiachin ya'huapona pochin, Apraanso natantërin. "Miricanta", Nacoro sa'in nininso', Sara pochachin hua'huanin anta'," itopi. **21** Paninanso', Os itopi. Ina quëran niantarinso', Pos itopi. Ina quëran a'nanta niantarinso', Quimoino itopi. (Quimoinonta hui'nahuanpachina, Aramo itopi.) **22** Quimoino quëran nasitaantapi: Quisito, Aso, Piritasi, Itarapi, Pitoiro, inapita. **23** Ina Pitoiro mini, Nipica pa'pin. Nacoroso', Apraan iya'huain. Ya'ipiya quëran Miricaso', posa hua'huinpita ya'huëtin. Ina nápo Nacoroso', sa'inquë chachin hui'nahuanin. **24** Naporahuaton a'na sa'inquënta hui'nahuanin. Ina sa'inso', Nioma itopi. Inaqué hui'nahuaninsopitaso': Tipa, Caamo, Taas, Maaca, inapita.

23

Sara chimininso'

1 Saraso', pasa cato shonca canchisë pi'i icanin. **2** Ina quëran Quiria-arpa ninanoqué chiminin. Ina ninanoso', Ipron itopi anta'. Ínaso Canaan parti ya'huërin. Sa'in chimininso marë' Apraanso', sétaton, na'nérárin, ayanárin, naporin.

3 Ina quëran, sa'inco' nonën patahuaton, ya'huëhuano'sa nontapon pa'nin.

Ya'huëhuano'saso', itiro'sa itopi. Hua'ano'sa nipesopita niyontoyantopiquë, quënánconin. Inaquë nontahuaton itapona:

⁴ —Caso co ya'huëhuancohuë' naporahuë', yacaparanquëma'. Sa'ahuë chiminin ni'ton, chiminpatamara nipo'moramaso' no'pa' pa'antoco canta topirahuë, itérin.
⁵ Napotohuachina, Iti hua'ano'sari itapona':

⁶ —Natanquë sinioro sha'huichinquëen. Yosë huayoninquëen ni'ton, quëmaso' chiníquëen nanantëran. Nipo'moraiso' no'pa' insosona noya noya ni'ninquë, sa'anco' po'moquë'. Co incoi téranta apiratarainquënhuë', itopi.
⁷⁻⁸ Napotohuachinara, Apraanso huanirahuaton, itiro'sa nontaantacaso marë' móñsho ténin:

—Tëhuëñchachin isoporinquë sa'ahuëco' po'moca'huaso nohuantohuatama', catahuaco. Canpitari ya'huërénamëhuë Sohuaro hui'nin Ipron itopiso', nontoco topirahuë. ⁹ Maquipiraquë nanin ya'huërinso', pa'anchinco. Inaso no'panëñ intonquë ya'huërinso'. Onposona pa'térinso' no'téquëñ pahuërëtarahuë. Inapohuato, chiminpatoi nipo'moca'huaiso marë' isoporinquë ya'huëtarinco huachi. ¹⁰ Ipronta Iti piyapi. Inanta inaquë chachin nisarin ni'ton, a'napita hua'ano'sa natantonënquë inaora chachin Apraan sha'huitérin. Chiníquëñ nonin ninano ya'coanataquëchin, na'huëpisopitanta', natanacaiso marë':

¹¹ —Ama sinioro napoquësohuë'. Topinan naninso quëtaranquëñ. Inainpichin no'pa' ya'huërinsonta', quëchinquëñ. A'napitanta

natantonënqué sha'huitaranquën. Napoaton sa'anco' po'moqué huachi, itérin.

¹² Napotopirinhue', Apraanso ya'huëhuano'sa inachintopiso nitotaton, anoyatarin. Naquéranchin ya'huëhuano'sa ni'tonënqué móntsho taantarin.

¹³ A'napitanta natantonënqué, Ipron itaantapon:

—Natanqué api nontaanta'inquën topirahuë. Onpopionta no'pa marë' pahuërë' maqué'. Naporo huarë' sa'ahuëco' po'moarahuë, itérin.

¹⁴⁻¹⁵ —Noya sinioro pa'. Ina no'paso', catapini pasa coriqui prata quëran nininso' pa'térin. Canpoaso ma'huaénpoa ni'tehua', co inaíchin marë' aquëtë huarë' nonsápaso ya'huérinhue'. Napoaton, po'mochanqué sa'anco huachi, itérin.

¹⁶ Napohuachina, Apraanso ina nápo marë' anoyatérin. Ina quëran Iti hua'ano'sa ni'tonënqué, no'tequën pahuérëtérin. ¹⁷⁻¹⁸ Inapoaton Apraani, Ipron no'panën Maquipiraquë ya'huérinso', pa'anin. Ina no'paso', insina nararo Mamiriri hua'anëntérin quëran, pi'i pipirinso parti quëparitérin. No'pa', nanin, nararo'sa inainpichin ya'huérinso', inapita Apraani hua'anëntérin huachi. Iti hua'ano'sari ya'ipiya quëran nitotopi. Ninano ya'coanataquëchin na'huëpisopitanta', nitotopi.

¹⁹ Nani anoyatahuaton Apraanso', Maquipira naninqué sa'inco' po'morin huachi. No'pa' pa'aninquë napotérin. Ina no'paso' sha'huirahuëso chachin, Mamiriri hua'anëntérin no'pa quëran, pi'i pipirinso parti quëparitérin. Ina ro'tëso', Ipron itopi anta'. Canaan parti ya'huérin. ²⁰ Ina pochin Apraan, no'pa',

nanin, inapita pa'anaton, hua'anëntërin. Itiro'sari, pa'antërin nipa'pitacaiso marë'.

24

Isaco marë' sanapi yonípiso'

¹ Apraan nani noyá mashotërin huachi. Nani ma'sha nininqué Siniyorori catahuamiatërin. ²⁻³ A'na tahuëri, piyapinën masho masho nininso', pérarin. Inari ya'ipi ma'shanënpita a'pairin. Huë'pachina itapon:

—Natëancoso nitota'huaso marë', tonaroana së'huatoco. Së'huatatonco: “Siniyoro Yosë ni'ton, inápaquë hua'anëntaton, isoro'panta hua'anëntërin. Ina ni'sárinco ni'ton, no'tëquëñ natëaranquën. Co isoporinquë Canaan sanapi nininso', Isaco macacaso ya'huérinhue'”, itoco. ⁴ Quëma chachin hua'huatërahuëso no'paquë paquë'. Inaquë pa'sahuaton, quëmopinëhuëpita quérän sanapi yonítëquë', itërin.

⁵ Napotohuachina, piyapinëniso itapon:

—Napopiranhuë', sanapi yonirahuëso co yaima quintahuachinco huë': ¿Onpochita? ¿Hua'huatëranso parti hui'nan quëpamanta'i ti? itërin. ⁶ Napotohuachina, Apraani itapon:

—¡Ama napoquësuhue'! ¡Co inaquë quëpamantacaso ya'huérinhue'! ⁷ Siniyoroso' Yosë ni'ton, inápaquë hua'anëntërin. Nani ina sha'huitërinco iso no'pa' shihuëpitari hua'nëntacaso'. Iráca tatahuë ya'huérin no'pa quérän ocoirinco. Quëmopinëhuëpita ya'huérin parti quérän ocoirinco huachi. Ocoirahuatonco isëquë quëninco. Inari chachin anquëninëñ a'pararin catahuainquëñso marë'.

Ina nohuanton, sanapi nohuantarín isëqué huëcacaso'. ⁸ Sanapi isëqué huëcacaso co nohuantohuachinhue', naporó huaré' Yoscoaré' ténanso co na'intarinquénhue'. Nipirinhué' ama onporonta inatohua hui'nahué quëpaquësuhue', itérin.

⁹ Napotohuachina, piyapinëni Apraan tonaroananën së'huatérin. Së'huatahuaton: "Yoscoaré', sha'huitérancoso chachin, nisarahue," itérin. ¹⁰ Itahuaton, tapatarin huachi. Hua'anën ma'shanënpita, pa'ton pa'ton nininsopita, huayonahuaton, nicanatacaso maré' tapararin. Shonca camiyoqué apë'pëtahuatona', Nacoro ninano itopiqué, pa'pi huachi. Inaso ninano', Misopotamia parti ya'huérin.

¹¹ Pa'sápatona', canconpi huachi. Ninano aipiran, yatashirahuaso canconpi. Naporó oraqué nano'sa i'sha macapona posoqué huë'sapi. Apraan piyapinëns' camiyoro'sa a'na poso pirayan achinotarin. ¹² Naporahuaton inaqué chachin Yosë nontérin: "Ni'qué Sinioro, quëmaso Yosënqué. Hua'anéhué Apraan, natérinqué. Hua'anéhué nosoroaton catahuaco. ¹³ Nano'sa i'sha macapona huëcasoi', iso poso pirayan ninatapo. ¹⁴ Insoso nanon: 'Yonshanën chinohuaraqué', canta pi'piyan i'sha o'opainqué,' itohuato: 'O'oqué api, camiyonënpitanta machi o'oina,' ichinco. Ina quëran piyapinëns' Isaco maré' sanapi huayonanso', nohuitarahué. Ina pochin nitohuachinchco: Tëhuëñchachin hua'anéhué Yosëri nosoroaton catahuarin, tosarahue," itérin.

¹⁵ Orarinso' co tiquiyátërasuhue', a'nara

nanon yonsha pitënahuaton, huë'sarin ni'nin. Inaso nanon, Pitoiro hui'nin. Nipica itopi. (Pitoiroso', sha'huirahuëso chachin Nacoro hui'nin. Miricaquë hui'nahuaninso'. Nacoronta Apraan iya'huain.) ¹⁶ Nipicaso', noyápiroyanchin. Naporahuaton nanon, co quëmapiri së'huayátérarinhüe'. Canquirahuaton posoquë nohuaramarin. Yonshanën amëntaitérinso pitënahuaton, panantapirinhüe', ¹⁷ Apraan piyapinëni ta'arahuaton, icantonin. Icantahuaton, itapon:

—Canta apia'hua, yonshanën quëran pi'pian i'sha o'opainquën topirahuë, itérin.

¹⁸ —O'oquë api, itérin Nipicari. Napotahuaton, yonshanën chinohuararin. Inapoaton o'shitacaso marë' së'quëtérin. ¹⁹ Nani o'opachina, Nipicari itapon:

—I'sha maantarahuato, camiyonënpitanta o'opiquë ta'panchi nohuantopiso' o'oina', itérin. ²⁰ Itahuaton, a'naromarëáchin pë'tahuar'o'sa o'opiquë, ta'panarin. Ya'ipi camiyoro'sa', o'ocai huarë' inaporin. ²¹ Inapoaso', Apraan piyapinënso' co manta taponahuë', topinan ni'sárin: “Tëhuëñchachin Sinioro catahuarinco ni'ton, ¿co topinan iratomaracohuë ti?” ténin yonquiaton. ²² Camiyoro'sa nani o'opachinara, Apraan piyapinënso', oro quëran po'moitëra pochin nipiso' manin. Saota cramo pochin quë'ninso'. Ina masahuaton, Nipica nitëananënquë a'tëntérin. Naporahuaton cato a'sontanpa oro quëran nipiso', quëtérin. A'naya a'naya pasa na'con cramo quë'ninso', quëtérin. ²³⁻²⁵ Inapita quëtahuaton, natanin:

—¿Ma'ninta quëmaso' tata?

—Caso tatahuë Pitoiro. A'shinso', Mirica itopi. Tata pa'pinsó' Nacoro itopi.

—¿Ya'huërin canpita pëinëmaquë chinota'huaiso to?

—Ya'huërin mini. Camiyoro'santa capacaiso ya'huërin, itérin Nipicari.

26-27 Ina natanaton, Apraan piyapinënso isonin. Isonin quëran Yosë chinotaton itapon: “¡Ma noyacha Siniroso paya! Inaso Yosë, hua'anëhuë Apraan natérinso’. Tëhuëñchachin hua'anëhuë nosoroaton, noya catahuaantarin. ¡Quëmopinënpta pëinënquë huarë’ no'tëquën quëninco!” ténin.

28 Nipicaso' ta'arë'nachin a'shin pëinënquë pa'nin. Inaquë ya'ipi naporinso sha'huiuantarin.

29-30 Nipicaso' a'na yo'in mashonën ya'huëtérin. Inaso', Napano itopi. Po'moitéra pochin nininso' oshin quëtopiso' nicaparin. A'sontanparinsopitanta', nicaparin. Sha'huirinsonta natanahuaton, Apraan piyapinën yonicaso marë' posoquë ta'amarin. Ina pirayan, camiyonënpitarë chachin huaniárin quënamarin. **31** Inaquë nontaton itapon:

—Huëquë api. Quëmaso' Siniro noya catahuarinquën. ¡Co aipiran quëparitamaso ya'huërinhuë'! Nani pëi taparahuë canpita marë'. Camiyoro'santa huë'ëcaiso', nani taparahuë, itérin.

32 Napotohuachina, pëiquë pantapi huachi. Inaquë Napanori pë'pëtoro'sa chinohuararahuaton, camiyoro'sa a'carin. Apraan piyapinën, ca'taninsopitarë chachin nipa'morantëcaiso marënta', i'sha quëshirin.

³³ Cosharo acotohuachinara, Apraan piyapinënsö' tapon:

—Co'huara coshachátërapohue', ma'marësona huë'nuhüeso'ton, sha'huita'huanquëmaso ya'huërin, tënин.

—Ina'ton nipachin sha'huitocoi, itërin Napanori.

³⁴ —Caso Apraan piyapinëncö. ³⁵ Siniñorori hua'anëhuë catahuamiatérin ni'ton, pa'pi notohuarro' ma'sha ya'huëtérin: Ohuacaro'sa', ohuicaro'sa', inapita notohuarro' pë'tahuarin. Naporahuaton oro, prata inapita ya'huëtérin. Piyapinënpitanta quëmapi'sa', sanapi'sa', inapita ya'huëtérin. Camiyoro'sa', moraro'sa', inapitanta na'a pë'tahuarin. ³⁶ Naporahuaton sa'in Sara itopisonta', a'naíchin hua'huanin. Paiya nicaponahuë', quëmapi hua'huanin. Inari iporaso', ya'ipi hua'anëhuë ma'shanënpita, hua'anëntapon huachi.

³⁷ Hua'anëhuë camairincoso', natëca'huaso marë' nani Yoscoareë' ta'to sha'huitérahuë. Naporo' napotérinco: "Co isoporinquë Canaan sanapi nininsö', Isaco macacaso ya'huërinhuë". ³⁸ Tatahuëi quëran quëmopi ninaisopita ya'huëpiso parti têhuëñchinso' paquë'. Inaquë pa'sahuaton, huëntonëhuë quëran chachin sanapi hui'nuhüe marë' matomaquë", itërinco. ³⁹ Napotohuachincora, cari itërahuë: "Quëmaso' hua'anëhuëñquëñ nipiñahuë' nonchinquëñ: Pa'pato, co'so' sanapi yaima quintahuachincöhüe' ¿Ma'ta onpo'i?" itërahuë. ⁴⁰ Napotohuatora, sha'huitérinco: "Ni'quë', caso Siniñoro iranëñ no'tequëñ pa'terahuë ni'ton, anquëñinëñ a'pararin

catahuainquënso marë'. Ina nohuanton, noya pa'sahuaton sanapi quënamaran. Tatahuëi quëran quëmopinëhuë hui'nin chachin, hui'nahue marë' matomaran. ⁴¹ Quëmopinëhuë co hui'nin yaa'pantihuachinquënhuë', napor o huaréáchin Yoscoarë' ténanso', co na'intarinquënhuë'," itérinco.

⁴² Napoaton huë'sápatoi, ipora tahuëri posoquë canquirai. Inaqué Yosë nontato napoterahue: "Sinioro quëmaso Yosënqué. Hua'anëhuë Apraan chinotérinquë. Ni'quë Sinioro. Tëhuenchachin quëma catahuararanco noya huë'nahue nipachinso', ⁴³⁻⁴⁴ iso poso pirayan nontaranquënso' natanco. Apira sha'huitohuatënqué inachachin niin ténahuë. Inso nanonsona, i'sha macapon o'marinso', cari natanpato: 'Canta pi'piyan yonshanën quëran i'sha o'opainqué,' ichi. Napotohuato: 'O'oqué api. Camiyonënpitanta machi o'oina', ichinco. Ina quëran hua'anëhuë hui'nin marë' sanapi huayonanso', nohuitarahuë," itérahuë. ⁴⁵ Orarahuëso', co tiquiyátérasocohuë', Nipica o'marin ni'nahue. I'sha macacaso marë' yonshanën piténahuaton, posoquë o'marin. Paaparahuato: "Canta api i'sha quëtoco topirahuë," itérahuë. ⁴⁶ Napotohuatora, yonshanën a'naroáchin chinohuararahuaton, itaponco: "O'oqué api, camiyonënpitanta machi o'oina'," itahuatonco, o'shitérinco. Camiyoro'santa', o'shitérin. ⁴⁷ Ina quëran cari natanahuë: "¿Ma'ninta quëmaso' tata?" itérahuë.

"Caso tatahuë, Pitoiro. Inaso', Nacoro hui'nin. Miricaquëya hui'nahuaninso'," itérinco. Itohuachincora, a'nara po'moitëra

pochin nininso' nitéananenquë a'tenterahue. Naporahuaton cato a'sontanpacaso quëterahuë.
48 Ina quëran isonahuato, Siniro chinoterahue: "¡Ma noyanquëncha quëmaso' Siniro paya! Quëmaso Yosënquën, hua'anéhuë Apraan natérinquë. Noya quënanco ni'ton, no'tequë canquirahuë. Hua'anéhuë hui'nin acoantacaso marë' quëmopinën hui'nin chachin quëpatarahuë," iterahue, Siniro chinotato. **49** Iporaso huachi, sha'huitoco nitochi. ¿Téhuëñchachin hua'anéhuë nosoroapoma ti? Co'so' nohuantohuatamahuë', sha'huitoco inanta nitochi. Nani nitotohuato ma'sona nica'huaso' yonquiarahuë huachi, itérin.

50 Napotohuachina, Napano, Pitoiro, inapitari itopi:

—Ya'ipi naporansopita Siniro nohuanton naporin ténai. Napoaton, so'yachin nipachin.
51 Ma'tana Nipica ya'huéarin. Siniorori ina pochin nohuantérin ni'quëhuarë', quëpaquë'. Hua'anëñ hui'nin so'yachin, itopi.

52 Napopiso natanahuaton, Apraan piyapinënso isonin. Isonahuaton, no'paqué huarë' monshomarin: "Yosparinquëñ Siniro," itérin.
53 Ina quëran notohuaro' ma'sha quëninsopita o'quirin. Oro quëran, prata quëran, ina quëranpita nipiso', Nipica nicanarin. A'mocasonta', pa'ton nininsopita quëtérin. A'shin, yo'in, inapitanta notohuaro' ma'sha pa'ton nininsopita quëtérin. **54** Naporo huarë' Apraan piyapinën, ca'taninsopitarë chachin, coshatopi, o'opi, napopi. Naporahuatona naporo tashi inaquë chinotopi huachi.

Tahuëririnquë capayatahuaton, Apraan piyapinënso Nipica pa'pin, yo'in inapita itapon:

—Ipora tahuëri hua'anëhuë ya'huërinquë yapaantarahuë ta'a, ténin. ⁵⁵ Napopirinhue', Nipica yo'inso a'shinë chachin, itapona':

—Shonca tahuëri têranta nanon quëparichin. Ina piquëran noya imasarinquën huachi topiraihue', itopi. ⁵⁶ Itopirinahuë', Apraan piyapinënso napoantarin:

—Ama aquëtë huarë' ahua'quicosohue'. Yosë nohuanton, noya huëcato, co topinan iratërahuë'. Napoaton hua'anëhuë ya'huërinquë pananta'huaso ya'huërin ténahuë, itérin. ⁵⁷ Napohuachina, itaantapi:

—Pa'ahua nipachin nanon përahua'. ¿Ma'tama ichinpoa pa'? topi. ⁵⁸ Nipica përasahuatona', natanpi:

—¿Ipora tahuëri chachin nohuantëran iso quëmapi imacaso to? itopi.

—Nohuantërahuë mini, ténin.

⁵⁹ Napohuachina, Nipica pacacaso nohuantopi huachi. Ina aso'sorinso sanapinta', a'pantopi. Naporahuaton a'napitanta piyapinënpita, sanapi'sa nininso' a'pantopi. Apraan piyapinën, ca'taninsopita, inapitanta noya a'papi huachi. ⁶⁰ Nani yapa'pachina, yo'ini nöya yonquirapiton iso pochin sha'huitérin:

“Oshira, Yosë catahuainquën.

Pa'pi nohuantërai, noya hua'huanaton, notohuaro' amiparinpita ya'huëtiinquënso'.

Naporahuaton amiparinpitanta',

Yosëri catahuain inimiconënapita minsëra'piaina',” itérin.

61 Nani nontohuachinara, Nipicaso piyapinënpitarë chachin, camiyoro'saque ya'mitéahuatona', Apraan piyapinën imapi. Ina pochin Apraan piyapinën, Nipica matomarahuaton, huénantarín huachi.

62-63 Naporor' Isacoso', Niquipi parti ya'huéarin. "Nanpiton ni'sárcoso' poso," itopiquë Yosë yonquiapon pa'nin quérán, huénantarín. Nani yatashirapaso', a'nanaya ni'pirinhuë', ni'toro'sa camiyonënapitarë chachin canquirapi ni'nin. **64** Nipicanta', Isaco ni'sahuaton, camiyonën quérán nohuararin. **65** Nohuararahuaton Apraan piyapinën natanin:

—¿Inta pasoso' quëmapi canpoataquëchin huë'sarin? itérin.

—Ina mini Isaco. Hua'anéhuë Apraan hui'nin, itérin. Ina natanahuaton, Nipicaso niimomotötérinso' në'mëtëqué, nipa'shinayatérin. **66** Canconpachinara, piyapinëni ya'ipi naporinso Isaco sha'huitérin. **67** Ina quérán Isacoso', a'shinco në'mëtë pëinënqué Nipica quëparin. Co hua'quiya quéranhue' macaton, noya cancantérin. Pa'pi nosoromiatiérin. A'shin marë' sétápirinhuë', inapoaton noya cancantérin huachi.

25

Apraan Sitoraquë hui'nahuaninsopita

1 Apraanso', a'na sa'in ya'huétaantarín. Inaso', Sitora itopi. **2** Inaquënta hui'nahuaantarín. Inaquë hui'ninpitaso': Simiran, Cocosan, Mitan, Matian, Isopa, Soa, inapita. **3** Cocosan hui'ninpitaso':

Sipa, Titan, inapita. Titan quëran pipipisopitaso': Asororo'sa', nitosoro'sa', niomoro'sa inapita.⁴ Matian hui'ninpitaso': Ipan, Ihuiri, Anoco, Apitan, Iritan inapita. Ya'ipi inapitaso', Sitora quëran pipipi.

⁵⁻⁶ Na'a hui'ninpita Apraan ya'huëtopirinhüë', Isacoráchin pochin ya'ipi ma'shanënpita, quëtérin. Sitoraquë, Acaraquë hui'nahuaninsopitaso', pi'piyan pi'piyan ma'sha nicanarin. Naporahuaton, nanopiso chachin niquë a'parin. Pi'i pipirinso parti ya'huëcaiso marë' a'parin. Co nohuantérinhüë' Isacorë' napopináchin ya'huëcaiso'.

Apraan chimininso'

⁷ Apraanso ya'ipiya quëran, pasa canchisë shonca a'natérápo pi'i icanin. ⁸ Nani noyá mashoya nipachina, mashori quëparin. Chiminpachina, shimashonënpita, quënancontarin huachi. ⁹ Hui'ninpita: Isaco, Ismairo, inapitari, pa'pitopi. Maquipira naninquë po'mopi. Maquipiraso', sha'huirahuëso chachin, insina nararo Mamiriri hua'anëntérin quëran, pi'i pipirinso parti quëparitérin. Soaro hui'nin Ipron itopisoari, ina no'poso' hua'anëntopirinhüë'. (Inapitaso' itiro'sa'.) ¹⁰ Ina no'pa chachin iráca Apraan nanoppon itiro'sa', pa'antérin. Inaqué inanta', sa'inco' Sara itopiso' pirayan, po'mopi.

¹¹ Apraan chiminpachina, Yoséri Isaco, catahuamiatérin. Inaso Nipicarë chachin: "Nanpiton ni'sárincoso' poso," itopiso' pirayan, ya'huérapi.

Ismairo quëran pipipisopita

12 Sha'huitëranquëmaso chachin, Apraan Acaraquëya hui'nahuanpachina, Ismairo itopi. Acaraso', iquipitoron. Sara piyapinën. Ismairo hui'ninpitaso', isopita: **13-15** Paninantérinso' Nipayo itërin. Ina piquëran niantapisopitaso': Sitaro, Atipiri, Mipisan, Misma, Toma, Masa, Atar, Tima, Quitarro, Nahui, Sitima inapita. **16** Ina nápo Ismairo hui'ninpita ya'huëpi. Shonca cato ya'ipiya quëran. A'naya a'naya no'panëna hua'anëntopiso', niapora'piapi. Ya'huëpisonta inapotopi. Naporahuaton, inapitaso inahuara inahuara huëntonënaquë, hua'an ya'conpi.

17 Ismairo pasa cara shonca canchisë pi'ipitaso' chiminin. Chiminpachina, pa'pitopi huachi. **18** Ismairo quëran pipipisopitaso', Apira parti, Shor parti, inapita partiro'sari ahuancanapirin. Inaquë, no'pa' macatona ya'huëpi. Iquipito notënanquë ya'huëpi. Ina partitaquëchin Iquipito quëran, Asiriaquë ira pa'ninso' na'huërin. Iinpitari, co nohuantopirinahuë', inaquë no'pa' macatona', ya'huëpi huachi.

Isaco hui'ninpita nasitérinso'

19 Iporaso Isaco naporinso sha'huichinquëma': Inaso', Apraan hui'nin. **20** Catapini shonca pi'ipitaso', sa'arin. Pitoiro hui'nin Nipica itopiso', manin. Inaso yo'in, Napano itopi. Inapitaso' arano'sa itopi. Patan-aran parti ya'huëpi. **21** Nipicaso', co nanitérinhuë hua'huanacaso'. Ina marë' Isaco Sinioro nontërin. Napohuachina, nontérinso' natanahuaton, catahuarin ni'ton, Nipica cayorin huachi.

22 Catopia'huaya cayoaton, yo'namënqué niahuérapi natanin. Napoaton yonquirin. "Hua'huahuépita iporaquéranchin niahuérapi ni'quëhuarë": ¿Ma'marëta aquëtë huarë'nanpiiso?" ténin. Inapochin yonquiaton, Siniorori anitotacaso marë' nontérin. **23** Natanpachina, Siniorori itapon:

"Catopia'huaya cayoran.

Inapita shinpita quëran cato nacion pipipon.

Cato huënton nicatona', niahuérápona'.

Ipora shimashonëna co'huarda na-sichátéraponahuë', niahuépiso pochin nicapona'.

A'nara chini chiníquën nanantapon.

Naporahuaton hua'hua nininsoari

masho masho nininso camairápon," itérin.

24 Napoin quëran, Nipica huaicaso nanirin. Catopia'huaya huairin. **25** Quëchitérinsoso' quëhuashin aina'huatahuaton, ya'ipi anporotérin. Napoaton Isao* itopi. **26** Ina pa'taso chachin, iionta', a'na imirin quëran Isao matocanahuaton, hua'huataantarín. Naporinso marë' inaso', Cacopo† itopi. Isaco saota shonca pi'ipitaso', hui'ninpita nasitapi.

Isao tēhuérindo'

27 Catopia'huaro'sa noya so'sopi. Isaoso' hui'napitahuaton, ma'sha yonicaso pa'yatérin. Miso inantérin. Cacoposo nipirinhuë', co inaporinhuë'. Ya'huëpique pa'yatérin ya'huápaso'.

* **25:25** Isao: Isaoso' piyapi anporo yonquiatona', ina pochin nohuitopi. † **25:26** Cacopo: Cacoposo', monatona'pi tapon naporin.

28 Isaoso', pa'pini na'con na'con pa'yatërin. Inantërinso capaton, napotërin. Ya'huëre' Nipicaso', Cacopo na'con na'con pa'yatërin.

29 A'na tahuëri Cacopo shantë a'itarin. Inapoaso Isaonta', inantapon pa'nin quëran, pa'pi canotërin huënantarín. **30** Cacopo a'itërinso ni'sahuaton itapon:

—Nosoroco iya, tana yatëparinco caso'. Quëhuashin[†] cosharo anpiranso', canta quëtoco ca'i, itërin. **31** Napotohuachina, Cacopori itapon:

—Paninanquën ni'ton, na'con ya'huëtarinquën canacamaso'. Carinquën nipachin ya'huëréchinquën. Naporo huarë' iso cosharo quëtaranquën, itërin. **32** Napotohuachina, Isaoso' tapon:

—Ni'quë iyasha, tana caso yatëpararinco. Chim-inpatoso', paninan ninahuëso marë' cana'huaso' ya'huëterincosopita, topinan quëran nisarin, itërin.

33 —Yoscoarë' quëtaranquën itoco nipachin, itaantarin Cacopori. Napotohuachina, "Yoscoarë' quëtaranquën," itërin. Inapoaton, Isaoso paninan niniso marë' canacaso ya'huëterinsopita, co pa'yatërinhuë'. **34** Naporo huarë' Cacopori, pan acotahuaton, shantë a'itërinsonta o'huintërin. Nani ca'sahuaton, o'osahuaton, Isaoso' pa'nin huachi. Paninan niniso marë' canacaso ya'huëterinso', co manta pa'térinhue pochin nitërin.

26

Isaco Quiraro ninanoquë naporinso'

[†] **25:30** Itomo: Itomoso', quëhuashin cosharo tëniso marë' inapochin Isao apoyatopi.

¹ Naporo tahuëri'sa Isaco ya'huërinso parti panca tanarotopi. Apraan nampiso tahuëri'sa napopiso pochin, ninin. Napoaton sa'in, piyapinënpita, inapitarë chachin Quiraro ninanoquë pa'pi. Huiristino copirno, Apimirico itopiso ya'huërinquë pa'pi. ² Inaquë Siniorori ya'notahuaton, itérin: “Ama Iquipitoquë pa'maquësohuë”. Insëquësona quëparitacaso', carinquën sha'huitaranquën. ³ Ipora marëso', iso no'paquë ya'huëtaco'. Carinquën ca'tanatënquën catahuararanquën. Ya'ipi iso no'pa', carinquën quëtaranquën. Shiparinpitanta', ina chachin quëtarahuë. Tataparin Apraan nani sha'huiterahue ni'ton, quëtaranquëma'. ⁴ Ca nohuanto quëma shiparinpitita, na'amiatapona'. Tayoraro'sa pi'iro'tëquë ya'huërinso nápo, ya'huapona'. Inapitari ya'ipi iso no'paro'sa hua'anëntapona'. Naporahuaton, ya'ipi isoro'paquë naciono'sa ya'huërinsopitanta', shiparinpitita quëran catahuararahuë. ⁵ Apraanso': Ya'ipi sha'huiterahue'sopita, camairahuësopita, pënënhahuësopita, a'chinterahue'sopita, ya'ipi inapita natërin ni'ton, napoarahuë,” itérin.

⁶ Siniorori napotohuachina, Quiraro ninanoquë quëparitopi. ⁷ Ya'huëhuano'sari Nipica ni'sahuatona', so'in natanpachinara: “Sa'ahuë,” ta'caso nimirinhue', të'huaton nonpinin: “Oshihuë,” ténin. “Nipica noyápiroyanchin ni'ton, ya'huëhuano'sari macapona’. Ya'huërë' caso tëpaponaco,” ta'ton naporin.

⁸ Hua'qui quëran pochin Apimiricoso', huintananën quëran notëtarin. Notëtapirinhue', Isacori

Nipica apinorarin quënanin. ⁹ Naporo' amatahuaton:

—¡Nipicaso', sa'an tēnahuë! Ina níponahuë': ¿Onpoatonta', "oshihuë," tēnan? itérin.

—“Ina na'intérinco tēpaponaco caso'” ta'to naporahuë, itérin Isacori. ¹⁰ Napopirinhuë', Apimiricori itapon:

—¡Co napochitoncoihuë pora! Onpichin sa'an inso ya'huëhuani tēranta', ichihuë'érin. Ina marë' quiyaso' oshahuaintoihuë', itérin. ¹¹ Napotahuaton, piyapinënpita camairin:

—Inquëma tēranta iso quëmapihuë nípon, sa'ihuë nípon së'huahuatama', tēhuëñchachin chiminarama', itérin.

¹² Ina pi'iquë Isaco inaquë iminapatérin. Sha'tohuachina, Yosëri catahuarin ni'ton, pa'pi notohuaro' nitérinso' manin. ¹³ Notohuaro' ma'sha ya'huëtahuaton, pa'pi ma'huan quëparitérin. ¹⁴ Pa'pi notohuaro' ohuicaro'sa', ohuacaro'sa', piyapinënpita, inapita ya'huëtérin. Ina marë' huiristino'sari noyapatona', no'huipi. ¹⁵⁻¹⁷ Napoin quëran Apimiricori Isaco itapon:

—Quëmaso' quiya quëran na'con na'con ma'huanan ni'ton, pipiquë huachi, itérin. Napotohuachina Isacoso', sa'in, piyapinënpita, pë'tahuanënpitarë chachin pa'pi. Quiraro motopianaquë, pa'sahuatona', inaquë quëparitopi. Iráca Apraan nanopipon, ina piyapinënpitari posoro'sa ihuapiso', huiristino'sari améntarotopi.

¹⁸ Inaquë ya'huëapona pochin, naquëranchin ina posoro'sa ihuaantararin. Iráca pa'pincori nanopipon ihuapisopita, inapotaantapi. Ina chimpachina huiristino'sari, améntarotopirinahuë', ina

posoro'sa chachin ihuaantarin. Iráca pa'pincori ina posoro'sa nohuitérinso chachin, inarinta nohuitaantarin.

¹⁹ A'na tahuëri Isaco piyapinënpitari motopianaquë a'na poso ihuarapi. Ihuarapirinahuë', no'pa quëran i' pipirinso' quënanpi. ²⁰ Napoaponahuë', Quiraro motopianaquë, huiristino'sa ohuicanëna a'paipisopita, no'huitopi. Isaco ohuicanënpita a'paipisopitarë', nino'huitona niahuëpi: "¡Iso i'shaso', quiyaquën!" Niitatona', niahuëpi. Napoaton Isacori, apoyatérin: "Niahuëyatopiso' poso," itérin. ²¹ Ina piquëran piyapinënpitari, a'na ya'huëre' ihuaantapi. Ina marënta', naquëranchin niahuëantapi. Inanta', Isacori apoyataantarin: "Niinimicotopiso' poso," itérin. ²² Isacoso', sa'in, piyapinënpita, pë'tahuanënpita, inapitarë chachin, áquë pa'pi huachi. Inaque a'na poso ihuantapi. Ina marëso' co huachi niahuëpihuë' ni'ton: "Cha'ëpisopita, posonën," itérin. "Ipora têhuëñchinso' Siniro nicha'ërinpoa noya noya isèquë ya'huëcaso marë" ta'ton, ina pochin ina poso nohuitérin.

²³ Ina quëran, Piirsipa parti paantapi. ²⁴ Naporo tashi Siniorori ya'notahuaton itapon:

"Caso Yosëco. Tataparin Apraan chinotérinco. Ama të'huaquësuhuë'.

Carinquën ca'tanatënquën catahuamiataranquën. Piyapinëhuë Apraan natérinco ni'ton, ca nohuanton shiparinpita na'amiatapon," itérin.

²⁵ Napotohuachina Isacoso', a'nara artaro inaquë ninin. Ina nisahuaton, Siniro chinotérin.

Inaquë ya'huapona pochin piyapinënpitari a'na ya'huëre' poso ihuaantapi.

Isaco Apimiricorë anoyatërinso'

26 A'na tahuëri Apimiricoso', Quiraro quëran Isaco nontapon huë'nin. Aosato, Huicoro, inapitari ca'tanin. Aosatoso', amiconën. Huicoroso nípirinhüë', capitan, sontaronënpita camairinso'.

27 Canquihuachinara, Isacori itapon:

—Canpitaso co quë'yatomacohuë', ya'huërama quëran ocoiramaco. ¿Ma'marëta iporaso' yaniantaramaco? itërin.

28 —Tëhuëñchachin quëmaso', Sinioro catahuamiatërinquën ni'nai. Napoaton yonquirai quëmarë'coi anoyata'huaiso'. Iso pochin anoyatahua': **29** Quiyaso ya'huëraiquë, co ma'sha onpoteràinquënhüë', noya nicatëinquën, noya quëran a'parainquën. Napoaton quëmanta', ama ma'sha onpotocoisohuë'. Yosë quëmaso' ipora noya nicatënquën catahuarinquën ni'ton, napotarainquën, itërin. **30** Napotohuachinara, naporo chachin Isacori panca pita nitërin ni'ton, coshatopi, o'opi, napopi. **31** Tahuëririnquë tashiramiachin, huënsëantahuachinara itohuara capini: "Yoscoarë' noya nini'tëhua' ya'huarihua'," nitopi. Ina quëran, nani anoyatahuatona': "Pa'sarai huachi," topachinara, Isacori itapon: "Osharan paco', Yosë catahuainquëma'," itërin.

32 Naporo tahuëri chachin, Isaco piyapinënpitari huë'sahuatona', sha'huitiipi: "Poso ihuaráraiso', nani i'sha quënanai," itiipi. **33** Napotohuachinara, Apimiricorë anoyatatona': Yoscoarë' niitopiso', yonquiaton, ina pososo' aninuhanin, "Sipa"

itérin. Napoaton ina ninanoso', ipora Iso quirica ninshitasoco huarënta' Piirsipa itopi.

³⁴ Isao catapini shonca pi'ipitohuachina, Cotita manin. Inaso', Piiri itopiso' hui'nin. Piiriso', Iti piyapi. Ina piquëran Isaoso', a'na maantarin, Pasima itopiso'. Inaso', Iron hui'nin. Ironta Iti piyapi chachin. ³⁵ Ina catoro'sa co Yosë imatonahuë', Isaco, Nipica inapita na'con asëtatona', aparisisitopi.

27

Cacopo nonpinaton, iin ya'huëretérinso'

¹ Isaco noyá mashotohuachina, pëtorayataton co huachi quënantérinhuë'. A'na tahuëri hui'nin paninan Isao itopiso' pérarin. Huë'pachina:

—Conpa, itérin.

—Ma'ta tata ya'huarahuë, itérin Isaori.

² —Ni'quë conpa, nani caso mashotérahuë. Payo chiminapo huachi. ³ Napoaton pë'chinanën, shinérënënpita, inapita masahuaton ma'sha yoníquë'. ⁴ Nani tēpahuatan, costarincoso chachin po'morahuaton, quëshico ca'i. Ina quëran noya ya'huëcamaso marë' sha'huitaranquën huachi. Co'huara chiminyátérasocohuë', inapochinquën, itérin.

⁵⁻⁶ Napoaponahuë', Nipicanta Isao napotérinso natanarin. Napoaton ina tananquë paaso chachin, a'naroáchin Cacopo pératon sha'huitérin:

—;Natanquë hua'hua sha'huichinquën. Nani iya masho tatari napotérinso' natayatérahuë!

⁷ “Ma'sha yoníquë'. Nani tēpahuatan, costarincoso chachin po'morahuaton, quëshico ca'i. Ina quëran Sinioro ni'tonënquë chachin noya ya'huëcamaso

marë' sha'huitaranquën huachi. Co'huara chiminyátērasocohuë', inapochinquën," itérin.
8 Napoaton noya natanquë sha'huichinquën.
9 Pë'tahuaros'a ya'huérinquë pa'sahuaton, cato chipoa'hua noya noyatopiso' macontarahuaton quëshico. Cari, tata masho costarinso chachin po'mochi. **10** Nani anpitohuato, quëmarí quëpatéquë ca'in. Inapotohuatan, quëma noya ya'huëcamaso marë' sha'huitarinquën huachi. Co'huara chimiyantērasohuë', inapochinquën, itérin.

11 A'shini napotopirinhuë', Cacoporiso itapon:

—Iyahueño anporohuan. Caso nipurinhuë', tomapico. **12** Tatahuë së'huahuachinco, nohuitarinco. Nohuitatonco: "Cacopo nonpintarinco," topachin, co inapotatoncohuë' ama huachi noya ya'huëca'huaso marëhuë' sha'huitarinco, itérin.

13 Itopirinhuë', a'shini itapon:

—Co huachi noya ya'huëcamaso marëhuë' sha'huitohuachinquën hua'hua, ca marë' niin. Quëmaso sha'huitéranguënso chachin nicaton, cato chipoa'hua quëshico, itérin.

14 Cacoposo', macontarahuaton a'shin quëshirin. Tëparahuaton, inari Isaco costarinso chachin, po'motérin. **15** Isao noya noya a'morinsopita në'mëté pëinënqué taparinsonta', manin. Inaque Cacopo a'moantérin. **16** Naporahuaton, chipoa'hua sha'huëté quëran, tanpaquënpita, cononën, inapita achinpítérin. **17** Inapotahuaton, po'morinso sënanquë o'huintérin. O'huintahuaton, panë chachin pa'pin quëtacaso marë' hua'huin quëtérin.

18 Cacoposo', pa'pin ya'huërinquë
ya'conahuaton, nontoonin:

—¡Tata! itérin.

—Ya'huarahuë conpa. ¿Inso hui'nahuënquënta
quëmaso'? itérin pa'pini.

19 —Ca mini Isaoco, paninantërancoso'. Nani
sha'huitërancoso' quëshiranquën. Huënsëaton tata,
ma'sha inanahuëso', ca'quë'. Ina piquëran noya
ya'huëca'huaso marë' sha'huitoco huachi, itérin.

20 Napotohuachina, Isacori natanapon:

—¿Onporahuatonta conpa a'naroáchin quënan
quënanaranso'? itérin.

—Sinioro chinotëranso', inaso Yosë ni'ton,
catahuarinco quënanahuëso', itérin Cacopori.

21 Pa'piniso nipirinhue', itaantarin:

—Ya'carico nipachin së'huainquën.
Tëhuëñchachin Isaonquën ninanso yanitotërahuë,
itérin. **22** Napotohuachina, pa'pini së'huacaso
marë' ya'caririn. Së'huarahuaton, tapon: “Isao
pochin tanpaquënsö' níponahuë”, Cacopo pochin
nohuianantërahuë,” ténin. **23-24** Isao tanpaquënsö'
pochin anporohuaninsö' marë' co nohuitërinhuë'.
Napoaponahuë' co'huara noya ya'huëcaso marë'
sha'huichátërasohue', naquëranchin nataantarin:

—¿Tëhuëñchachin quëma Isaonquën? itaantarin.

—Inaco mini, itérin Cacopori.

25 Napotohuachina, Isacori itapon:

—Acotoco nipachin conpa inantëranso ca'i. Ina
quëran nani coshatohuato, noya ya'huëcamaso
marë' sha'huitaranquën huachi, itérin. Napo-
tohuachina, Cacoposo' pa'pin capacaso acotërin.

Huinonta quëshirin. Isacoso', noya coshatahuaton, o'orin, naporin. ²⁶ Inaporahuaton hui'nin itapon:

—Ya'cariatonco conpa apinoco, itérin.
²⁷ Cacopori pa'pin apinocaso marë' ya'caritohuachina, Isacori a'morinso huë'ëropinën imérin.

Naporo' noya ya'huëcaso marë' iso pochin sha'huitérin:

“Naporin ta'a, ina pochin mini huë'ëropitéran.

Siniorori catahuahuachina imin noya noyatérin.

Napohuachina pimoanahuaninso pochin quëmanta huë'ëropitéran.

²⁸ Yosë nontërahuë ina nohuanton o'nan ya'huëchinquën.

Sha'tohuatan noya noya nitacaso marë' ya'huëchinquën.

A'napita nitérinso' mapi quëran, noya noya maquë quëmaso'.

Notohuaro' trico nitérinso' maquë capamaso'.

Notohuaro' huinonta ya'huëchinquën o'ocamaso'.

²⁹ Hua'huayátërahuë piyapi'sa camaiquë'.

Naciono'santa të'huatatënën natëinënquën.

Iyaparinpitanta camaiquë'. Të'huatatënën inapitanta natëinënquën.

No'huitenën co huachi noya ya'huëcamaso marëhuë' sha'huitohuachinën, Yosérinta inapotarin.

Inpitasona noya ya'huëcaso marë' sha'huitohuachinën, Yosérinta inapotarin," itérin.

³⁰ Isacori, Cacopo noya ya'huëcaso marë' sha'huitérinso', tonitérin. Tonitohuachina,

inaso pa'pin ya'huërin quëran pipirin. Pipiso chachin, Isaonta inantapon pa'nin quëran huëntararin huachi. ³¹ Huëntarahuaton, inantérinso po'mointarin. Anpirahuaton, pa'pin quëpataton, itapon:

—Huënsëquë tata, inantérahuëso po'motëranquën ca'quë'. Capaton noya ya'huëca'huaso marë' sha'huitoco huachi, itérin. ³² Napotohuachina Isacori natanin:

—¿Inquënta quëmaso'? itérin.

—Ca mini Isaoco, paninatérancoso', itérin. ³³ Hui'nin natanahuaton, Isaco pa'pi pa'yantérin. Pa'yanaton ropa ropátarin quëran itapon:

—¿Inta nipachin apípora inantérinso po'morahuaton, quëshirinco? Co quëma canquiyátërasëñquënhuë quëshirinco ni'ton, nani ya'ipi ca'nahuë: "Isao mini," ta'to, nani noya ya'huëcaso marë' sha'huitérahuë. Ipora inaso', noya noya ya'huapon huachi, itérin. ³⁴ Pa'pin naporinso natanahuaton, Isaoso co napion cancantaton na'nëmiatérin. Na'nëton pa'pin nontérin:

—¡Canta tata, noya ya'huëca'huaso marë' sha'huitoco! itérin ³⁵ Itopirinhuë', pa'pini itapon:

—Iyaa'hua huë'sahuaton nonpintiirinco ta'a. Quëma pochin ancantato, noya ya'huëcaso marë' sha'huitérahuë, itérin.

³⁶ —¡No'tën chachin inaso', Cacopo itopi paya! ¡Nani catoro monararinco! Paninan ninahuëso marë' ya'huëtiincoso nininso'ton, matérinco. Iporanta', tatahuë noya ya'huëca'huaso marë' sha'huitiincoso' mataantarínco. ¿Co'tama canta', pi'piyan téranta noya ya'huëca'huaso marë'

sha'huitaponcohuë' to? itérin. ³⁷ Napotohuachina, Isacori itapon:

—Ni'quë conpa: Nani Cacopo sha'huitérahuë camairápainquënso'. Ya'ipi quëmopinënpita camairápaso marë' nani sha'huitérahuë. Hua'huayátérahuë, trico, huino, inapita ya'huëtacaso marë' Yosë nontérahuë. Inasá tiquiantérahuë ni'ton, jquëma marëso' capa huachi ta'a! itérin. ³⁸ Itopirinhue', Isaoriso chiníquën nontaantarin:

—¿Iyayáchin noya ya'huëcaso marë' sha'huitacaso ya'huërin ti? ¡Canta onpopionta inapotoco! itérin. Napotahuaton chiníquën na'nëantarín.

³⁹⁻⁴⁰ Napohuachina, Isacori itapon:
“Quëmaso nipirinhue', noyarop'a' aquëtë ya'huaran.

O'nan pahuaninquë ya'huëapon.

Noya ya'huëcaso marë' ahuëtápamaso ya'huapon.

Iya'hua camairáponquën.

Napoaponahuë', chini chiníquën nipatan, iya'hua quëran, pipiaran huachi,” itérin.

Cacopo iin ta'anapirinso'

⁴¹ Naporo quëran huarë' Isaori Cacopo pa'pi no'huirin huachi. Inasá pa'pini noya ya'huëcaso marë' sha'huitérin ni'ton, naporin. Napoaton yonquiráin: “Payo tata chiminapon. Ina chiminpachin, Cacopo tëpaarahuë,” ténin. ⁴² Isao napo yonquitérinso', Nipicaso nitotérin. Napoaton Cacopo amatahuaton, itapon:

—Ni'quë hua'hua. Iya masho, napotéranso marë' yatëparinquën natantérahuë. ⁴³ Napoaton

noya natanco sha'huichinquën. A'naroáchin Aran ninanoquë ta'aquë'. Api masho Napano pëinënquë paquë'. ⁴⁴⁻⁴⁵ Inaquë paaton, hua'quimiachin yacapaontaqué'. Iya masho no'huitérinso' sanoquë huarë', inaquë ya'huëcontaqué'. Co huachi quënanpachinquënhuë', napotéranso' nariantapon. Naporo' huënantamaso marë' amataranquën. Co nohuantérahuë' naporo chachin catonquéma chiminamaso', itérin.

⁴⁶ Ina quëran Nipicaso', Isaco nontapon pa'nin:

—Iti sanapi'sa Isaori maninso' co noyahuë' nipi ni'ton, chiminchináchin cancantérahuë. Cacopo ya'huërë' ina sanapi chachin, iso Canaan ro'tëquë ya'huërinso maantahuachin, chimina'huaso noya noya nisarin, ténahuë, itérin.

28

¹ Nipicari napotohuachina, Isacori, Cacopo amatahuaton, noya nontérin. Co no'huirinhuë'. Noya ya'huëcaso marë' sha'huitaton itapon: "Yosë noya catahuainquën conpa," itérin. Napotahuaton pënénin: "Ama iso Canaan no'paquë sanapi máquësohuë'. ² Patan-aran parti têhuëñchinso' paquë'. Tata masho Pitoiro ya'huërinquë pa'sahuaton, api Napano hui'ninpita a'nara maquë'. ³ Yosë ya'ipi nanitaparinsó' catahuainquën. Na'a hui'nanpita quëchinquën. Quëmá quëran na'a naciono'sa pipicaso marë' inapochinquën. ⁴ Yosëri Apraan noya ya'huëcaso marë' sha'huitérinso chachin, quëmanta quëchinquën. Quëma shiparinpitanta', inachachin quëchin. Iso no'pa' ipora yacapatéréhuaso', quëchinquëma'. Yosëri nani Apraan sha'huitérin

ni'ton, quëtarinquëma'," itërin. ⁵ Ina pochin Isacori Patan-aran parti Cacopo a'parin. Cacoposo' pa'sahuaton, Napano ya'huérinquë canconin. Nani sha'huirahuëso chachin inaso', Pitoiro hui'nin. Pitoiroso' Aran piyapi. Napanoso', Nipica yo'in miáchin. Nipicanta', Cacopo, Isao, inapita a'shina'.

Isao sa'antarindo'

⁶ Isaoso', pa'pini, Cacopo noya ya'huëcaso marë' sha'huitérinso' ni'nin. Patan-aranquë sa'acaso marë' a'parinsonta', ni'nin. Naporahuaton, pa'pini noya ya'huëcaso marë' sha'huitapon pochin: "Ama Canaan sanapi máquësuhuë," itérinsonta natanin. ⁷ Pa'pini, a'shini, sha'huitérinso chachin Cacoponta', Patan-aranquë pa'ninso' ni'nin. ⁸ Pa'pin inaporin ni'ton, Isaoso': "Canaan sanapiso', co tatahuë costarinhuë," tënин. ⁹ Napoaton, Ismairo nicapon pa'nin. Inaso', Apraan hui'nin. Inatohua paaton, Ismairo hui'nin Maarata itopiso' maantarin. Inaso', Nipayo oshia'huain. Nani cato Canaan sanapi macaponahuë', inanta maantarin.

Yosëri Cacopo ya'notérinso'

¹⁰⁻¹¹ Cacopo Piirsipa quëran pipirahuaton, Aran ira pa'térin. I'huatohuachina, quëparitérin huë'eton pacacaso marë'. A'nara na'pi masahuaton, motoantacaso marë' acorin. Ina motoantaton huë'érin. ¹² Naporo tashi huë'eton, hua'narin: A'nara nanpënan no'paqué paquérahuatón, Yosë ya'huérinquë huarë' nincanin ni'nin. Ina nanpënanquë chachin, pancatë ni'ton, Yosë anquëninënpita a'naquën pantarapi,

a'naquënso o'marapi. ¹³ Naporahuaton, Sinioro chachionta', ina pirayan huaniarin ni'nin. Inari nontaton, itapon: "Caso Sinioroco. Quëmaquën Tata masho, Apraan itopiso' chinotérinco. Tata parionta chinotérinco. Quëhuëntéranso' no'pa' quëtaranquën. Shiparinpita', iso no'pa chachin hua'anëntapona'. Isoso no'pa', Canaan itopi. ¹⁴ Ca nohuanto shiparinpita na'amiatapona'. Mo'shi pochin na'apona'. Norti parti, sor parti, pi'i pipirinso parti, pi'i ya'coniniso parti, ya'ipi inapita parti hua'anëntapona'. Quëmá quëran, ya'ipi piyapi'sa nisha nisha nipesopita catahuuararahuë. Shiparinpita quëraonta inapotarahuë. ¹⁵ Ni'quë'. Carinquën ca'tanaranquën. Intópanta pa'patan, carinquën a'paiaranquën. Carinquën chachin iso no'paquë quënantaranquën. Co onporonta pataranquënhuë', ya'ipi sha'huitéranso' naniquë huarë' catahuuararanquën," itérin.

¹⁶ Cacoposo' capayatahuaton, yonquirin: "Tëhuënchachin Sinioro isëquë ya'huëapirinhuë', co caso nitotérahuë", ténin. ¹⁷ Napoaton, pa'pi pa'yanin. Pa'yanaton tapon: "Iso ro'tëso', Yosë chinotacaso marë' nónya. Isëquë chachin, Yosë pëinën* ya'huërin. Naporahuaton ¡Yosë ya'huërino ya'coananën!" ténin.

¹⁸ Tahuëririnquë Cacoposo', tashíramiachin capayatahuaton na'pi motoantérinso manin. Masahuaton, nohuitacaso marë' onë pochin ahuanirin. Naporahuaton ina aipi toma opotérin. Inapotahuaton, Yosë marë' acorin. ¹⁹ Inaquë chachin iráca a'na ninano ya'huërin. Noso

* ^{28:17} Yosë pëinën: Iprio nananquëso', Pitiri itopi.

itopiso'. Ina pochin nohuitopirinahuë', Cacopori nisha nininën acotaton, Pitiri itërin. ²⁰⁻²¹ Inaquë Cacopori Yosë sha'huitaton itapon: "Quëma chachin ipora iratérahuëqué ca'tanco. Quëma nohuanton cosharo', a'moca'huaso', inapitanta ya'huëchinchco. Naporahuaton quëma nohuanton tatahuë ya'huërinquë, noya huënanta'i. Inapo catahuahuatanco: 'Sinioroíchin Yosënëhuë,' ta'to, chinotaranquën. ²² Iso na'pi onë pochin ahuanirahuësonta', quëma pëinën nisarin. Naporahuaton, ya'ipi quëtéranco quëran, pi'pian quëtáponquën. Shonca canahuato a'nara quëchinquën," itërin.

29

Cacopori Napano yacaparinso'

¹ Cacopo pa'sápaton, pi'i pipirinso parti ya'huëpisopita ya'huërinquë canconin. ² Ninano ya'cari', a'na poso quënanconin. Ina pirayan cara huënton ohuicaro'sa i'sha o'shitacaiso marë' achinotapi. Ina pososo', pancatë na'piquë a'tantopi. ³ Ya'ipi ohuica huëntono'sa niyontonpachinara, a'paipisopitari naní quëran yamotahuatona', chi'huincapi. Ohuicanëna o'shitacaiso marë' inapopi. Nani o'opachinara, naquëranchin inaquë chachin a'tantaantapi.

⁴ Cacopori a'paipisopita natanin:

—¿Intoparanta canpitaso iyaro'sa'? itërin.

—Aran quëran quiyaso' ta'a, itopi.

⁵ —¿Nohuitërama canpita Nacoro hui'nin, Napano itopiso' to? taantarín Cacopo.

—Nohuitërai mini, itaantapi.

⁶ —¿Noya ya'huëarin? itaantarin.

—Noya mini ya'huarin, itopi. Napotahuatona':

—¡Ma'tana hui'nin Naquira itopiso' huë'sarin! Ohuicanënpitarë chachin huë'sarin, itaantapi.

⁷ Naporor' Cacopo tapon:

—Yono pi'i ya'huëarin ni'ton, pahuanarin ohuicaro'sa huë'érinquë oncorapicaso'. ¿Onpoatonta co o'shitatoma pasto capacaiso marë' quëpaantaramahuë'? itérin.

⁸ —Co nanitëraihuë' inapoca'huaiso'. Ya'ipi ohuica huëntono'sa a'paipisopitarë chachin niyontonacaiso' ninarai. Naporor' huarë' nanitërai na'pi chi'huincatahuatoi, ohuicaro'sa o'shita'huaiso', itopi.

⁹⁻¹⁰ Inapita nontaso', Naquiraso' pa'pin ohuicanënpitarë chachin canquirin. Inari pa'pin ohuicanënpita a'paitérin. Ina ni'sahuaton, Cacoposo' a'naroáchin posoqué pa'nin. Pa'sahuaton, na'pitë masho chi'huincatérin. Chi'huincatahuaton, apin ohuicanënpita o'shitérin. ¹¹ Ina quëran Naquira apinorahuaton: "Thuata oshi," itérin. Napotahuatón, na'nérarin.

¹² Cacopori sha'huitérin: "Caso quëmaquën tata, apihuëmiáchin. Quëmaquën a'shacha Nipica itérmaso hua'huinco ni'to, naporahuë," ténin. Ina natanañaton, Naquiraso ta'arë'nachin pa'pin sha'huitapon pa'nin.

¹³ Cantonahuaton sha'huitérin: "A'shacha Nipica hua'huin, Cacopo itopiso' canquirin," itérin. Ina natanañaton, Napanoso ta'arë'nachin nicapon pa'nin. Quënanconahuaton apinorin. Apinorahuaton: "Ihuata api," itérin. Nontahuatón pëinënqué quëparin. Inaque Cacopori ya'ipi naporinso apin sha'huitérin.

14 Napanori natanahuaton itapon: “Quëmaso' tēhuëñchachin quëmopinëhuëñquën ninan,” itérin.

Sanapi marë' Cacopo sacatérinso'

Cacoposo' Napano pëinëñquë a'na yoquira' nani yacapatérin. **15** Ina piquëran Napanori itapon:

—Quëmopinëhuëñquën nipayanhue', co topinan asacata'huanquënsa ya'huërinhue'. Sha'huitoco onposo canacamaso nohuantéranso'. **16** Napanoso' cato hui'ninpita nano'sa ya'huëterin: Paninanso' Nia itopi. Ina piquëran niantarinsoso', Naquira itopi. **17** Niaso', noyápiachin ya'pirahuanin. Naquiraso nipayanhue', noyápiroyanchin, co máquëñ téranta tēhuërinhue'. **18** Cacoposo' Naquira costaton, apin itapon:

—Hui'nan hua'huas nininso', Naquira itéremaso nohuantérahuë. Ina marë' canchisë pi'ipi quëma marë' sacatarahuë, itérin. **19** Napotohuachina, Napanori itapon:

—Naporan ni'quëhuarë', quëmari maquë nipayachin. Nishaso quëtacaso', co noyahue'. Yacapatonco sacatéquë nipayachin, itérin. **20** Inapoaton Cacoposo' Naquira marë' canchisë pi'ipi sacatérin. Hua'qui sacatopirinhue', Naquira pa'pi nosoraton, cara tahuëriíchin sacatérinso pochin cancellérin.

21 Nani canchisë pi'i sacatohuachina, Cacopori Napano itapon:

—Acoantoco huachi hui'nan. Sha'huitéreranquënsa' nani nanirahuë huachi, itérin. **22** Napotohuachina Napanoso' ya'ipi ya'huërin pirayan ya'huëpisopita, amatérin. Cacopo sa'arinquë pita nicacaso marë'

amatërin. ²³ Napoaponahuë' nani tashihuachina, Napanoso Naquira ya'huërenamën Niasa', Cacopo acoantérin. Inaso co nohuitatonhuë', ichihuë'érin. ²⁴ Naporahuaton Napanori, a'nara piyapinën sanapi nininso Nia nicanarin. Camaicaso marë' nicanarin. Inaso sanapi Siripa itopi.

²⁵ Tahuëririnquë tashíramiachin Cacoposo', Nia ichihuë'érinso ni'nin. Ni'sahuaton, pa'pi pa'yantérin. Napoaton Napano chiníquën nontérin:

—¡Co napochitoncohue' pora! ¡Co'ta Naquira marë' nani sacatérahuë! ¡Nani nonpintéranco ni'sora! itérin.

²⁶ —Isèquëso api, co hua'hua nininso'ton, aso'yaraihuë'. ²⁷ Nia mananso marë' a'na simana pita nicacaso ya'huërinso', naniquë'. Ina nanihuatan, Naquira ya'huëré' acoantaranquën. Canchisë pi'i chachin ca marë' sacatacaso' nohuantohuatan, inapotaranquën, itérin Napanori. ²⁸ Napotohuachina, Cacopo nohuantérin. Nia maninso marë' simana pita imapiso nanihuachinara, Napanori, Naquira ya'huëré' acoantérin. ²⁹ Napanori, a'nara piyapinën sanapi nininso' camaicaso marë' Naquiranta nicanarin. Ina sanapiso' Pira itopi. ³⁰ Nani acoantohuachina, Cacoposo', Naquira ichihuë'érin huachi. Inapoaton ina na'con na'con nosororin. Niaso nipirinhuë', co onpopinchin nosororinhuë'. Canchisë pi'ipi chachin Napano marë' sacataantacaso' niponahuë', nosororin.

Cacopo hui'ninpita nininso'

³¹ Cacoposo', Nia co onpopinchin nosororinhuë'. Ina nitotaton, Siniyorori catahuarin

hua'huanacaso marë'. Naquiraso nimirinhue', ina nohuanton chachin, co nito hua'huaninhue'.
32 Niaso', cayorahuaton quëmapia'huaya huairin. Inaso', Nopino itérin. "Siniro sétérahuëso' nicaton, catahuarinco. Hua'huanahuë ni'ton, iporaso' so'yahuë nosoroaponco huachi," ta'ton, ina pochin hua'huin nohuitérin. **33** Naquéranchin, cayoantaráhuaton, quëmapia'huaya huaiantarin. Inaso', Simion itérin. "Nocaninacoso' Siniro natanin. Natanaton catahuarinco. Napoaton a'na hua'huasha quëtaantarínco," ta'ton, ina pochin hua'huin nohuitérin.
34 Naquéranchin cayoantaráhuaton, quëmapi chachin hua'huantarín. Inaso', Nihui itérin. "Nani cara hua'huanahuë ni'ton, iporaso' so'yahuë na'con na'con chinpitaponco huachi," ta'ton, ina pochin hua'huin nohuitérin. **35** Niaso', naquéranchin cayoantaráhuaton quëmapia'huachachin huaiantarin. Inaso Cota itérin. "Iporaso' huachi, Siniro pa'yatato chinotaráhuë," ta'ton ina pochin hua'huin nohuitérin. Nani catapini hua'huanahuaton, copi ténin huachi.

30

1 Naquira co nito hua'huanatonhue', Cainpain noyaparin. Napoaton so'in itapon:

—Hua'huantoco canta'. Co'so' hua'huantohuatancohue', chiminarahue, itérin.

2 Cacoporiso nimirinhue', no'huiton itapon:

—¡Co caso Yosécuhue! Ina co nohuantérinhue ni'ton, co hua'huananhue', itérin.

3 Napotohuachina, so'in itapon:

—Ni'quë'. Piyapinéhuë Pira itéréhuaso', maqué topirahue. Ina mapatan hua'huanpachin, cari

masarahuë. Hua'huahuë chachin nicacaso marë' masarahuë. ⁴ Inapoaton, Naquirari piyapinën Pira itopiso', so'in acoantérin. Acoantohuachina, ichihuë'érin. ⁵ Piraso', cayorahuaton quëmapia'huaya huairin. ⁶ Naporo' Naquira tapon: "Isoso hua'huasha, Tano itarahuë. Yosë nontërahuëso' natananatonco: 'Tëhuëñchachin quëmaso' noya ninan ni'ton, catahuaranquën huachi,' itérinco. Napoaton a'nara hua'huasha quëtérinco," ténin. Ina yonquiaton ina pochin nohuitérin. ⁷ Ina quëran Pira cayoantarahuaton, quëmapia'huaya chachin huariantarin. ⁸ Naporo' Naquira taantarin. "Iso hua'huashaso', Nipitari itarahuë. Na'con caipayarë'co nichinitërai, iporaso huachi nani minsërahuë," ta'ton ina pochin nohuitérin.

⁹ Nianta co huachi hua'huanacaso nanitërinhuë'. Napoaton piyapinën Siripa itopiso' Cacopo acoantérin. ¹⁰⁻¹¹ Siripa ya'huërë' cayoaton hua'huanpachina, Niaso tapon: " '¡Ma noyacha nisharahuë paya!' ténahuë. Napoaton iso hua'huashaso', Caro itarahuë," ténin. ¹² Ina piquëran Siripaso', a'na ya'huërë' hua'huaantarin. ¹³ Naporo' Niaso'tapon: "¡Ma noyacha ya'huërahuë paya! Iporaso ya'ipi sanapiro'sa': '¡Ma noyacha inaso ya'huërin paya!' itaponaco ta'to, iso hua'huashanta', Asiri itarahuë," ténin.

¹⁴ Trico macacaso tahuëri'sa', Nopino pa'sahuaton, mantracora huayo itopiso' quënanconin. Ina masahuaton, a'shin quëshimarin. Ina quënapataton Naquirari itapon:

—Hua'huan mantracora huayo
quëshirinquënso', quëtoco canta topirahuë, itérin.

15 Napotopirinhüë', Niari itapon:

—Ayon caira. ¡Ama napopitéraquësohuë! ¡So'yahuë nani osérëtéranco! Hua'huahuë ya'huëre' mantracora huayo quëshirincosonta' ¿yaosérëtaantamaranco ti? itérin.

—Ina quëtohuatanco, ipora tashi Cacopo quëmarë' huë'ëpon, itérin Naquirari. **16** Tashi huarë' Cacopo pasto quëran huënantahuachina, Niari nacapirahuaton:

—Hua'huahuë mantracora huayo quëshirincoso', nani Naquira quëtérahuë. Quëmaro'co ipora tashi huë'ëca'huaso marë' inaquë pahuërëtérahuë, itérin.

Napotohuachina, naporo tashi Niaso', Cacopo huë'ëparin. **17** Hua'huanacaso marë' orarinsø Yosëri natanahuaton, catahuarin. Napoaton Niaso', a'natérápo hua'huinpita nicacaso' cayoantarin. **18** Nasitohuachina tapon: "Isoso' hua'huasha, Isacaro itarahuë. Camairahuëso sanapi so'yahuë acoantérahuë ni'ton, Yosë acanarinco," ta'ton, ina pochin hua'huin nohuitérin.

19 Ina quëran Nia cayoantaráhuaton, saota nicacaso' hua'huantarín. **20** Nasitohuachina taantarín: "Iso hua'huashaso', Saporono itarahuë. Noya nininso chachin Yosë nicararinco. Nani saota hua'huasha a'notérahuë ni'ton, iporaso' so'yahuë noya noya ni'sarinco," ta'ton, ina pochin nohuitérin. **21** Nitiquioninquë Niaso', sanapia'huaya hua'huanin. Nasitohuachina, Tina itérin.

22 Naquiraso co hua'huana'pihuë ni'ton, na'con Yosë nontérin. Napohuachina, napoian quëran nosoroaton a'panirin. Ina nohuanton hua'huanin

huachi. ²³ Paninantérinso' huaihuachina, tapon: "Co hua'huana'picohue' nicato tapanápirahuë'. Yosë chachin catahuarinco ni'ton, hua'huanato co huachi tapana'huaso ya'huérinhue'. ²⁴ A'na ya'huérë' Sinioro quëtaanta'inco topirahuë," ta'ton, Cosi itérin.

Cacopo Napanorë', ninonpintopiso'

²⁵ Cosi nasitérin piquérän Cacoposo', Napano itapon:

—Ya'huérahuëquë chachin yapanantapirahuë'.

²⁶ Sa'ahuëpita, hui'nahuëpita, inapita quëtoco. Nani inapita marë' sacatérahuëso' nanirin. Quëma nitotérän onpo sacatérahuësona ni'ton, quëpai huachi topirahuë, itérin. ²⁷ Napotopirinhue', Napanoriso' itapon:

—Ama napoquësohuë api. Quëma yacaparanco ni'ton, Sinioro catahuarinco. Ani'tato, ina nitotérahuë. Napoaton quëparitéquë ténahuë. ²⁸ Sha'huitoco onposona canacamaso nohuantéranso'. Nápo chachin pahuérë'inquën, itérin.

²⁹ Napotohuachina, Cacopori itapon:

—Quëma marë' onpo sacatérahuëso', nani nitotérän. Pë'tahanenpitanta noya a'pairahuëso', nani nitotérän. ³⁰ Co'huara huë'shátérapohue', caraíchin ya'huétérinquën. Iporaso nimirinhue', pa'pi notohuaro' na'amiatérin. Huë'nahuë quëran huarë' Sinioro catahuarinquën. Iporaso huachi canta', caora marë' sacata'huaso' nanirin huachi, itérin.

³¹ —Caquë chachin sacataantacaso marë' ¿on-pota pahuérë'inquën? taantarín Napano.

—Ama coriqui pahuérëcosohuë'. Apira sha'huitaranquënso' nohuantohuatan, quëma marë' sacataantarahuë. ³² Ipora tahuëri pë'tahuanënpita huëntonënquë pa'sarahuë. Pa'sahuato, yaráton carniroa'huaros'a', niquë acoarahuë. Naporahuaton chipoa'huaros'santa ninshipiton nipo', niquë acoarahuë. I'coapi nipsisopitanta inapotarahuë. Inapita quëran pahuérë' quënanahuaso marë' napoarahuë. ³³ Inapohuato, a'na tahuëri canarahuëso ni'quihuatan, no'tëquën sacatérahuëso nitotaran. Pë'tahuatérahuëquë, i'coapiro'sa', ninshipitono'sa inaporáchin chiporo'sa quënanaran. Naporahuatón, yaráton carniro'saráchin quënanaran. Nisha quënanpatanso', ihuaranquën ni'ton, naporin, itérin Cacopori.

³⁴—Noyapa'. Inapoa'a nipaçhin, ténin Napano.

³⁵ Napoaponahuë', naporor tahuëri chachin inaso chiporo'sa hui'tonpi nipsisopita, i'coapi nipsisopita, nisha acorin. Chipo sanapi'santa ninshipiton, nipo', inaquë acorin. I'coapiro'sa', máquënso téranta huiritopisopita, inapitanta inaquë chachin acorin. Ya'ipi yaráton carniroa'huaros'santa', inapotérin. Inapotahuaton hui'ninpitari a'paicaiso marë' quëtérin. ³⁶ Ina quëran, pë'tahuaros'a huayoninsopitarë chachin Napanoso', Cacopo ya'huéarin quëran, cara tahuëri iratatë pa'në'pa', pa'pi.

Cacoposo nipiñihuë', co manta taponahuë', a'napita ohuicaro'sa Napanonquën a'paitarin. A'paitapon pochin canacaso marë' isoporin: ³⁷ Nara së'paro'sa huara napapiráchin nanpi së'patérinso' pë'shitérin. Isopita nararo'sa së'paquën

napotérin: Aramo, ni'to', tanpapi, inapita së'paquën manin. Masahuaton, hui'tona'piarin. Hui'toninsopitanta', i'shotéra'piarin. Acopo huiritérinso ya'nocaso marë', inapotérin.

38-39 Ina quëran huararo'sa hui'tonanpinan nininso', pë'tahuaroso' sa huëntonën notënanquë acorin. I'sha o'opiquë acorin. Inaquë pë'tahuaroso' sa nito'quëpi ni'ton, naporin. Huararo'sa notërahuatona quëmapi nipesopita to'quëtopi. Inapohuachinara hui'ninpitaso': Hui'tontono'sa', ninshipitono'sa', i'coapiro'sa', inapita hua'huatapi. **40** Naporo' Cacoposo', inapita nisha acorarin huachi. Inapotérinso', Napano pë'tahuanënpita yaratono'sa', hui'tontono'sa', inapita notënanquë acooonin. To'quëcaiso marë' acooonin. Inapoaton Cacoposo', Napano pë'tahua huëntonën quëran na'apisopita, inaora huëntonënquë acoaton ana'atarin huachi. **41** Panca panca pë'tahuaroso' sa nipesopita huënaitohuachinara, i'sha o'opiquë huararo'sa acorin. Nito'quëapona pochin huararo'sa notëcaiso marë' naporin. **42** Mashiraa'huaro'sa huënaitohuachinaraso', co huararo'sa acorinhué'. Napoaton pi'pira'huaya nipesopitaso', Napano marë' ninin. Ya'huëré' panca pancaro'saso', inaoranquën ninin. **43** Inapoaton inaso', pa'pi ma'huanin. Pa'pi notohuaro' ohuica ya'huëtahuatón, piyapinënpitanta quëmapi'sa', sanapi'sa', ya'huëtérin. Notohuaro' camiyoro'sa', moraro'sa', inapitanta ya'huëtérin.

31

Cacopo, mi'sën ta'anapicaso yonquirinso'

¹ Ina quëran Cacoposo', mi'sënpitari pinorinso' natantérin: "Cacoposo' tata pë'tahuanënpita matahuaton, pa'pi ma'huanin," topi natantérin. ² Naporahuaton Napanori chachinta', co huachi iráca pochin nitérinhue' ni'nin. ³ Naporo' Siniorori Cacopo itapon: "Tataparin, quëmopinënpita, inapita ya'huérinso parti panantaquë'. Carinquen ca'tanatënquen catahuaranquen," itérin.

⁴ Ina natanaton, Naquira, Nia inapita pastoquë amatérin. Inaora ohuicanënpita a'pairinquë amatérin. ⁵ Huë'pachinara, itapon:

—Tataparima co huachi iráca pochin noya ni'nincohuë'. Yosëso niperinhue', ca'tanatonco catahuarinco. Inaso' tatahuéri chinotérinso'. ⁶ Canpitaso', nani nitotërama tata marë' chiniquen sacatërahuëso'. ⁷ Naporahuaton nonpintahuatono co no'tequen pahuërérincosohuënta', nitotërama'. Napoaponahuë', Yosë catahuarinco ni'ton, co aquëtë huarë' ihuarincohuë'. ⁸ A'na tahuéri tataso' ténin: "Ninshipitono'sa quëchinquen sacatëranso marë'," topachina, ya'ipi sanapi ninshipitonáchin hua'huanpi. A'na tahuërinta: "Hui'tontono'sa quëchinquen sacatëranso marë," taantahuachinaso', hui'tontono'sáchin hua'huataantapi. ⁹ Yosë nohuanton ina pochin tata pë'tahuanënpita hua'huatopi. Canpoanquen nicacaso marë' napopi.

¹⁰ A'na tahuéri pë'tahuar'o'sa huënaitaso', hua'narahue. Chipo mashoro'sari, chipo sanapi'sa to'quësapi hua'narahue. To'quëtona'piro'saso', a'naquenso hui'tonpiro'sa', a'naquenso ninshipitono'sa', a'naquëonta

i'coapiro'sa', inapita quënanahuë. ¹¹ Naporochachin Yosë anquëninën pérarinco: “¡Cacopo!” itérinco. Itohuachincora: “Iséquë nisarahuë,” itérahuë. ¹² Napor'o anquëni itérinco: “Noya ni'quë', ya'ipi chipo mashoro'sa', chipo sanapi'sa to'quëpisopita, hui'tonpiro'sa', ninshipitono'sa', i'coapiro'sa', inapitaráchin to'quërapi. Napano nonpintérinquëndo nitotato, ni'nanso chachin a'ninquënta nicacaso marë' catahuaranquën. ¹³ Ca mini Yosëco, iráca Pitiriquë ya'notéranguen. Inaquë na'pi tomaquë opotahuaton, chinotaancoso marë' acoran. Naporahuaton inaquë chachin casáchin chinotaancoso marë' sha'huitéranco. ¡Manóton huëquë pa'a! Iso no'pa quëran pipirahuaton, hua'huatéranso no'pa parti panantaquë", itérinco, ténin Cacopo.

¹⁴ Ina topachina, Naquira, Nia, inapitari itapon: —Quiyanta mini tata chiminpachin, co huachi ma'sha téranta maca'huaiso ya'huérinhuë'. ¹⁵ Naporahuaton ipora chachin nisharo'sa pochin tata ni'nincoi huachi. ¡Pa'anpitérarincoroi ni'ton, quiya marë' pahuérétaton ina nápo sacatéran! ¹⁶ No'tequëñ chachin Yoséri, tata ma'shanënpita, matahuaton, canpoa quëtérinpoa'. Inaso' canpoanquën, hua'huanpoapitanquën. Napoaton, ma'sona Yosë sha'huitérinquëndo', niquë huachi, itopi.

Cacopo ta'arinso'

¹⁷⁻¹⁹ Sa'inpitari napotérin ni'ton, Cacoposo Canaan parti panantacaso yonquirin. Pa'pin ya'huérinso no'paquë paantacaso marë' tapatarin

huachi. Napanoso' a'na parti ohuicanënpita ya'iapon pa'nin. Inaque pa'nins'o' Naquirari, pa'pin mamanshinënpita ihuarin. Ya'ipi quëmopinënpitarë chachin mosharinso', ihuarin. Cacoposo' sa'inpita, hui'ninpita, inapita, camiyoro'saquë a'mitérin. Pè'tahuanënpita, ma'shanënpita, ya'ipi inapita quiquirin. Ya'ipi inapitaso', Patan-aranquë sacataton canarinso'. ²⁰ Inapoaton Cacopori, Napano nonpintahuaton, co sha'huitaponahuë' huëshirin. ²¹ Ya'ipi ma'shanënpitarë chachin Cacoposo', ta'arin. Co hua'quiya quëranhuë', Iopiratisiiquë pëntoitahuatona', Carata motopiro'sa parti, notëëtérin.

Napanori Cacopo imaquirinso'

22 Cara tahuëri quëran Napanoso', Cacopo ta'arinso' nitotérin. ²³⁻²⁴ Ina nitotaton, quëmopinënpitarë chachin, imaquirin. Canchisë tahuëri quëran, Carata motopiro'sa parti canquipi. Napoaponahuë', naporo tashi Yosëri huë'enquë ya'notaton itapon: "Natanquë Napano sha'huichinquën. Ni'quëna Cacopo no'huiton ma'sha onpototan. Tananpitëquë pa'in," itérin. Tahuërianpitahuaton Napanoso', ²⁵ piyapinënpitarë chachin Carata motopiro'saquë Cacopo nincantopi. Ina motopiro'saquë inanta', huëntonënë chachin chinotopi. Napanonta ina motopiro'saquë chinotaponahuë', co niquënanyátërapihuë'. ²⁶ Cacopo quënanahuaton, chiníquën nontérin:

—¡Pa'pi co noyahue' ninan! ¡Co nonpin-chitoncohuë' pora! Ahuëtahuatë sanapi'sa

manëso pochin hui'nuhüepita quëshiaranco.
 27 Nonpintatonco, co sha'huitaponcorahuë' ta'aiaran. ¡Co naporëhuë! Ya'huéranguë yapaantaranso sha'huitérano naporini, noya ninontatéhu capa cancanchitërihuahuë'. Pita nícatéhu': Tinton, arpa, inapita pi'nipiquë ninonchitërihuahuë'.
 28 Hui'nuhüepita, shihuëpitanta', ichita'iran ni'ton, co apinoto nonta'huaso' quëtérancohuë'. ¡Co manta yonquirëhuë pochin ninan! 29 Nohuantérahuë naporini, ma'shátérahuë ya'ipinquëma ana'inchitënquémahuë'. Napoaponaahuë', achin tashi chachin Yosë nontérinco. Inaso' tataparionta chinotérin. Huë'ëhuëquë ya'notatonco nontérinco: "Natanquë Napano sha'huichinquën. Ni'quëna Cacopo no'huiton ma'sha onpototan. Tananpitëquë pa'in," itérinco.
 30 Tataparin ya'huérinquë ya'nipishahuë yapantaton huë'saran ni'quëhuarë', ¡co mamanshinëhuëpitaso' ihuatonco quëeitonhuë' pora! itérin Napanori.

31 Napotohuachina, Cacopori Napano itapon:
 —Të'huatatënquën topinan huë'sarahuë: "Paanta'huaso sha'huitohuatoso', sa'ahuëpita osérétamarinco," ta'to, naporahuë. 32 Nipirinhue', insosona térranta mamanshinënpita matahuateñquën, quësahuachin, ¡chimiin! Ma'sona térranta quëmaquën nininso' quësahuato, ya'ipi quëmopinënpoapita ni'tonënquë a'noquë'. Inapotaton quëpamantaquë', itérin. Napopirinhue' Cacoposo', Naquirari pa'pin mamanshinënpita ihuarinso', co nitotérinhuë'. 33 Naporo' Napanoso', mamanshinënpita yoniton patë patérantarín. Cacopo në'mëtë pëinënquë'ton

ya'conin. Pipirahuaton, Cacopo cosonanënpita nininquë, ya'coantarin. Nianquën nininquënta ya'conaponahuë', co mamanshinënpita quënaninhuë'. Ina quëran pipirahuaton, Naquiranquën nininquë ya'huërë' ya'coantarin. ³⁴ Naquiraso' mamanshiro'sa masahuaton, po'orin. Camiyoquë huënsëcaiso marë' nitopisoanaquë po'orin. Inapotahuaton, ina aipi huënsëtérin. Pa'pinso' ya'ipi në'mëtë pëianaque yonípirinhuë', co quënaninhuë'. ³⁵ Naquirari itapon:

—Tata, co huanirahuëso marëhuë', ama no'huicosohuë'. Sanapicoi inachintéraiso tahuëri nanitérinco ni'ton, huënsëárahuë, itérin. Napanori mamanshinënpita yonisápirinhuë', co quënaninhuë'.

³⁶ Co quënanpachinahuë', Cacopo ya'huërë' no'huitaton Napano chiníquën nontérin.

—¿Maquëta tēhuëtéranchuëñ ni'nan? ¿Ma'ta onpoato oshahuanahuë ni'ton, co napión cancantaton imaquirancoso'? ³⁷ Ya'ipi ma'shanëhuëpita o'quiaton yoniran. ¿Ma'ta quënaparanco quëmaquëñ nininso'? Ma'sona quënanpatan, a'ninquëchin, quëmopinënpita notënanquë acoquë'. Quëmopinëhuëpitarinta', ni'in. Inapita sha'huichinpoa' insosona no'tëquëñ noninso'. ³⁸ Cato shonca pi'i quëma marë' sacatérahuë. Naporo' co a'na ohuica téranta', co a'na chipo téranta ana'huarinhuë'. Huëntonënpita quëran, co a'na carniro téranta', capitéranchuëñ. ³⁹ Ni'niro'sari pë'tahuanënpita tēpahuachinara, co onporo téranta a'nota'huanquëñso marë' quëshiranquëñhuë'. Caoranquëñ masahuato,

acoantarahuë. Tahuërihuë nípon, tashihuë nípon, ihuatohuachinanta', ca apahuërtérancó.

40 Tahuëri nípachina pi'i acorinco, tashinta nípachina sëhuën acorinco. Pë'tahuaros'a a'paito, huë'ei natanahuë. Inapoato nohuantaso' parisitérahuë.

41 Cato shonca pi'i quëma marë' sacatato, ya'ipi inapita ahuantérahuë. Cato hui'nampita marë' shonca catapini pi'ipi sacatérahuë. Pë'tahuanënpita marënta', saota pi'i sacatérahuë. Naporahuaton, apira apira pochin nisha nisha cana'huaso sha'huitérancó.

42 Apraan chinotérinso catahuarinco. Tata Isaconta', inachachin chinotérin. Co'so' ina catahuarincohüe naporini, topinamiáchin ya'huërahüequë a'pa'itoncohüe'. Yosëso nípirinhüe', parisitérahuëso' nitotérin. Chiníquën sacatato ma'sha ya'huëtérincosonta', nitotérin. Napoaton achin tashi pënëninquën, itérin Cacopori.

Cacopo, Napanorë' anoyatopiso'

43 Cacopori napotohuachina, Napanoso' tapon:
—Isopita catoro'saso', hui'nahuëpita. Isopita hua'huaro'santa shihuëpita. Pë'tahua huëntono'santa', caquën. Ya'ipi isëquë ni'nanso', caquënáchin. Napoaponahuë', hui'nahuëpita catahua'huaso marë' ya'ipi quëchi nípachin. Shihuëpitanta quëchi.

44 Napoaton huëquë pa'a Yoscoarë' niitatë anoyata'a. Catonpo chachin anoyatéréhuaso ayonquiinposo marë' inapoa'a, itérin.

45 Napotohuachina, Cacoponta', "Noyapa'," tēcaton, a'nara na'pi manin. Ina masahuaton,

onë pochin ahuanirin. ⁴⁶ Naporor' quëmopinënpita camairin:

—¡Na'piro'sa yontonco'! itérin. Itohuachina, ya'ipiya quëran na'piro'sa yontonpi. A'mitë a'mitëtahuatona', panca imopi. Ina quëran, ya'ipiya coshatopi, na'piro'sa a'mitë a'mitëtopiso pirayan coshatopi. ⁴⁷ Napanoso' inaora nanamënqué, ina ro'të nohuitaton, "Quicaro Saatota," itérin. Cacoporiso nimirihuë', inaora nanamënqué ina ro'të chachin, Carata, itérin. ⁴⁸ Naporor' Napano tapon:

—Iso na'piro'sa imorëso', catonpo chachin ayonquiarinpo Yoscoarë' ta'të ipora tahuëri anoyatérëso'. Napoaton, ina no'paso' ipora huanta Carata, itopi. ⁴⁹⁻⁵⁰ Naporahuaton Mispa itopi anta': "Nipatohuatë, co huachi niquënanarihuë'. Napoaponahuë', Siniñor chachin ni'info'. Co insonta ya'huérëquë naporëso ni'pirinpohuë', Yosë chachin ni'info'. Napoaton ama hui'nahuëpita no'huiton aparisitëquësuhuë'. Ama aquëtë chachin sanapi'sa maantakuësuhuë'. Ina marë' Yoscoarë' ta'ton sha'huitoco," itérin. Ina naporinso marë' ina pochin ina no'pa' nohuitopi.

⁵¹ Napanoso' aquëtë chachin Cacopo sha'huitaantarín:

—Ni'quë'. Na'pi imorahuëso ya'huëarin. Onë pochin na'pi ahuanirahuësonta ya'huarin. Ya'huérëhuaso huáncana inapita acorahuë. ⁵² Inapita ayonquiarinpo ama quëmanta ma'sha onpotancoso marëhuë', isëquëran pëntonquësuhuë'. Co ca téranta ma'sha onpota'huanquëns marë' isëquëran pëntona'huaso ya'huérinhuë'. ⁵³ Canpo capini nanan ya'huëhuachin, Yosë chachin

anitochinpo', inquënposona tēhuërëso'. Ina Yosë chachin quëmaquën tata masho Apraan, chinotérin. Caquën tata masho Nacoronta chinotérin. Inquënposo tēhuëhuatë', ina chachin ana'inchinpo', itérin. Napotohuachina, Cacoposo': "Caquën tata chinotérinso ni'sárinco ni'ton, co napoarahuë'", ténin. ⁵⁴ Inapoatona anoyatohuachinara, Cacoposo inaquë chachin Yosë chinotacaso marë' ma'sharo'sa tēparin. Nani Yosë chinotohuachinara, quëmopinënpita ichicoshatérin. Ya'ipiya coshatopi. Nani coshatohuachinara, inaquë chachin huë'ëantapi.

⁵⁵ Tahuëririnquë tashíramiachin Napanoso' huënséintarahuatón, hui'ninpita, shinpita, inapita apinora'piarin: "Yosë catahuainquëma noya paco'", itahuaton ya'huërinquë pa'mantarín huachi.

32

Cacopo, Isaorë' niquënanpiso'

¹⁻² Napano piyapinënpitarë chachin pa'mantahuachina, Cacoponta piyapinënpitarë chachin paantarin. Paasoi Cacoposo', Yosë anquëninënpitari nacapirin. Inapita quënanahuaton, tapon: "Isopitaso', Yosë sontaronënpita huënton. Catahuainacoso marë' a'paimarinso'", ténin. Napoaton ina ro'tëso': Maanain*, itérin.

³⁻⁴ Naporo' Cacoposo', comisiono'sa Isao sha'huitacaiso marë' Sëir no'paqué a'parin: "Iya'hua huënantárin ni'ton, iso pochin

* ^{32:1-2} Maanainso': Cato huënton sontaro'sa', tapon naporin.

nanan a'patiarinquën: ‘Ca iya masho huënantárahuë. Ma'sona quëma camaitéranso nisarahuë. Cato shonca pi'ipi api Napano ya'huërinquë yacapatérahuë.⁵ Na'a ohuacaro'sa', moraro'sa', ohuicaro'sa', inapita ya'huëtérinco. Piyapinëhuëpitanta', quëmapi'sa', sanapi'sa', ya'huëtérinco. Iso nanan, a'pataranquën noya ninicatë ya'huëantacaso marë' tënин, itoco',” itérin. Napotahuaton a'parin.

⁶ Comisiono'sa huënantahuachinara, Cacopo sha'huitiintapi:

—Iya masho Isao nicapoi a'parancoi ni'toi, pa'nai. Huë'saranso nitotaton, inaora chachin nacapiinquënso marë' huë'sarin. Catapini pasa quëmapi'sari imaquierin, itiipi.⁷⁻⁸ Ina natanahuaton, Cacoposo pa'pi pa'yanin. Pa'yanaton yonquirárin. Yonquirárin quëran, piyapinënpita, ohuicanënpita, ohuacanënpita, camiyonënpita, inapita cato huënton acorin. “Iya mashori, a'na huënton ahuëhuachina', a'na huëntonso ta'ararin,” ta'ton naporin.

⁹ Ina quëran iin të'huataton, iso pochin Yosë nontérin: “Siniro, quëmaso Yosënquën. Tata masho Apraan chinotérinquën. Tata Isaconta chinotérinquën. Quëma sha'huitéranco ni'ton, ya'huërahuëqué huë'sarahuë. Quëmopinëhuëpita ya'huërinquë huë'sarahuë. Naporahuaton: ‘Ca nohuanton noya pa'saran,’ itéranco.

¹⁰ Tëhuëñchachin co noyacohuë' ni'to, co nosoroancoso' ya'huërinhuë'. Co no'tequënáchin catahuaancoso ya'huëpirinhuë'. Iráca ya'huërahuë quëran pipipo, Cortaniiquë pëntoitérahuë. Naporos' co ma'sha téranta quëparahuë.

Pitananëhuëro'coáchin pa'nahuë. Napopirahuë', iporaso' cato huënton pochin hua'anënterahue. **11** ¡Nosoroatonco Sinioro iya masho Isao quëran, nicha'ëco! Nani huë'sarin ni'ton, ahüërahuatonco, sa'ahuëpita, hui'nahuëpitare'co chachin niquitohuachinco. **12** Nani quëma chachin, catahuancoso marë' a'ninquëchin sha'huitéranco. Naporahuaton, shihuëpitanta caquëran pipipisopita, inotéra'huaya pochin na'acaiso' sha'huitéranco. Marë yonsanquë inoterahuaya ya'huërinso', co pichicasohuë'. Ína pochin na'acaiso' nani sha'huitéranco," itérin.

13 Naporo tashi inaquë Cacopo huë'ërin. Tahuëririnquë capayatahuaton, ya'cariya ya'huërinsopita quëran, pëtahuaros'a huayonin. Ín masho Isao nicanacaso marë' huayonin: **14-15** Cato pasa chipo sanapi, cato shonca chipo, cato pasa ohuica, cato shonca carniro, cara shonca camiyo paya nasha huaipiso hua'huinpitarë chachin, catapini shonca ohuaca', shonca toroa'hua, cato shonca mora sanapi nininso', shonca mora quëmapi, inapita.

16 Inapita huayonahuaton, piyapinënpita quëtérin a'na huënton a'na huënton quëpacaiso marë'. Co'huara pa'shäterasoihuë', ma'sona nicacaisonta sha'huitérin:

—Canpitaso quëchitoco'. A'na huënton'ton pa'in. Amasha aquëmiachin nipachin a'na ya'huëre', paanta'in. Ama napopináchin pacosohuë', itérin. **17-18** Quëchinamën huënton quëpana'pi sha'huitérin:

—Iya masho Isao nacapiatëñquëñ natanpach-inquëñ: “¿Inta quëmaso' hua'anëñ? ¿Intohuata pa'saran? ¿Inquënta pë'tahuaros'a quëpaaranso?”

itohuachinquën, quëmari iso pochin sha'huitëquë': "Isopita pë'tahuar'o'saso', quëma marë' quësarahuë. Cacopo a'patiarinquën. Inaso', quëma piyapinën pochin cancantërin. Nani inanta piquëran huë'sarin," itëquë', itërin. ¹⁹ A'napita huënton quëpana'piro'santa', sha'huitërin:

—Canpitanta iya masho Isao quënanpatama', inachachin sha'huitoco'. ²⁰ Nani sha'huitohuatama', napotaantaco': "Inaora chachinso', piquëran huë'sarin," itoco', itërin.

Isopochin yonquiaton Cacopo naporin: "Isopita pë'tahuar'o'sa quëtato no'huirincoso asanoarahuë. Ina piquëran caora chachin ni'sarahuë. Tapona inapotërahuëso marë' inanta noya nontaantarínco," ténin yonquinënquë. ²¹ Inapoaton Isao quëtacaso'ton, aquëchitërin. Inaoraso nimirinhue', huë'ëcaso marë' ya'huëarinquëranchin quëparitërin.

Cacopo anquënirë nípanirinso'

²²⁻²³ Napoaponahuë', naporor tashi chachin co'huara huë'ëshátérasoihuë', Cacoposo' huanirin. Huanirahuaton, cato sa'inpita, cato cosonanënpita, inapita ayontonin. Shonca a'na hui'ninpanta inaqué chachin ayontonin. Ayontonahuaton Capocoi' pëントinantaquëchin, apëntoitërin. Ya'ipi pë'tahuanënpita, ya'ipi ma'shanënpita, inapitarë chachin aquëtëran a'parin.

²⁴ Cacoposo' inaora quëparitohuachina, a'nara quëmapi ya'norin. Inarë tahuërianpitaquë huarë' nohuantaso' nípanipí. ²⁵ Napoaponahuë quëmapi ya'norinsoso', co Cacopo minsëcaso nanitërinhuë'. Co nanitatonhuë', Cacopo tonaransën, ahuëtërin.

Catantën nipaquëtérintaquëchin ahuërin ni'ton, notohuëtérin. Nipanisoi napotérin. ²⁶ Quëmapi ya'norinsoso', Cacopo itapon:

—A'poco huachi, nani tahuëririarin, itérin.

—Co'so' noya ya'huëca'huaso marë' sha'huitohuatancohuë', co a'poaranquënhuë', itérin inarinta'.

²⁷ —¿Ma'ninquënta quëmaso'? itaantarín quëmapiri.

—Cacopo itérinaco, taantarín inanta'. ²⁸ Naporo' ina quëmapiriso' itapon:

—Co huachi Cacopo itarinënhuë'. Ipora quëran huarë' Israiro itarinën. Yosë chinitérán, piyapi'santa chinitérán. Chinitaton canatérán ni'ton, ina pochin nohuitarinën, itérin.

²⁹ —Iporaso' quëmanta' nininën sha'huitoco, itérin Cacopori. Napotopirihuë', inariso itapon:

—Co quëmaso' nininëhuë natanancoso ya'huërinhuë', itérin. Ina quëran inaquë chachin Cacopo noya ya'huëcaso marë' sha'huitérin. ³⁰ Napoaton Cacoposo' ina ro'të aninihuánin: "Pinoiro†," itérin. "Iséquë chachin, Yosë nirayarahuë. Ina niponahuë' co chiminahuë'," ta'ton, ina pochin ina ro'të nohuitérin.

³¹ Pi'i pipiriahuaso', Pinoiro quëran huë'sarin huachi. Catantëntaquëchin, tonaransë notohuëtérin ni'ton, sonpariarin. ³² Napoaton iso quirica ninshitasco huarënta Israiro shinpitaso', ma'sharo'sa catantënquë pancarin ipatë ya'huëtérinso', co ca'pihuë'. Inaquë Cacopo ahuëpi ni'ton, co ca'pihuë'.

† **32:30** Pinoiroso': Yosë ya'pirin tapon naporin.

33

Cacopo Isaorë' nanan anoyatopiso'

¹ Cacoposo', Isao catapini pasa quëmapi'sarë chachin huë'sarin ni'nin. Ina ni'sahuaton, cara huënton hui'ninpita acorin. Niataquë a'na huënton, Naquirataquë a'na huënton, cosonaro'sataquë, a'na huënton. ² Cosonaro'sa'ton hua'huinpitarë chachin aquëchitërin. Ina quëran Nia hua'huinpitarë chachin ahuan-canatërin. Naquiraso', Cosirë' piquëran acorin. ³ Inaporahuaton, Cacoposo quëchitërin. Iin masho ya'cariapon pochin, canchisëro mosharin. Isonin quëran no'paquë huarë' monshorahuaton mosharin. ⁴ Cacoposo' të'huaton naporin. Napopirinhüë Isaoriso', ta'aquirahuaton iin iporin. Iporahuaton, apinorin, naporin. Cato chachin noya ancantatona', nina'nëtopi. ⁵ Ina quëran Isaoso', sanapi'sa', hua'huar'o'sa inapita ni'nin. Ni'sahuaton iin natanin:

—¿Isopita po? ¿Inpitata? itërin.

—Hui'nuhüepita ta'a. Yosë nohuanton ya'huërinso', tënин Cacopo. ⁶ Naporö' cosonaro'saso hua'huinpitarë chachin, Isao huëcapaipi. Ina notënanquë huë'sahuatona', isonpi. Isonpi quëran no'paquë huarë' monshorahuatona', moshaipi. ⁷ Ina quëran Nia ya'huërë' hua'huinpitarë chachin, inapoantapi. Piquëran Cosiso', a'shinë chachin, huë'sahuatona', Isao notënanquë inahuanta inapoantapi.

⁸ Ina quëran Isaoso', Cacopo natanin:

—¿Ma'marëta ina nápo pë'tahua huëntono'sa a'paransopita, nacapirimarahuë? itërin.

—Noya ninicatë ya'huantacaso marë' a'patéränquënsopita, itérin Cacopori.

⁹ —Ama iya'hua napoquësohuë'. Canta ya'huëtérinco chachin. Co quëtaancoso ya'huërinhuë', itérin Isaori. ¹⁰ Itopirinhuë', Cacoposo' taantararin:

—Ama iya masho napoquësohuë'. Tëhuënchachin noya ninicatë ya'huantacaso nohuantohuatan, onpopionta maqué ta'a. Quëmaora chachin noya nontaantarancoso' nicato, Yosë chachin napotérincoso pochin cancantërahuë. ¹¹ Yosë nohuanton ma'huanahuë, co manta pahuantërincohüe'. Napoaton, quëshiranquënsopita, onpopionta maqué', itérin. Napotápaton Isao anohuantërin. Ya'ipi a'patérinsopita manin huachi.

¹² Ina quëran Isao taantararin:

—Noyapa'. Huëquë nipachin carinquën ca'tainquën pa'a, itérin. ¹³ Napotohuachina, Cacoporiso itapon:

—Tëhuënchachin iya masho nosoroatonco napotéranco. Nipirinhuë' hui'nahuëpita hua'huaro'saráchin. Ohuicaro'sa', ohuacaro'sa', inapitanta nasha hua'huatopiso ya'huërin. Manon quëpahuatëso', a'na tahuëri maréáchin nanitërin, ohuica'huaro'sa taquicaiso'. ¹⁴ Noya quëmaso' pataquë topirahuë. Quiyaso nippirinhuë' oshaquëranchin pacapoi. Hua'huaro'sapitarë'coi, pë'tahuaro'sapitarë'coi oshaquëran pa'sarai. Co hua'quiya quëranhuë', Sëir parti cantoontap-atënquën, inaquë niquënaantarihua huachi, itérin.

¹⁵ —Noyapa'. Naporan ni'quëhuarë', quëchitota'i nipachin. Nipirinhuë' ca'tainquëns marë' caraya

piyapinëhuëpita pachi, itérin. Itopirinhue', Cacoposo taantarin:

—Ama iya napoquësohuë'. Noya quiyaora pa'sarai, itérin. ¹⁶ Napotohuachina, Isaoso piyapinënpitarë chachin Sëir parti paantarin.

¹⁷ Cacoposo nimirinhue', Socoto parti pa'nin. Inaquë péitacaiso marë' piyapinënpita camairin. Naporahuaton, pë'tahuanënpita na'icaiso marë' tanpora'huaro'sa anitérin. Napoaton, ina no'pa' "Socoto*" itérin. ¹⁸ Inaquë hua'quimiachin ya'huërin. Ina quëran Cacoposo', ya'ipi huëntonënë chachin Siquimo ninano notënanquë pa'nin. Inaquë në'mëtë pëiro'sa otëantarín. Inapoaton Patan-aran quëran huë'ninso', Canaan no'paquë noya canquirin. ¹⁹ Në'mëtë pëiro'sa ótënpiso' no'pa', Cacoposo' pasa coriquí marë' pa'anin. Ina no'paso', a'na quëmapi Amoro itopiso' hui'ninpitari hua'anëntopirinhue', pa'antérin. Inaso', a'nara hui'nin ya'huëtérin, Siquimo itopi. ²⁰ Ina piquëran Cacoposo', Yosë chinotacaso marë' a'nara artaro ninin. Ina nisahuaton aninihuanin: Ir Iroi Israiro[†], itérin.

34

*Siquimori Tina tapiton po'orinso marë'
i'huërëtopiso'*

¹ Cacopo hui'nin Niaquëya ya'huëtérinso', Tina itopi. Ina nanontohuachina, a'na tahuëri Siquimo ninanoquë nanon capini nini'cai marë' pa'nin. ² Inaquë ni'so',

* **33:17** Socotoso': Tanpora'huaro'sa', tapon naporin. † **33:20**
Ir Iroi Israiroso': Yosëso', Israirori chinotérinso', tapon naporin.

Siquimori ni'sahuaton noyarin. Inaso', sha'huitéranquëmaso chachin Amoro hui'nin. Amoroso', hua'an ya'conin. Ipo piyapi ni'ton, ya'ipi iporo'sa hua'anëntérin. Siquimori Tina co nohuanchachinpirinhue' ichihuë'ërahuaton, po'orin. ³ Napoaponahuë', pa'pi nohuantérin. Napoaton Tinari nohuantacaso marë' ma'pitaso ninin. ⁴ Naporo chachin Siquimoso' pa'pin itapon:

—Paaton tata, Tina maca'huaso marë' pa'pin nontoonqué'. Quëmopinënpitanta nontoonqué'. Ina pa'pi nohuantérahuë, itérin.

⁵ Cacoposo' hui'nin po'opiso' nitotaponahuë', co manta tëninhue'. Hui'ninpita pë'tahuaros'a a'pairapi ni'ton, co manta tëninhue'. Inapita canquiae huarë' sha'huitacaso' yonquirin.

⁶ Siquimo pa'pinsos' Cacopo nontacaso marë' pa'nin. ⁷ Cacopo hui'ninpita huënantahuachinara, napopiso' natantopi. Natantahuatona', pa'pi no'huitopi. Siquimori oshina co mashätéraponahuë', ichihuë'ërin ni'ton, napopi: "Inapoaton inaso', israiro'sanpoa panca tëhuëtérinpoa'. ¡Co onporonta inapocaso ya'huërinhue'!" topi. ⁸ Amoroso niperinhue', inapita nontaton napotérin:

—Hui'nuhüe Siquimo itérahuëso', oshiparima pa'pi nohuantérin macacaso marë'. Onpopionta quëtoco'. ⁹ Inapoatëhua', ya'huëa'ahua topirahuë. Napohuatëhua', quiyanta canpita hui'nama macapoi. Canpitanta', quiya hui'nuhüe masarama'. ¹⁰ Isëquë quëparitatoma', quiyapitarë' ya'huëco'. Iso no'paquë ya'huatoma sacatoco'. Nohuantéremaso' pa'anco'. No'panta yapa'anpatama', pa'anco', itérin.

11 Siquimonta huanirahuaton, nonsarin huachi:

—Tata napotérinquëmaso', nohuantoco ta'a. Onposo' natanpatamaco quëtaranquëma'.

12 Sanapi marë' pahuërëtëre quëran na'con na'con apahuërëtohuatamaco noya, co ma'shahuë'. Naporahuaton ma'sona nicana'huanquëmaso' natanpatamaconta', quëtaranquëma'. Onpopionta cari mai, topirahuë, ténin.

13 Napopirinhuë', inapitariso oshina na'inin ni'ton, i'huërëtacaiso marë' yamonapi. Napoaton Siquimoso' pa'pinë chachin noyasha nontatona itapona':

14—Noya nimirinhuë'. Co quiyaso' nanitëraihuë' co marcahuán quëmapi oshihuëi quëta'huaiso'. Quétérail naporini, quiya marëso' pa'pi taparo niitonhuë'. **15** Ya'ipinquëma quiya pochachin marcahuánama huarë' canpita naporamaso nisarai. Nohuantohuatama', ya'ipi quëmapinquëma marca niacotoco nipachin. **16** Naporo huarë' tēhuëñchinso', canpitanta hui'nahuëi masarama', quiyanta canpita hui'nama masarai. Inapohuatëhua a'na huëntoínchin pochin nisarëhua huachi. **17** Nimirinhuë', co'so' nohuantohuatamahuë', isëquëran pipiarai. Oshihuëinta macatoi, quëpaarai, itopi.

18 Napotohuachina Siquimoso' nohuantërin. Pa'pionta nohuantërin. **19-20** Cacopo hui'nin pa'pi nohuantaton Siquimoso', a'naroáchin natëtërin. Inaso', ya'ipi Amoro hui'ninpita quëran chini chiníquën nanantërin. Napoaton, pa'pinë chachin ninano ya'coanaquë pa'pi. Inaquë ya'huëhuano'sa

niyontonpi, ma'sha yonquiatona anoyatacaiso marë'. Ya'huëhuano'sa niyontonpachinara, itapona':

²¹ —Pasopitaso' noyaro'sa'. Pancana no'pa' ya'huëtérinpoa ni'ton, inapitanta yacapaténënpoa' pa'anapona'. Canpoanta nanitarihua inahua hui'ninpita macacaso'. Ya'huérë' inapitanta canpoa hui'nanpoa nanitapi macacaiso'.

²² Napoaponahuë' inapoatëhua ya'huëcaso marë', ya'ipi quëmapinpoa marcahuancaso' nohuantopi. Inahua napopiso chachin canpoanta nicacaso' nohuantopi. ²³ Inapohuatëhua', ya'ipi ya'huëtopiso canpoanquën nisarin. Pë'tahuanëna', ma'shanëna', ya'ipi inapita canpoanquën nisarin. Huëco nohuantoco inapoa'ahua'. Napohuatëhua', inapitaso canpoarë' ya'huëcaiso marë' quëparitapi, itopi. ²⁴ Siquimo pa'pinë chachin napopiso natanatona', nohuantopi. Napoaton ya'ipi quëmapi'sa chiníquëno'sa nipiso', marca niacotopi huachi.

²⁵ Niacotopi quëran cara tahuëritapaso', Cacopo hui'ninpita Siquimo ninanoquë pa'pi. Simion, Nihui, inapita itopiso' pa'pi. Inapitaso', Tina yo'inamiáchin nipi. Ya'huëhuano'sa marca niacotopiso', pa'pi iquitopi. Inapoasoi chachin pa'sahuatona', sahuëninënaquë ya'ipi quëmapi'sa tëpaconpi. Co noyachátérasoihuë' ahuëtopi ni'ton, co chinitopihuë'. ²⁶ Amoronta', Siquimorë chachin tëpapi. Inapotahuatona', Siquimo pëinën quëran Tina masahuatona', pa'pi huachi. ²⁷ A'napita iinpitanta canquirahuatona', ya'ipi quëmapi'sa nani tëpapi ni'ton, ninanoquë ma'sha ya'huërinso mamiatopi. Oshina Siquimori

tapirinso marë', i'huérëtatona inapotopi. ²⁸ Ya'ipi ohuicanëna', ohuacanëna', moranëna', inapita matopi. Ya'ipi ninanoquë ya'huérinso', aipiraonta ya'huérinso', mapi. ²⁹ Pëiro'saquë ma'sha ya'huérinsopitanta', ya'ipi ihuatopi. Naporahuaton ya'ipi hua'huaro'sa', sanapi'sa', inapitanta masahuatona quëpapi. ³⁰ Simion, Nihui, inapita huënantahuachinara, pa'pinari itapon:

—Canpitaso napoatoma', sacai anoyata'huaso nitëramaco. Canano'sa', huirisëro'sa inapitaso', ya'huëhuano'sa'. Naporamaso natantohuachina', no'huiponaco caso huachi. Nihuëntonahuatona ahuëaponaco. Caso co na'ashahuë' piyapinëhuëpita ya'huëtérinco ni'ton, ya'ipinpoa tiquiaponënpoa', itérin. ³¹ Napotopirinhuë', inapitariso itaantapi:

—¿Monshihuante paya pochin oshihuë nitacaso' nohuantopiranhuë' ti? itopi.

35

Yosëri Pitiriquë Cacopo noya ya'huëcaso marë' sha'huitérinso'

¹ Naporo' Yosëri Cacopo huë'enquë ya'notaton, camairin: “Caso Yosëco. Iráca iya masho Isao ta'anapisiën ya'notëranquën. Pitiriquë paantan, inaquë ya'huëconquë'. Inaquë canconpatan, chinotaancoso marë' a'nara artaro niquë'” itérin.

² Napotohuachina Cacoposo', ya'ipi hui'ninpita, sa'inpita, piyapinënpita, inapita camairin:

—Ya'ipi nisha nisha mamanshiro'sa chinotëramaso', a'poco'. A'poatoma quëshico pa'pitahua'. Naporahuaton amarahuatomá', noya nininso i'nanpiraco'. ³ Manóton Pitiriquë pa'ahua'. Inaquë Yosë chinota'huaso marë'

artaro nica'huaso ya'huërin. Iráca nanan ya'huëtaponco, Yosëo na'con catahuarinco. Naporahuaton, itohua itohua pa'nahuëquë, ca'tanatonco catahuarinco, itérin.

⁴ Napotohuachina, nisha nisha mamanshinëna moshapiso quëshipi. Pë'tëhuëratëro'santa moshapiso quëshipi. Ya'ipi inapita Cacopori Siquimo ninano ya'cari', pa'pitërin. A'nara insina nara pirayan, pa'pitërin. ⁵ Pa'pachinara, Yosë nohuanton, nisha nisha ninanoro'saquë ya'huëpisopita pa'pi të'huapi. Napoatona co nanitopihuë' Cacopo hui'ninpita, imatona i'huërëtacaiso'.

⁶ Cacoposo' huëntonënë chachin, pa'sápatona', Noso ninanoquë canconpi. (Ina ninanosó', Pitiri itopi anta', Canaan parti ya'huërin.) ⁷ Inaque canconahuaton, artaro ninin huachi. Inaque Yosë chinotërin ni'ton, ina ro'të aninihuánin: "Iri Pitiri**" itérin. Iráca iin të'huataton ta'anapipihuachina, inaque chachin Yosëri huë'enquë ya'notërin ni'ton, napo nohuitërin.

⁸ Nipica piyapinën Tipora itopisonta chiminpachina, inaque chachin pa'pitopi. Insina nara pirayan pa'pitopi. Pitiri ninano ya'cariya, inapotopi. Cacopori inanta aninihuánin: "Na'nëi' insina," itérin.

⁹ Cacopo Patan-aran quëran huënantahuachina, Yosëri naquëranchin inaque ya'notaantarin. Ya'notaton noya ya'huëcaso marë' sha'huitërin.
¹⁰⁻¹² Iso pochin sha'huitërin:
 "Quëmaso' Cacopo itérinën.

* ^{35:7} Iri Pitiriso': Pitiriquë ya'huërinso Yosë, tapon naporin.

Co huachi ina pochin nohuitarinënquënhuë'.
Ipora quëran huarë' Israiro itarinën," itérin.

Ina quëran nininën canpiatahuaton itaantapon:
"Caso Yosëco, ya'ipi nanitaparahuë.
Notohuaro' hui'nanpita ya'huëchinquën.
Shiparinpitanta', hua'huayáterahuë ya'huë'ina'.
Quëmá quëran, a'na nacion pipipon.
Naporahuaton, shiparinpitanta na'a huëntono'sa
nicapona'.

A'naquën shiparinpita, copirno ya'conapona'.
Tata masho Apraan, tataparin Isaco,
inapita iso no'pa' ahua'anënterahuë.
Ina chachin quëmanta quëechinquën.
Shiparinpitanta iso no'pa chachin
hua'anëntapona!", itérin Yosëri.

13-14 Napotahuaton pa'pachina, Cacoposo'
a'nara na'pi masahuaton onë pochin ahuanirin.
Yosëri nontërintaquë chachin ahuanirin. Ina
quëran toma', huino, inapitaquë opotahuaton,
Yosë marë' acorin. **15** Iráca nohuitérinso chachin
ina ninanoso', Pitiri itérin.

Naquira chimininso'

16-17 Hua'quimiachin inaquë ya'huërapí quëran
paantapi. Pa'sápatona', Iporata ninanoquë
ya'caritopi huachi. Inaquë Naquiraso', pa'pi
parisë quëran huaiton, co'chachin ninin. Napoaso
ahuaitona'piri itapon: "Ama pa'yanquësohuë',
quëmapi chachin huaiyantarán," itérin.

18 Napotopirinhuë', Naquiraso' yachiminin
huachi. Nani yachiminahuaso', hua'huin nininën
acotërin: Pin-oni† itérin. Itopirinhuë', Cacoporiso',

† **35:18** Pin-oniso': Na'con na'con aparisitérincoso hua'hua, tapon
naporin.

Mincamin[†] itërin. ¹⁹ Inapo chimintërin Naquira. Napoaton Iporata ira pirayan pa'pitopi. (Iporataso ipora marë', Pirin itopi.) ²⁰ Naquira pa'pitahuaton, po'oronën aipi Cacoposo' Panca ra'pi ahuanirin. Ina na'pi ahuanirin quëran, Naquira po'oronën nohuitopi.

²¹ Inaporahuaton, Israiroso paantarin. Itiri tori aquëcha, ya'huaantacaiso marë' në'mëtë pëinëna ótéenpi. ²² Inaquë hua'quimiachin ya'huëpi. Inaquë chachin Nopinoso', pa'pin cosonanën Pira itopiso monshitaton, ichihuë'érin. Ina natantahuaton, Israiroso pa'pi no'huiterin.

Cacopo hui'ninpita nininso'

Cacoposo' shonca cato hui'ninpita quëmapi'sa ya'huëtérin. ²³ Niaquëya nipsisopitaso' isopita: Paninanso' Nopino, ina quëran, Simion, Nihui, Cota, Isacaro, Saporono, inapita. ²⁴ Naquiraquëya nipsisopitanta isopita: Cosi, Mincamin, inapita. ²⁵ Naquira piyapinën Pira itopisoquënta isopita: Tano, Nipitari, inapita. ²⁶ Nia piyapinën Siripa itopiquënta', isopita: Caro, Asiri, inapita. Ina nápo Cacopo hui'ninpita ya'ipiya quëran ya'huëpi. Ya'ipi pochin Patan-aranquë nasitopi.

Isaco chimininso'

²⁷ A'na tahuëri Cacoposo' pa'pin ya'huërinquë pa'nin. Inaso', Mamiriquë ya'huërin. Ina ninanosso' Arapa itopi anta'. Naporahuaton ina chachin Ipron itomantapi. Inaquë Apraan, Isaco, inapita ya'huëpi. ²⁸ Pasa posa shonca pi'ipitaso', Isaco chiminin. ²⁹ Noyá mashoya nicaquë huarë'

[†] **35:18** Mincaminso': Pa'ya pa'yatërahuëso hua'hua, tapon naporin.

chiminin. Chiminpachina, hui'ninpita Isao, Cacopo, inapitari nipa'pichantopiso' naninquë po'mopi.

36

Isao quërān pipipisopita

¹ Isao quërān pipipisopita sha'huichiniquëma'. Inaso', Itomo itopi anta'. ²⁻⁵ Isaoso' Canaan sanapi'sa manin: A'naso', Ata itopi. Inaso', Iron hui'nin. Ironta', Iti huënton piyapi. Inaquëya Isao hui'nahuānpachina, Iripasi itérin. A'na sa'ionta Aoripama itopi. Inaso', Ano hui'nin, Sipion shiin. Inaquëyanta hui'nahuānpachina, isopita: Quiosi, Caaran, Cori, inapita. Isaoso', Ismairo hui'nionta manin, Pasima itopiso'. Inaso', Nipayo oshia'huain. Inaquënta hui'nahuānpachina, Nio-hiro, itérin. Ina nápo hui'ninpita Canaan parti ya'huëapon nasitopi.

⁶ Isaoso' Cacopo patahuaton, a'na parti ya'huapon pa'nin. Sa'inpita, hui'ninpita, yaipi inarë ya'huëpisopita quëparin. Pë'tahuanënpita, ma'shanënpita, inapita Canaan parti ya'huapon pochin canarinsonta', ya'ipi quiririn.

⁷ Cacoponta', napopin chachin ma'huanin ni'ton, co huachi nanitopihuë inaquësáchin ya'huëcaiso'. Pastonta pë'tahuanëna capacaiso co huachi nanipihuë ni'ton, nia'popi. ⁸ Inapoaton, Isaoso Sëir motopiro'sa parti pa'nin ya'huapon. Sha'huitëranquëmaso chachin Inaso', Itomo itopi anta'.

⁹ Ina nápo Isao hui'ninpita ya'huëtérin. Inaso', ya'ipi itomoro'sa shimashonën. Inapitaso', Sëir motopiro'sa parti ya'huëpi. ¹⁰ Sha'huitëranquëmaso

chachin, Isaoso Ataquëya hui'nahuaninso', Iripasi itérin. Ya'huërë' Pasimaquëya nininso', Niohuiro itérin. ¹¹ Iripasi hui'ninpitaso', isopita: Timan, Oamaro, Sipo, Catan, Quinasi, inapita. ¹² Inapitaso' Ata aminpita. Iripasiso', a'na cosonanën ya'huëtérin Timona itopi. Inaquëya hui'nahuanpachina, Amarico itérin. ¹³ Niohuiro hui'nipitanta', isopita: Naato, Siran, Sama, Misa, inapita. Inapitanta Pasima aminpita. Pasimaso' sha'huitéranguëmaso chachin, Isao sa'in ninin anta'. ¹⁴ Aoripamaquënta', Isao hui'nahuaninsopitaso': Quiosi, Caaran, Cori, inapita. Aoripamaso', Ano hui'nin, naporahuaton Sipion shiin.

¹⁵⁻¹⁹ Isao shinpita huëntono'sa hua'anëntopisopitaso', isopita: Timan, Oamaro, Sipo, Catan, Quinasi, Cori, Amarico, inapita. Sha'huitéranguëmaso chachin Isao paninanënso', Iripasi itopi. Ina hui'ninpitaso', Itomo no'paquë Isao shinpita huëntono'sa', hua'anëna ya'conpi. Ya'ipi inapita Ata aminpita. Niohuironta Isao hui'nin chachin ninin. Ina hui'nipitanta', isopita: Naato, Siran, Sama, Misa, inapita. Inapitanta Itomo no'paquë Isao shinpita huëntono'sa', hua'anëna ya'conpi. Ya'ipi inapitaso', Pasima aminpita. Sha'huitéranguëmaso chachin Ano hui'nin Aoripama itopiso hua'huinpitanta', isopita: Quiosi, Caaran, Cori, inapita. Inapitanta Isao shinpita huëntono'sa hua'anëna ya'conpi. Ya'ipi ina hua'ano'sa', Isao shinpita. Isaoso', Itomo itopi anta'.

²⁰⁻²¹ Co'huara Isao inaquë pa'shätéraponhuë', a'nara Or huënton piyapi Sëir itopiso'ton inaquë

ya'huërin. Quëmopinënpitarë chachin ya'huërin. Ina hui'ninpitaso', isopita: Notan, Soparo, Sipion, Ano, Tison, Isëri, Tisan, inapita. Inapita'ton Itomo no'paquë Or huënton hua'ano'sa ya'conpi. Inapitaso' Sëir quëran pipipisopita ya'huëpi. ²² Notan hui'ninpitaso', isopita: Orin, Iman, inapita. Notan oshinso', Timona itopi. ²³ Soparo hui'ninpitanta', isopita: Arapan, Man-aato, Iparo, Sipo, Onan, inapita. ²⁴ Sipion hui'ninpitanta isopita: Aiya, Ano, inapita. Ina Ano chachin, inotëro parti pa'pin moranënpita a'pairin. Inapita a'paiso', no'pa quëran i'sha pipirinsopita quënanin. ²⁵ Anoso', a'na hui'nin ya'huëtërin, Tison itérinso'. Naporahuaton, a'na hui'nin sanapi, ya'huëtërin. Sha'huitëranquëmaso chachin inaso', Aoripama itérin. ²⁶ Tisonta hui'ninpita isopita: Intan, Ispan, Itëran, Quiran, inapita. ²⁷ Isëri hui'ninpitanta isopita: Piran, Saapan, Acano, inapita. ²⁸ Tisan hui'ninpitanta isopita: Osi, Aran, inapita. ²⁹⁻³⁰ Or huënton hua'ano'saso', isopita: Notan, Soparo, Sipion, Ano, Tison, Isëri, Tisan, inapita. Ina nápo Or huënton hua'ano'sa ya'huëpi. A'naya a'naya huëntonënaquë, hua'an ya'conpi. Sëir parti napopi.

Itomo no'paquë copirnoro'sa ya'conpiso'

³¹⁻³² Co'huara israiro'sa copirno ya'huëchaterasoihuë', isopita'ton Itomo no'paquë copirno ya'conpi. Pira'ton ya'conin. Inaso', Pioro hui'nin. Tinapa ninanoquë ya'huërin. ³³ Ina chiminpachina, Sira hui'nin Copapo itopisori ya'huërëtërin. Inaso', Posora ninanoquë ya'huërin. ³⁴ Inanta chiminpachina,

Osamori ya'huérétérin. Inaso', Timan parti ya'huérin. ³⁵ Osamonta chiminpachina, Atatori ya'huérétérin. Inaso', Pitato hui'nin. Apito ninanoquë ya'huérinso'. Inari matiano'sa', Moapo no'paquë ahuéaton canarin. ³⁶ Atato ya'huérë' chiminpachina, Samarari ya'huérétérin. Inaso', Masarica ninanoquë ya'huérin. ³⁷ Samaranta chiminpachina, Saonori ya'huérétérin. Niopo ninanoquë ya'huérinso'. Inaso ninano', Iopiratisii' yonsanquë ya'huérin. ³⁸ Ina ya'huérë' chiminpachina, Paaro-ananori ya'huérétérin. Inaso', Acaporo hui'nin. ³⁹ Paaro-ananonta chiminpachina, Atatori ya'huérétérin. Inaso', Pao ninanoquë ya'huérin. Atato sa'inso', Miitapiri itopi. Inaso', Matiriti hui'nin, Misaapo shiin.

40-43 Isonápo Isao quérana pipipisopita huéntono'sa ya'huérin: Ya'huépiso no'panénanta', inachachin aninihuani: Timon, Arapa, Quitito, Aoripama, Iran, Pinon, Quinasi, Timan, Mipasar, Maquitiri, Iramo, inapita. Ina nápo Itomo huéntono'sa shimashonénpita ya'huérin. Inapitaso' Itomo no'paquë yanquéatona itohua itohua ya'huépi. Isaoso', Itomo itopi anta'.

37

¹ Cacoposo niperinhuë', Canaan parti quëparitérin ya'huécaso marë'. Pa'pinconta' inaquë chachin ya'huéaponahuë', co hua'quiyahuë' ya'huérin.

Cosi, iinpitarë chachin napopiso'

² Cacopo hui'ninpita naporinso sha'huichinquéma nitotoco'. Cosi shonca canchisë

pi'ipitapon pochin, iinpitarë chachin pa'pin ohuicanënpita a'pairin. Pa'pin cosonanënpita: Pira, Siripa, inapita hua'huinpitarë' a'pairin. Iinpitaso co noyahuë' nipi ni'ton, Cosiso' pa'pinquë yásha'huirapirin.

³ Cacoposo' a'napita hui'ninpita quëran, Cosi na'con na'con nosororin. Nani másho nicaquë huarë', Cosiso hua'huatérin ni'ton, nosoromiatérin. Napoaton a'mocaso marë' noyápiachin nininso' nitérin. ⁴ Iinpitariso nimirinhüë', pa'pini ina na'con na'con nosororinso' nicatona', co quë'yapihuë'. Co quë'yatonaraihuë', co nanitopihuë' noya nontacaiso'.

⁵⁻⁷ A'na tashi Cosi hua'narin. Tahuëririnquë, iinpita sha'huitérin:

—Natanco iyaro'sa hua'narahuëso sha'huichinquëma': Huë'ëhuëquë, iminquë ya'ipinpoa trico masarëhua'. Manëhuasonta tonporarëhua ni'nuhüe. A'nanaya ca tonporahuësoso', huanirin. Canpita tonporamasoso nimirinhüë', ca tonporahuëso' mosharapi. Ya'ipi tahuitatona', monshopi quëran mosharapi, itérin. Ina natanahuatona', iinpitariso aquë aquëtë no'huipi. ⁸ Napohuachina, inapitari itapon:

—Hua'an ya'conpato iyahuëpita camaiyápo ¿tocomaranquën ti? ¡Catoro' quëma camaiyáponco! itopi. Hua'nariso marëpita na'con na'con no'huipi. Sha'huihuachina, co yainhuë' natanpi.

⁹ Ina piquëran Cosiso', hua'naantarin. Naporonta iinpita sha'huitaantarin:

—Natanco iyaro'sa a'na hua'naantaráhuëso sha'huitaanta'inquëma'. Hua'nato ni'pirahuë',

pi'i, yoqui, shonca a'na tayloraro'sa', inapita monshorahuatona moshararinaco ni'nahuë, itérin. ¹⁰ Cosi ina hua'narinso', pa'pin iinpita inapita sha'huitohuachina, pa'pini pënénaton itapon:

—¿Ma'ta tapon inapochinpita hua'na hua'namantaranso'? Napoahuarë' mamaparin, iyaparinpita, ca chachionta' ¿a'na tahuëri moshaponquën ti? itérin. ¹¹ Iinpitariso noyapatona', aquë aquëtë no'huirápi. Pa'pinsو nimirinhue', hui'nin naporinso na'con yonquirárin.

Cosi pa'anpiso'

¹² A'na tahuëri Cosi iinpitaso', Siquimo ninano ya'cari pa'pi. Pa'pina ohuicanënpita, chiponënpita inapita quëpapi pasto yonitona a'cacaiso marë'.

¹³ Naporor' pa'pini Cosi itapon:

—Ni'quë conpa. Iya mashoro'sa Siquimo ya'cari ya'huëapi. Inaquë ohuicaro'sa', chiporo'sa', inapita a'pairapi. Paaton ni'contaquë topirahuë, itérin.

—Noya tatapa'. Pa'i nipachin, itérin.

¹⁴ —Inta conpa. Pa'sahuaton iyamashoro'sa ni'contaquë'. Ohuicaro'sa', chiporo'sa', inapitanta onpoinsona nisapiso', nahuicontaqué'. Ina quëran huë'sahuaton, onpoapisona sha'huitiico canta nitochi, itérin.

Cacoposo Ipron motopianaro'sa quëran, Cosi a'parin. Inaso pa'sápaton Siquimoquë canconin.

¹⁵ Ina parti chihuëaton pa'sápirinhue', a'na quëmapiri quënanahuaton itapon:

—¿Ma'ta yonisaran?

16 —Iyahuëpita yonisárahuë ta'a. ¿Co pora nitötéranhue' inséquësona pë'tahuanëna a'paiyapiso to? itérin. **17** —Nani iséquëran pa'pi: “Totanquë pa'ahua',” niitapi pora, itérin.

Cosiso pa'sápaton, Totan ninano ya'cariya iinpita quënánconin. **18** Inapitarinta', áquë quëran Cosi quënánpi. Quënánahuatona', co'huara ya'carichátërasohue', tëpacaiso marë' a'naroáchin yonquipi. **19** Inahua capini ninontopi:

—¡Ni'co'. Hua'natona'pi huë'sarin! **20** Huëco tēpa'ahua'. Inapotatëhua poso yaninantëquë po'moa'ahua'. Ina quëran “pa'piniri ca'nin,” itahua'. Inapotohuatëhua', ¿naniinta'ma hua'narinsopita pa'? niitopi. **21** Nopinoso natanahuaton, Cosi pa'poyacaso marë' itapon:

—Ama tēpa'ahuasohue'. **22** Co tēpatacaso ya'huërinhue'. Iso inoteroquë yaninantë poso nininquë tē'yatoco'. Ama campitariso' ma'sha onpotocosohue', itérin. Iya'huain nanin quëran ocoirahuaton, pa'pinqué'pa' a'paantacaso yonquiaton, naporin.

23 Cosiso iinpitataquë canconpachina, no'huitona noyápiachin a'morinso matopi. **24** Matahuatona yaninantë posoquë, tē'yatopi.

25 Inapotahuatona', coshatapi huachi. Coshatasoi ni'pirinahuë', a'na huëntona' Ismairo nicatono'sa', nioshirin huë'sapi. Carata parti quëran huë'sapi. Camiyonënaquë, pimo hua'sairo'sa', parsamo nimirio, pimo yaqui', inapita quësapi. Iquipitoquë pa'anapona', quëparapi. **26** Naporo' Cotaso iinpita itapon:

—¡Iya'huá tēpahuatéhuá', co manta canarihuahué! Naporahuaton inapotohuatéhuá', nonpi nonpínantacaso' ya'huapon. ²⁷ Ama tēpáhuasohué!. Ismairo nicatono'sa tēhuëñchinso' pa'antahua'. No'huípiro mini nípirinhué', co nishahué!. Iyanpoa', ténin. Napohuachina, iinpitari: “;Téhuëñchachinchí paya!” topi. ²⁸ Nicatono'sa inataquéchin na'huërahuachinara, iinpitari Cosi ocoipi. Yaninanté poso quëran ocoirahuatona', nicatono'sa pa'antopi. Cato shoncaté coriqui pahuërëtohuachinara, Iquipitoqué quëpapi huachi.

²⁹ Nopinoso Cosi tē'yatopiqué huënantahuachina, co huachi iin quënanquintarinhué!. Pa'pi pa'yanaton a'morinso osharin*. ³⁰ Ina quëran iinpitataqué huënantarahuaton, itiintarin:

—¡Iya'huá capa huachi! ¡Ma'huantacha caso nisarahué paya! ténin.

³¹ Naporo' iinpitaso', Cosi a'morinso masahuatona chipo tēpapiso' huënainënqué, asé'cotëtopi. ³² Inapotahuatona pa'pinaqué a'papi. Quëpana'piso' iso pochin pënënpí: “Iso a'mopiso quënanai. Noya ni'qué!. ¿Hui'nanquën a'na nimara ti?” itëqué', itahuatona a'papi huachi.

³³ Cacoposo' nohuitahuaton, tapon: “¡Iso mini hui'nahué a'morinso!” tanan ni'niri napotérin ipora, ténin. ³⁴ Napoapon pochin co napión cancantaton a'morinso nioshatérin. Naporahuaton, sa'catén nininso' sëtohuachinara a'mopiso', a'morin. Ina a'morin quëran hui'nin

* ^{37:29} A'morinso osharin: Ina parti ya'huëpisopitaso', co napión ancantohuachinara, inapopi.

chimininso marë' hua'qui na'nérarin, ayanárin, naporárin. ³⁵ Ya'ipi hui'ninpitari achinicancanpirinahuë', inaso co nohuanchátérarinhuë', sétérinso inquicaso'. Aquë aquëtë hui'nin marë' na'nëton, naporin: "Chimipiro'sa ya'huérinquë hui'nahuë quënanconta' huarë' sétérahuëso' copi tapo," ténin.

³⁶ Ismairo nicatono'saso', Iquipitoquë camapi. Camahuachinara, Cosiso a'nara quëmapi Potihuaro itopiso', pa'antopi. Inaso', Iquipito copirnori catahuacaso marë' acorint[†]. Capitan ya'conaton, copirno a'paipisopita sontaro'sa camairin.

38

Cota, Tamararë' naporinso'

¹ Naporo tahuëri'sa Cotasö iinpita patahuaton, Atoran ninanoa'huaquë pa'nin. Inaqué a'na quëmapi Iro itopiso ya'huérin. Ina ya'huérinquë yacapatonin. ²⁻³ Inaqué yacapatapon pochin, a'nara nanon nohuitérin. Inaso', Soa itopiso' hui'nin. Soaso' Canaan piyapi. Cotari natanpachina, acoantopi. Inaqué hui'nahanpachina, paninanën nasitérin. Ina nohuitaton, Iri itérin. ⁴ Naquéranchin sa'in cayoantarin. Nasitohuachina, quëmapi chachin niantarin. Inaso', Onan itérin. ⁵ Naquéranchin hua'huantahuachina, quëmapi chachin niantarin. Inaso', Sira itérin. Quisipo ninanoquë Cota ya'huëaso', inaso nasitérin.

† **37:36** Copirno catahuapisopitaso': Naporo tahuëri'sa macayora'piapi.

6 Iri hui'napitohuachina, pa'pini Tamara acoantérin. **7** Acoantopirinhué', Iri co noyahue' niniso' co Sinioro costarinhué ni'ton, ina nohuanton chiminin. **8** Napohuachina, Cotari Onan ya'huérë' itapon:

—Iya masho ayananpirinso sa'in, quëmari maquë'. Canpoaso inachintérëhua ni'ton, imoya macaton, inaquë hui'nahuanquë'. Hui'nahuanpatan, Iri quëran pipicaiso nipesopita quëmá quëran ya'huëtarin huachi, itérin. **9** Onanso' Tamara macaponañuë': “Hui'nahuanpato, hua'huar'o'sa co caquën nisarinhué'. Irico hui'ninpitaráchin pochin nisarin,” ténin yonquinénquë. Napoaton, Tamara tēcarihuachina, aipi a'paconin. Ama iinco ya'huérënamënpita, ina quëran ya'huëcaso marëhuë' naporin. **10** Onan naporinso Sinioroso nitotaton, chiníquën no'huitérin. Napoaton inanta', ina nohuanton chimiantarin. **11** Naporó' Cotasó', Tamara itapon:

—Quëyoroantaran ni'quëhuarë', iporaso' tataparin ya'huérinquë paantaquë'. Hui'nahue' Sira itérahuëso hui'napitaquë huarë', inaquë ya'huëtaquë', itérin. Itaponahuë', co tēhuëñchachin napotérinhué'. Nonpintaton naporin: “Sira ya'huérë', iinpita pochachin chimiantahuachin,” ta'ton naporin. Napoaton Tamaraso', pa'pin ya'huérinquë pa'nin ya'huapon.

12 Cara pi'i quëran pochin Cota sa'in ya'huérë' chimiantarin. Inaso' sha'huitéränquëmaso chachin, Soa hui'nin. Chiminpachina, Cotasó sétaton na'nérárin. Sétérinso' inquiuhuachina, Tinato ninanoa'huaquë pa'nin. Ohuicanënpita ya'napiro'sa inaquë ya'huëapi ni'ton, pa'nin

nicapon. Amiconën Iro itopisorë' pa'nin. Iroso', Atoran piyapi. ¹³⁻¹⁴ Tamaraso ina nitotaton, quëyoron a'morinso ocoirin. Inaporahuaton, nitaparin. Niimomototérinsö' në'mëtëquë nipa'shinayatérin. Ama nohuitacaiso marëhuë' naporin. Inaporahuaton, Inain ninanoa'hua ya'cari', huënsëconin. Inaso' ninano', Tinato iraquë ya'huërin. Sira nani hui'napitopirinhue', co acoantopihuë' ni'ton, shiin yanopintérin. ¹⁵⁻¹⁶ Cotari quënanahuaton, nipa'shinayatérinsö marë': "Isoso sanapi, monshihuantë!", ténin. Napoaton pëshonin ya'caricaso marë'. Co shiin nohuitatonhuë', itapon:

—¿Canta quëmaro'co nii topirahuë? itérin.

—¿Ma'ta nipachin pahuërëaponco? ténin sanapinta'.

¹⁷ —Pë'tahuarahuësopita quëran, a'nara chipoa'hua a'patiaranquën, itaantarín Cotari.

—Inta nipachin. Napoaponahuë', ma'sha téranta quëmaquën nininsö' patëquë'. Chipoa'hua a'patianco huarë', cari tapaarahuë, itérin sanapiri.

¹⁸ —¿Ma'ta nipachin pachi? ténin Cota.

—Sicho po'moitëranën pë'natërangoarë chachin, huaranën, inapita patëquë', itérin. Napotohuachina Cotaso', nataninsopita quëtérin. Inapoaton tècarihuachina, naporo chachin hua'huantérin. ¹⁹ Ina quëran Tamaraso', pa'pin ya'huërinquë panantarín. Nipa'shinayatérinsö ocoirin. A'morinsonta ocoirahuaton, naquëranchin quëyoron a'morinso a'moantarin.

²⁰ Ina quëran Cotariso', chipoa'hua a'patérin. Amiconën Irori quëpatérin. Sanapi acoantérinsopita ayantacasó

marë' a'patopirinhue', inariso co huachi quënanconinhuë'. ²¹ Napohuachina, ya'huëhuano'sa natanin:

—Monshihuantë sanapi Inain ira pirayan huënsëyantérinso': ¿Intohuata pa'nin? itérin.

—Co isëquë monshihuantë sanapi ya'huërinhuë', itopi. ²² Napotohuachina, Cota ya'huërinquë huëantarahuaton, itiintarin:

—Co'chi sanapi quënanconahuë paya. Ya'huëhuano'santa': “Co isëquë monshihuantë sanapi ya'huërinhuë”, itérinaco, itérin. ²³ Napotohuachina, Cotari itapon:

—Ma'ta pini. Noyatapon. Quëtërahuësopita yamapachin, main nipachin. Ina marë' nanan ocoihuatëhuaso', piyapi'sa tëhuaponënpoa'. Nanichi chipoa'huaya a'patochinpirahuë', co quëmari quënanconanhue', itérin.

²⁴ Cara yoqui quëran pochin, Cota sha'huitapona huëcapaipi:

—Shiparin Tamara itérëhuaso', monshihuaniñ. Napoaton iporaso' cayorin huachi, itopi. Natanahuaton Cotaso', no'huitaton yai ténin:

—¡Ocoirahuatoma', a'pëco chimiin! ténin. ²⁵ Ya'huëhuano'sari Tamara a'pëcaso marë' ocoirapirinahuë', inaso shiin nanan a'patérin: “Iso sicho po'moitëra pë'natérinsorë chachin nininso' hua'anën, napotérinco. Iso huaranta', inanquëñ chachin ni'ton, noya nicaton nohuitëquë”, itëquë', itérin. ²⁶ Cotaso', shiini a'patérinsopita nohuitahuaton, naporin: “Tëhuëñchachin caso co noyahue' ninahuë'. Co Sira acoantatohue', tëhuërahuë. Inaso niperinhuë', noya noya ninin,”

tënin. Naporo quëran huarë' Cotaso', co huachi onporo téranta shiin tēcariantarinhüë'.

²⁷ Tamara huaicaso nanihuachina, catopia'huaya hua'huatopi. ²⁸⁻²⁹ Nasitapona napopi: A'na'ton imiria'huain ocoirin. Napohuachina ahuaitona'piri, quëhuan pi'shiquë, tonpotanpatérin. “Iso'ton hua'huacharin,” ta'ton, napotérin. Napopirinhüë', hua'huashaso tanpara'huain po'moantarin. Shiarahuaton a'naso', nasitochanin. Napoaton ahuaitona'piri nininën acotérin: Parisi* itérin. “Ya'copirinquënsi inquirahuaton, pipiran,” itahuaton, inapochin nohuitérin. ³⁰ Quëhuan pi'shiquë tonpotanpatérinsoso', ina piquëran hua'huatérin. Inaso' nohuitaton: Saro itérin.

39

Hua'an sa'ini, Cosi apirinso'

¹ Sha'huitéranguëmaso chachin Cosiso', Ismairo nicatono'sari Iquipito no'paqué quëpapi. Inaquë a'nara Iquipito quëmapi Potihuaró itopiso' pa'antopi. Inaso', Iquipito copirnori catahuacaso marë' acorin. Capitan ya'conaton, copirno a'paipisopita sontaro'sa camairin. ² Cosiso napotopirinahuë', Siniorori co nariantérinhüë'. Inari catahuarin ni'ton, hua'anën pëinënqué noya yonquiaton yacapatérin. Noya nicaton, noya ya'huërin. ³ Cosiso', Yosëri catahuarin. Hua'anëni ina nicaton: “Nani ma'sha Cosi nipachina, Yosëri catahuarin ni'ton, noya pipitérin,” tënин. ⁴ Napoaton pa'yatérin. Pa'yataton, acorin

* **38:28-29** Parisiso': Pasoarinso' tapon naporin.

catahuacaso marë'. “Ma'pitasona ninahuëquë, quëma catahuaponco,” itërin. Naporahuaton, ya'ipi piyapinënpita camaiaton asacatacaso marë' acorin. Ya'ipi ma'shanënpitanta a'paicaso marë' acorin. ⁵ Ina acorin quëran huarë', Siniorori Potihuaro catahuamiatérin. Cosi noya nicaton, napotérin. Pëinënquënta ma'sha nipachina catastuarin. Iminënquënta sacatohuachina', sha'topiso' noya noyatérin. ⁶ Cosiri ya'ipi ma'shanënpita noya a'paitérin ni'ton, co huachi ma'marë téranta yonquiárinhuë'. Topinan noya coshatárin huachi.

Cosiso', noyapin noyapin ni'tomantarin ni'ton, ya'ipi quëran pa'yatopi. ⁷ Napoaton co hua'quiya quëranhuë', hua'anëñ sa'iní ni'sárin quëran noyarín huachi. A'na tahuëri itapon:

—Huëquë pa'a quëmaso' inapoquë', itërin. ⁸ Napotopirinhue', Cosiso co pi'pisha téranta nohuantérinhue'. Napoaton itapon:

—Ni'quë siyora, pi'pian sha'huichinquën topirahuë: Hua'anëhuë ya'ipi ya'huëtérinsopita a'paia'huaso marë' acorinco. Cari ya'ipi a'paia'ruhuë ni'ton, co ma'marë téranta yonquiárinhuë'. Natérinco ni'ton, sano cancantérin. ⁹ Chini chiníquënan quëtérinco iso pëiquë camaita'huaso marë'. Naporahuaton, hua'anëhuë co ma'sha téranta apiratérincohue'. Quëmasáchin têhuëñchinso' sa'inquëñ ni'ton, apiratérinco. Napoaton, co caso pi'pian téranta nohuantérahuë' pa'pi co noyahue' niniso' nicaca'huaso'. Naporahuaton quëmarë'co ninahuë naporini, co Yosë natëtohuë', pa'pi oshahuaintohuë! itërin. ¹⁰ Napotopirinhue',

sanapiriso Cosi ichiquëhuënacaso marë' nani tahuëri apisárin. Inaso napoaponahuë', co pi'pisha térranta nohuantérinhue'.

11-12 A'na tahuëriso nípirinhue', Cosi pëiquë sacatapon ya'conin. Naporo' co a'napita ya'huëasoihuë ni'ton, sanapiso Cosi so'huiyanarinso matérin. Inapotaton:

—Huëquë pa'a quëmaso inapoquë', itérin. Napotopirinhue', Cosiso niso'huiyanatérinso pa'coirahuaton, ta'arin.

13-15 Ina patérinsو ni'sahuaton, sanapiso yanonpinin. Yanonpinaton chiníquën huiyo ténin. A'napita piyapinënpita péracaso marë' naporin. Huë'pachinara, itapon:

—¡Ni'cochi iso! So'yahuë a'nara iprio piyapi quëshiantérinpoa tapiinpoaso marë'. Ya'conahuaton masapirincohuë', canpita huëcacamaso marë' caso chiníquën huiyo ténahuë. Ina natanañton, ta'arë'nachin pipirin. ¡Niso'huiyanatérinsonta', patérin! itérin.

16 Piyapinënpita napotahuaton, Cosi niso'huiyanatérinso' taparin. So'in huëcaquë huarë' taparin. **17-18** Ina huë'pachina, piyapinënpita sha'huitérinso chachin inanta sha'huitérin:

—Iprio piyapi quënanso', patoananëhuëquë ya'conahuaton masapirincohuë'. Chiníquën huiyo topatora, a'porahuatonco ta'arin. Niso'huiyanatérinsonta', patérin. **19** ¡Inapotérinco piyapinë! itérin.

Sa'ini sha'huitérinso' natanañton, Cosi hua'anënsö pa'pi no'huitérin. **20** Cosi macacaiso marë' piyapinënpita camairin. Nani mapachinara, tashinan pëiquë po'mopi. Copirno

tëhuëtopisopita ya'huëapiquë po'mopi. ²¹ Tashinan pëiquë po'mopirinahuë', Siniñoriso' co Cosi nariantérinhue'. Nosoroaton catahuaantarin ni'ton, tashinan pëi hua'ani, noya nicaton pa'yatérin: "Cosiso', noya hui'napi," ta'ton, noya ni'nin. ²² Napoaton catahuacaso marë' acorin: "Quëmari a'napita prisoro'sa', a'paiaran," itérin. Napoaton Cosi camaitérinsoráchin tashinan pëiquëso', prisoro'sa nipi. ²³ Cosi camaitohuachina tashinan pëiquë, noyasáchin sacatopi. Napoaton tashinan pëi hua'anso', co huachi Cosi sacatérinso' ni'sárinhue': "Siniñori chachin Cosiso catahuarin ni'ton, ma'sona nipachina, noya pipitérin" ta'ton, naporin.

40

Hua'ano'sa hua'napiso', Cosiri no'tëquën sha'huitérinso'

¹ Ina piquëran cato hua'ano'sari Iquipito copirno tëhuëtopi: A'naso', copirno huino o'shitona'piro'sa hua'an. A'nanta', ina marë chachin pan nina'piro'sa hua'an. Cato chachin copirno tëhuëtopi. ²⁻³ Napoaton copirnori inapita no'huirin. No'huiton tashinan pëiquëtacaiso' camaitérin. Napohuachina cato chachin inaquë po'mopi. Ina tashinan pëiso', copirno a'pairinsopita capitán pëinënqué ya'huërin. Cosi ya'huëarinqué chachin po'mopi. ⁴ Copirno a'pairinsopita capitániso', Cosi itapon: "Isopita cato hua'ano'sa quëmari noya a'paiton, catahuaquë'," itérin. Inapotohuachina inapita hua'ano'saso', hua'qui inaquë ya'huëpi.

5 A'na tashiso nimirinhuë', cato hua'ano'sa chachin, hua'napi. A'naya a'naya hua'napiro', co inachachin tapon hua'napihuë', nisha nisha tapon hua'napi. **6** Tashíramiachin Cosiriso nicapon huë'pachina, sétápi quënanquirin. **7** Napoaton, cato chachin natanin:

—¿Onpoatomata iporaso' pa'pi sétëramaso pochin ya'norama? itérin.

8 —Catoco chachin hua'napiroahuë', co insonta ya'huérinhuë' ma'sona tapon hua'naraiso anitoticoiso', itopi.

—¡Yosë mini nanitérin ma'sona tapon hua'narésopita anitotiinfoaso'! Sha'huitoco hua'naramaso', itérin.

9-10 Napotohuachina o'shina'piro'sa hua'anso', hua'narinsos Cosi sha'huitérin:

—Huë'ëhuëquë a'nara opa ya'huë ni'nuhüe, cara së'pahuaninso'. Nicasoco chachin, papo së'patarin. Papo së'patahuaton, yancotarin. Yancotérinquëranchin nitérinsopita cayarin. **11** Ina pirayan canta', huaraon o'orinso' minënën së'quéato, huaniárahuë. Opa cayarinso masahuato, huaraon o'orinquë shi'shirahuë. Inapotahuato huaraon ihuëtérahuë. Ihuëtahuatora ma'parinco huachi, itérin. **12-13** Napotohuachina, Cosiri itapon:

—Naporinchi paya. Ma'sona tapon hua'naranso sha'huichinquëen: Cara së'pahuaninso', cara tahuëri tapon naporin. Cara tahuëriya quëran, huaraonso' quëma têhuëranso' yonquiantarin. Nanan anoyatahuaténquëen naquëranchin acoantarinqüën ina marë' sacataantacaso'. Iráca naporanso chachin

naquëranchin o'shitaantaran huachi. Ina tapon, ina pochin hua'naran. ¹⁴⁻¹⁵ Inapotohuachinquën, canta nosoroatonco yonquico. Ocoincoso marë' huaraon sha'huitëqué'. Iprioro'sa ya'huëpiquë caso ya'huëpirahuë', topinan quëran no'huitonaco pa'aninaco. Co manta onporahuë ni'ton, co tashinan pëiquë ya'huápa'huaso ya'huérinhue'. Napoaton nosoroco canta', itérin.

¹⁶⁻¹⁷ Napotohuachina, copirno marë' pan nina'piro'sa hua'anta': "Noyachi sha'huitérin paya," ta'ton, hua'narinso Cosi sha'huitérin:

—Canta nimirihuë', iso pochin hua'narahuë: Cara ya'huiri pan acoinanquë pitëmotorahuato, huiriton pano'sa quëpárahuë. Ya'natontarinso acoinanquë, nisha nisha cashi cashin pano'sa copirno marë' ya'huérin. Napoaponahuë', in-airaro'sa huë'sahuatona pitëmotorahuë quëran capitarinaco, itérin. ¹⁸ Napotohuachina, Cosiri itapon:

—Cara pan acoinanso', cara tahuëri tapon naporin. ¹⁹ Cara tahuëriya quëran, huaraonso' quëmanta tēhuéranso' yonquiantarin. Naporo chachin piyapinënpita camaiapon: "Noninquë huëñquéconorahuatoma', naraquë pë'tëncu chimi'in," itapon. Inapotohuachinën, chanaro ca'tero'sari noshanën capona', itérin.

²⁰ Cara tahuëriya quëran, huaraon hua'huatérinso tahuëri nanirin. Naporo' ya'ipi catahuarinsopita hua'ano'sa ichicapacancanacaso marë', panca pita ninin. Ya'ipi përarinsopita ni'tonënqué huaraonso' camaitérin: "Cato hua'ano'sa chachin tashinan pëi quëran ocoico'," ténin. ²¹ O'shina'piro'sa hua'anso', naquëranchin asacataantarín.

Napoaton naquëranchin iráca pochachin huaraon o'shitaantarin. ²² Pan nina'piro'sa hua'anso nimirinhue', huaraoni piyapinënpita camairin naraquë pë'tënacaiso marë': "Noninquë huëñquëconorahuatoma", tëpaco'," itérin. Cosiri sha'huitérinso chachin nitopi. ²³ O'shina'piro'sa hua'aniso', Cosiri catahuacaso marë' sha'huitérinso', nariantérin. Inapoaton co catahuarinhuë'.

41

Huaraon hua'nahuachina, Cosiri no'tëquën sha'huitérinso'

¹ O'shina'piro'sa hua'an, tashinan pëi quëran pipirinso' nani cato pi'ipitérin. Naporó' huaraon chachionta hua'narin. Niroi' yonsanquë huaniarin nihua'narin. ² A'nanaya ni'pirinhue', canchisë ohuaca' Niroi' quëran pipirapi ni'nin. Pa'pi amoshináchin pipirapi. I' quëran pipirahuatona', shi'shinamatéro' huáncana coshatapi. ³ Ina quëran niantapirinhue', canchisë chachin Niroi' quëran pipirapi ni'nin. Inapitaso' capa nishinahuën nansëyaráchin niconpi. Pipirahuatona i' yonsanquë a'napita ohuacaro'sa pirayan huanirapi. ⁴ Nicaso chachin, inapitaso', amoshino'sa pashica ta'papi. Inapotatona', canchisë chachin pë'yaquë huarë' ca'miatopi. Naporó' huaraonso' capayatérin. ⁵ Naquëranchin huë'ëantapirinhue', hua'naantarin. Canchisë trico moto' noya noyatérinso' a'na nanquëáchin nitérin ni'nin. ⁶ Inapita pirayan, canchisë chachin pipiantarin. Inapitaso' pi'iri ahuiquitérinso pochin ya'nopi. ⁷ Inapitanta noya noyatérinso

nipisopita pashica ta'papi. Inapotatona pë'yaquë huarë' ca'miatopi. Naporo chachin huaraonso' capayataantarin. Capayatahuaton: "Co ipora topinan ina pochin hua'narahuë," tënин.

⁸ Tashiramiachin huaraonso' hua'narinso yonquiaton, co napión cancantérin. Napoaton piyapinënpita camairin ya'ipi Iquipito no'paquë ninotona'piro'sa huëcacaiso marë'. Quirica nitotoro'santa amatérin. Inapita huë'pachinara, hua'narinso' sha'huitérin. Sha'huitopirinhue', co incari téranta nanitérinhue' ma'sona tapon hua'narinso sha'huitacaiso'. ⁹ Naporo huarë' o'shitona'piro'sa hua'an Cosi yonquirin. Ina yonquiaton huaraon itapon: "Ipora huarë' yonquirahuë ma'sona i'hua chachin nica'huaso' nininso'. ¹⁰ Quëmaso' chiníquën nanantérán. Caso piyapinëncó nipirahuë' sha'huitaranquë. Pan nina'piro'sa hua'anoco chachin, iráca no'huitoncoi tashinan pëiquë apo'motérancioi. Inaso' tashinan pëi', a'pairinëñquënsopita capitán pëinëñquë ya'huérin. ¹¹ A'na tashiso' catocoi chachin hua'narai. A'naya a'nayacoi nisha nisha tapon hua'narai. ¹²⁻¹³ Inaquë chachin quiyaro'coi a'nara iprio hui'napi ya'huéarin anta'. Inaso' ina capitani chachin, asacatacaso marë' pa'anin. Hua'naraiso sha'huitohuatéira, ma'sona tapon naporinso no'tëquëñ sha'huitérincoi. Sha'huitérincoiso chachin caso naquëranchin asacataantaranco. A'naso nipirinhue', noninquë ahuëñquëconotahuaton atëpatérán," itérin.

¹⁴ Inapo sha'huitohuachina, copirnoso Cosi ma-contacaso marë' piyapinëñ a'parin. A'naroáchin tashinan pëi quëran ocoipi. Cosiso niya'itahuaton,

nitaparin. Noya nininso' a'mosahuaton, huaraon nicapon pa'nin. ¹⁵ Canconpachina, huaraoni itapon:

—Caso hua'napiroahuë', co insonta nanitérinhue' ma'sona tapon hua'narahuëso sha'huitiincoso'. Quëma tēhuëñchins' nitotëran, topi natantërahuë, itérin.

¹⁶ —Co caora nohuanton nitotërahuë'. Quëma piyapinënc' ni'to, Yosë chachin anitotohuachinco, sha'huitaranquën. Ma'sona noya nicacaso marë', sha'huitaranquën, itérin.

¹⁷ Napotohuachina huaraoni itapon:

—Huë'ëhuëqué Niroi' yonsanquë huaniárahuë hua'narahuë. ¹⁸ Naporo chachin, canchisë ohuaca' pa'pi amoshináchin nipsisopita, i' quëran pipirapi. Pipirahuatona shi'shinamatéroquë coshatapi ni'nahuë. ¹⁹ Ina quëran canchisë chachin pipiantapi niantarahuë. Capa nishinahuën nansëyaráchin pipirapi. Co onporo téranta ya'ipi Iquipitoquë ina pochin nipsisopita ni'chinahuë! ²⁰ Nicasoco chachin, inapitaso', amoshino'sa pashica ta'papi. Inapotatona canchisë chachin, pë'yaquë huarë' ca'miatopi. ²¹ Pë'yaquë huarë' caponaraihuë', co manta ca'pisohuë pochin ya'nopi. Naporo capayatërahuë.

²² Huë'ëantapirahuë', naquëranchin hua'naantarahuë: Huë'ëhuëqué Canchisë trico moto' noya noyatérinso' a'na nanquëáchin nitérin ni'nahuë. ²³ Inapita pirayan, canchisë chachin pipiantarin. Inapitaso' pi'iri ahuiquitérinso pochin ya'nopi. ²⁴ Inapitarinta noya noyatérinso nipsisopita pashica ta'papi. Inapotatona pë'yaquë

huarë' ca'miatopi ni'nahuë. Ninotona'piro'sa sha'huitopirahuë', co insonta nanitërinhuë' ma'sona tapon naporinso', sha'huitiinacoso', itërin.

²⁵ Napotohuachina, Cosiri huaraon itapon:

—Caso quëma piyapinënco nimirahuë', sha'huitaranquën: Catoro hua'narango', a'naíchin tapon hua'naran. Ina quëran Yosë chachin anitotërinquën ma'sona ina nicacaso' yonquirinso'. ²⁶ Canchisë ohuaca' noyápiachin nipsisopita, canchisë pi'ipi tapon hua'naran. Canchisë trico moto' noyápiachin nipsisopitanta', ina chachin tapon naporin. ²⁷ Canchisë ohuaca' capa nishinahuë'n nansëyaráchin nipsisonta', hua'naran. Inapitaso', amoshino'sa piquérana pipipi. Inapitanta canchisë pi'ipi chachin tapon naporin. Ina pochachin noya noyatërinso' trico moto' pirayan, canchisë chachin papoantarin hua'naran. Pi'iri ahuiquitërinso pochin ya'nopisopitanta', ina chachin anitotërinpoa'. ²⁸ Napotëranquënsa chachin mini nisarin. Piyapinënco nimirahuë', Yosë ma'sona yanininso nani sha'huitëranquën. ²⁹ Yosë nohuanton canchisë pi'ipi iso Iquipito no'paquë nani ma'sha noya noyatapon. Co manta pahuanaponhuë'. ³⁰⁻³¹ Ina piquéranso nimirahuë', canchisë pi'ipi chachin panca tanarotapi. Napoaton co huachi inso térranta', Iquipito no'paquë noya ya'huërinso yonquiarinhuë'. Pa'pi pahuantomiatapi ni'ton, co huachi iso no'paquë noya ya'huaponahuë'. ³² Caso piyapinënco nimirahuë' sha'huitaranquën. Nani Yosë yonquirin inapocaso'. Naporahuaton co hua'quiya quëranhuë' naniarin. Napoaton ina

nohuanton, catoro inachachin hua'naran.

³³⁻³⁴ Inapocaso ni'ton, a'nara quëmapi yonquínahuan ni'ton, noyá nitotërinso' yoníquë'. Ya'ipi iso no'panënqué ya'huëpisopita camaicaso marë' acoquë'. Naporahuaton, chirinchiro'sa acoquë' ya'ipi hua'anënteranqué pa'ina'. Cosharo yontonacaiso marë' pa'ina'. Noya noyatacaiso' pi'ipiro'saquë yontoina'. A'natérápo costaro quérán, a'na costarora ma'pachina'. Ya'ipi Iquipito no'paquë inapo'ina'. ³⁵ Naporo' pi'ipiro'saquë trico yontonpiso', niquë tapaina'. Quëma chachin anitotahuaténen, ninanoro'saquë tapaina'. Tanaro tahuëri'sa canquihuachina, capacaiso marë' inapo'ina'. ³⁶ Inapohuachina', Iquipito no'paquë trico tapapinan ya'huapon. Canchisë pi'i tanarotacaiso canquihuachina, ina ca'sapi huachi. Ina capatona', ya'ipi iso no'paquë ya'huëpisopita co chiminaponahuë', itérin.

Copirno ya'huérënamën camaitacaso marë' Cosi acopiso'

³⁷ Cosi yonquirinso natanahuatona', huaraonso hua'ano'sapitarë chachin: “¡Ma nónyacha yonquirin paya!” topi. ³⁸ Napoaton huaraonso' piyap-inënpita itapon:

—Iso quëmapiso', Yosë ispiritonení chachin ya'coancantérin. Co onporonta a'na quëmapi iso pochin nininso' ina sacato nicacaso marë' quënanarihuahuë', tënин. ³⁹⁻⁴⁰ Piyapinënpita napotahuaton, Cosi itapon:

—Co a'na quëmapi quëmá quérán yonqui yonquínahuan ni'ton, noya noya nitotërinso ya'huérinhuë'. Yosë chachin ya'ipi inapita

anitotérinquëñ. Napoaton carinquëñ acoaranquëñ pëinëhuëquë, ya'huënamëhuë camaitacaso marë'. Ya'ipi piyapinëhuëpitanta natëinënquëñso ya'huërin. Copirnoco ni'to, casáchin quëmá quëran chini chiniquëñ nanantarahuë. ⁴¹ Ni'quë'. Ipora tahuëri carinquëñ acoaranquëñ ya'huënamëhuë ya'ipi Iquipito no'pa' hua'anëntacaso marë', itérin.

⁴² Napotahuaton huaraonso', imisirinquë sicho po'moitéranëñ po'morinso' ocoirin. Ina ocoirahuaton Cosi imisirinquë po'motérin. Inapotahuaton, piyapinënpita camairin: "Noya noya rino pi'shi quëran në'mëtë nipiso' a'motoco'. Naporahuaton, osëtë oro quëran nipiso', apë'pëconotoco'. ⁴³ Ina quëran, toronanëhuëquë pa'patora, imaquirinso toronanquë ananpëco'. Inapotahuatomá', quëpacó'. Ina quëpasëma', piyapinëhuëpitari chiniquëñ sha'huiina': '¡Isongo!' tëra'ina!', itérin. Ina pochin copirnori Cosi acorin ya'ipi Iquipito no'paquë, camaitacaso marë'. ⁴⁴ Ina piquëran huaraoni Cosi itaantapon:

—Ca mini copirnoco no'paquë inaora nohuantérins'o nisarinhuë'. Naniyarin quëran huarë' ma'sona nicacaiso', quëma camitaran, itérin. ⁴⁵ Copirnori, Cosi Iquipito nananquë nisha nininën acotérin: Sahuinato-paniya, itérin. Naporahuaton Potihuira hui'nin Asina itopiso' acoantérin. Potihuiraso', On ninanoquë corto hua'an ya'conin. Ina pochin Cosi, ya'ipi Iquipito no'pa' hua'anëntacaso marë' acopi.

⁴⁶ Cosi cara shonca pi'ipitohuachina, Iquipito copirno marë' caniaritérin sacatacaso'. Nani acohuachina, huaraon nontahuaton

caniarit  rin ya'ipi Iquipito no'pa' pa'tacaso'. **47** Canchis   pi'ipi noya noyatacaiso' pi'ipiro'saqu  , hu  huay  t  rahu   cosharo noyat  rin. **48** Cosiri ya'ipi trico tapacaiso nininso', ma'pat  rin. Ma'pataton, ninanoro'saqu   taparin. Canchis   pi'ipi naporin. Nani ninanoro'saqu   trico taparin. Ina pirayan imino'saqu   sha'pisopita mapiso', taparin. **49** Pa'pi notohuar  'trico Cosiri ayontonin. Mar   yonsanqu   inot  ra'hua ya'hu  rinso pochin ayontonin. Pa'pi notohuar  ' ni'ton, pichir  pirinahu  ', co onpo pichichin  chinh  ' nipachina, tananpitopi huachi.

50 Co'huara tanarotacaiso caniarich  t  rasohu  ', Cosiso cato hui'ninpita ya'hu  t  rin. **51** Paninanso' Manasisi it  rin: "Yos   chachin parisit  rahu  so', qu  mopin  hu  pita, inapita ananiant  rinco," ta'ton, ina pochin hui'nin nohuit  rin. **52** Ina qu  ran niantarinsoso', Iprain it  rin. "Yos   nohuanton parisit  rahu  so no'paqu   chachin noya noya acorinco," ta'ton ina pochin hui'nin nohuit  rin.

53 Canchis   pi'ipi Iquipitoqu   ma'sha noya noyatacaiso' pi'ipiro'sa', na'hu  rin huachi.

54 Napor  ' Cosi naporinso chachin, tanarotacaiso caniarit  rin. Canchis   pi'ipi chachin naporin. Ya'ipi a'napita no'paro'saqu  nta', tanarotopi. Iquipitoqu  r  chin cosharo tapapinan ya'hu  rin.

55 Iquipito ya'hu  huano'santa cosharori pahuantohuachinara, huaraon paapapi. Trico natanacaiso mar  ' paapapi. Natanpachinara, huaraoni ya'ipi iquipitoro'sa itapon: "Paatoma', Cosi nontoonco'. Ma'sona itohuachinqu  ma', ina nico'," it  rin. **56** Ya'ipi Iquipito no'paqu   piyapi'sa tanarotacaiso caniaritohuachina, Cosiso

chirinchiro'sa camairin: “Cosharo taparëhuaso pëiro'sa i'soatatom'a', ya'huëhuano'sa pa'antoco',” itérin. Aquë aquëtë tanarotapi ni'ton, pa'antapi huachi. ⁵⁷ Naporahuaton ya'ipi parti quëran huë'sapi. Cosi trico taparinso' pa'antacaiso marë' Iquipitoquë huë'sapi. Co inso no'paqué téranta', cosharo noyatérinhue' ni'ton, naporapi huachi.

42

Cosi iinpitanta Iquipitoquë pa'piso'

¹ Iquipitoquë trico pa'anacaso ya'huërinso', Cacoponta' nataantérin. Ina natantahuaton, hui'ninpita itapon: “¡Co topinan nini'sápamaso ya'huërinhuë!” ² Nani sha'huitérinaco Iquipito no'paqué trico pa'anacaso marë' ya'huërinso'. Napoaton inaquë pa'matoma', pa'amaco'. Ama tana tiquiinfoaso marëhuë' inapoco',” itérin

³ Pa'pini napotohuachina, Cosi iinpitaso', shonca ya'pi trico pa'anapona Iquipitoquë pa'pi. ⁴ Mincaminso niperinhuë', pa'pini co nohuantérinhuë' a'pacaso'. Inaso', Cosi iin miachin. Ina yo'nanquéranchin pipipiso'. “Pa'ninquë tapona ma'sha yaonpoápirinhuë”, ta'ton, co yaa'parinhuë'. ⁵ Cacopo hui'ninpitaso', a'napita piyapi'sarë' pa'pi. Ya'ipi Canaan parti tanarotopi ni'ton, notohuaro' pa'mapi.

⁶ Nani sha'huitérinquëmaso chachin Cosiso', huaraon ya'huërenamën ya'ipi Iquipitoquë camaitarin. Naporahuaton ina camaitohuachina, ya'ipi parti quëran huë'pisopita, trico pa'antapi. Iinpitanta camahuachinara, nontacaiso marë' isonpi quëran no'paqué

huarë' monshorahuatona', moshaipi. ⁷ Ipora quënanapon chachin Cosiso', iinpita nohuitérin. Nohuitaponahuë', co nohuitérinhue pochin ninin. Napoaton no'huitatë pochin co yashinhue' nontérin:

—¿Canpita po'? ¿Intoparanta huë'nama'? itérin.

—Canaan parti quëran, trico pa'anapoi o'marai, itopi. ⁸ Cosiriso iinpita nohuitérin. Inapitariso napoaponahuë', co ina nohuitopihuë'.

⁹ Naporo' Cosiso', iráca hua'naton iinpita sha'huitérinso' yonquirin. Ina yonquiaton itapon:

—Canpitaso', néhuëtona'pirosanquëma ténahuë. No'panëhuëi inséquësona co noya a'paipinanhue' ni'camaso marë' huë'nama', itérin.

¹⁰⁻¹¹ —¡Co sinioro inacoihuë! Quiyaso' quëma piyapinënpita pochin ninai. Tricoíchin pa'anapoi o'marai. Ina tataquëranchin ya'ipicoi ninai. Co onporo térranta néhuëtochinaihuë', itopi.

¹² —Nonpiánama'. No'panëhuëi inséquësona co noya a'paipinanhue' ni'camaso marë' huë'nama ipora, taantarín Cosiso'. ¹³ Napotopirinhue', inapitariso itapona':

—Quiyaso' quëma piyapinënpita pochin ninai. Ya'ipiya quëran ina tataquëranchin, shonca catocoi ninai. Canaan parti ya'huërai. Hua'hua nininsoso', tatarë' quëparitérin. A'nsaso nimirinhue', ayarin, itaantapi.

¹⁴⁻¹⁵ —¡Nani napotëranquëma! Canpitaso' néhuëtona'piro'sanquëma ténahuë. Iyaparima hua'hua niniso quëcama huarë', no'tequën nonamaso' nitotarahuë. Huaraon ya'huërin ni'ton, no'tequën nontaranquëma'. Co ina quëpatamahuë', co onporonta iséquëran

pipiaramahuë'. ¹⁶ A'naquëma paaton maconta'in. A'napitanquëmaso nimirinhue', tashinan pëi ya'contarama'. Ina huë'pachin, naporo huarë' naporamaso natëaranquëma'. Co'so' huë'pachinhue', tëhuëñchachin nëhuëtona'piro'sanquëma'. ¡Huaraoñ ya'huërin ni'ton, no'tequen nontaranquëma'! itérin.

¹⁷⁻¹⁸ Cara tahuëri Cosiri iinpita tashinan pëiquëtérin. Inapotopirinhue', nontaantarín:

—Canta Yosë tê'huatérahuë. Iso pochin nipatama', co têpaaranquëmahuë'. ¹⁹ Tëhuëñchachin noya nina'piro'sanquëma nipatama', a'naquëma tashinan pëiquë quëparichin. A'napitanquëmaso nimirinhue', quëmopinëma capacaiso marë' trico quëpatoma', panantaco'. ²⁰ Ina quëran, no'tequen nonamaso' nitota'huaso marë', iyaparima hua'hua nininso quëshimaco. Co'so' quëmahuatamahuë' têhuëñchachin chiminarama', itérin. Napotohuachina: "Noyapa'," topi. ²¹ Napoaponahuë', inahua capini ninontopi:

—Tëhuëñchachin canpoaso' iráca pa'pi co noyahuë' ninëhua'. Iya'hua ma'sha onpotohuatëhuara, nosorochináchin nontopirinpoahuë', co nosororëhuahuë'. Co napión ancantérinso nicarihuarahuë', co tahuërëtérëhuahuë'. Napoaton iporasо' canpoanta', po'sarëhua huachi, nitopi. ²² Napohuachinara, Nopinori itapon:

—Co'ta carima': ¡Ama napotocosohue'! itopiranquëmahuë', co natëramacohue'. Napoaton iporasо' canpoanta', têpatona'pi i'huërëtopiso pochin nitarinënpoa', itérin. ²³ Inapitaso', Cosiri ya'ipi nataninso' co nitotopihuë'. Iquipito nanan quërächin nontérin ni'ton, napopi.

Nontohuachina, a'nari inahua nonpiquë ohuérerin ni'ton, co nitotopihuë'.

²⁴ Iinpita ninapotapiso natanahuaton, Cosiso amashamiachin pa'sahuaton, na'nérin. Na'néi' cacotohuachina, huëantarín. Huë'sahuaton iinpita ni'tonénquë piyapinénpita camairin Simion macatona tonpocaiso'. ²⁵ Ina quëran camaitaantarín: "Costaronënaquë trico po'motoco'. Coriqui pahuérëtopisonta', inaquë chachin po'moantaco'. Naporahuaton, cosharo caracaiso marënta quëtoco'", itérin. Camairinso chachin piyapinénpita nipi.

²⁶ Inapotohuachinara, moranënaquë triconëna a'mitahuatona', ya'huëpi'pa' panantapi huachi.

²⁷ Huë'ëcaiso nininquë canconpachinara, a'naso', moranën a'cacaso marë' costaronën i'shiriterin. Inapotopirinhuë', trico marë' coriqui pahuérëtérinso' quënanin. Ina quënanaton, pa'yanin. ²⁸ Pa'yanaton, iinpita itapon:

—Ni'cochi. ¡Trico marë' pahuérëtérahuëso', ayantaantarínaco! ¡Costaronëhuëquë chachin quënanahuë! itérin. Iinpitaso natanahuatona', pa'pi pa'yanpi. Pa'yanahuatona', inahua capini ninontapi: ¡Yosë ana'intarinpoa ni'ton, co pahuérëtaponahuë' trico quësarín! Nitopi.

²⁹ Ya'huëpíquë cancontahuachinara, ya'ipi napopiso pa'pina sha'huitopi:

³⁰ —Iquipito no'pa' hua'anquë camahuatoira, co yashinyánterahuë' nontérincoi. "Canpitaso', nëhuëtona'piro'sanquëma ipora," itérincoi.

³¹⁻³² Napotopirincoihuë': "Co quiyasó' inacoihuë'. Co onporonta nëhuëtochinaihuë'. Ina tataquëranchin shonca catocoi ninai.

Hua'hua nininso', Canaan parti tatarë' quëparitërin. A'naso nimirinhue', ayarin," itërai. ³³⁻³⁴ Napotohuatoira, itaantarincói: "A'naquëma isëquë quëparichin. A'napitanquëmaso nimirinhue', quëmopinëma capacaiso marë' trico quëpatoma', panantaco'. Napoaponahuë', iyaparima hua'hua nininso quëshimaco. Naporo huarë' co nëhuëtonapiro'sanquëmahue ninamaso' nitotarahuë. Ina nitotohuato, iyaparima quëparitërinso' ocoitaranquëma'. Nisahuaton, noya huachi nanitarama iso no'paquë pa'anamaso'," itërincoi, itopi.

³⁵ Nani pa'pina sha'huitahuatona', trico ohuatopi. Ohuatohuachinara, Cosi iinpitaso', a'naya a'naya costaronënaquë, coriquinëna quënaantapi. Tanpanantëa'huayaquë ya'huëarin quënaantapi. Ina quënanatona', pa'pi pa'yanpi. Pa'pinanta pa'yanin.
³⁶ Naporo' Cacopori itapon:

—Canpitaso hui'nahuëpita tiquitaramaco. Cosi ayarin. Simionta capa. ¡Iporaso Mincanta yaquëpataantaramaco! ¡Ya'ipi inapita casa', ahuanta'huaso ya'huërin! itërin ³⁷ Naporo' Nopinori, pa'pin itapon:

—Iya'hua a'pahuatan, cari tata a'paiarahuë. Co'so' quëshintahuatënquënhue', cato hui'nahuëpita nininso', nanitëran tëpamaso', itërin. ³⁸ Cacoposo nimirinhue', tapon:

—Hui'nahuëso', co onporo pa'sarinhue'. Iin mashonën nani chiminin. Inaíchin ina yo'nanquëranchin nipoiso' ya'huëarin. Pa'namaquë ina ya'huëre' ma'sha onpoantahuachin, caso mashoco, sëto tëpaponco huachi, tënин.

43

Mincamin Iquipitoquë quëpapiso'

¹⁻² Canaan parti co manta capacaso ya'huërinhuë' ni'ton, aquë aquëtë tanarotapi. Napoaton i'hua Iquipitoquë trico pa'anpiso' pë'yapi. Pë'yahuachinara, Cacoposo' naquëranchin hui'ninpita camariantarin:

—Pa'mantatoma trico pa'amantaco', itérin.
³⁻⁵ Napopirinhuë' Cotari itapon:

—Co'ta tata hua'an napotérincoiso', nani sha'huitérainquën: “Co'so' iyaparima hua'hua nininso quëmahuatamahuë', ama o'macosohuë'. Ina quëmama huarë' tahuërétaranquëma'” itérincoi. Iya'hua a'paantohuatancoi, naporohuarë' trico pa'antomarainquën. Co'so' a'paantohuatancoihuë', co pa'maaraihuë', itérin.

⁶ —¡Capitaso pa'pi co noyahuë' acoramaco! ¿Ma'marë chachinta ina quëmapi sha'huitérama a'na iya'hua ya'huëtinquëmaso'? itérin pa'pini.

⁷ —Na'con natanincoi onpo ya'huëtérëhuasona nininso': “¿Nanpiárin tataparima?” itahuatoncoi: “¿A'na iyaparimanta ya'huérin?” itomantaraincoi. Napo natanpachincoira, topinan a'panitërai. ¡Co quiyaso' nitotérailahuë': “Iyaparima hua'hua nininso quëshimaco,” itiincoiso'! itopi.

⁸ Naporohuarë' Cotari pa'pin itaantarin:

—Tëhuëñchachin tata nanpicaso' nohuanthuatëhua', iya'hua a'paqué pa'i. Cari a'paiarahuë. A'paantohuatancoi a'naroáchin pa'sarai. Inapohuatëhua', co chiminarihuahuë'. Hui'napoapitanta', noya nanpiapi. ⁹ Iya'hua

pa'pachin, cari ni'sarahuë. Ma'sha onpo-huachinso', ca ana'intoco huachi. Co'so' quëshintahuatënquënhuë', chiminaquë huarë' na'inarahuë. ¹⁰ Ihua chachin napotasënquën a'pantéranci naporini, ñnani catoro pa'sahuatoi, huénanta'itoihuë! itérin.

¹¹ Napotohuachina, pa'pini itapon:

—Co onpotacasohuë' ni'quëhuarë', isopoco nipachin: Hua'an nicanacamaso marë' iso no'paquë ma'sha noya noyatérinsopita costaronëmaquë quëpacó': Parsamo nimirio, ninoi', pimo hua'sai', pimo yaqui', tanpapi nitérinso', ni'to nitérinso', inapita pi'pian pi'pian po'motahuatoma', quëpacó'. ¹² Coriquinta', catoro' pa'anacaso nanirinso', quëpacó'. Ihua ayantérinquëmaso', inaora chachin quëtaantaco'. Tapona tëhuëatona', ayantérinënquëma'. ¹³ ¡Paco nipachin! Iya'hua quëparahuatoma', hua'an nimaantarico'. ¹⁴ Yosë ya'ipi nanitaparinso' nontarahuë catahuainquëma'. Ina nohuanton hua'an nosoro'inquëma'. Simionta nosoroaton ocoi'in. Naporahuaton, Mincanta a'painta'in. ¡Canta co hui'nahuan mashoco pochin quëparita'huaso Yosë nohuantohuachin, inapo'i nipachin! itérin.

¹⁵⁻¹⁶ Cacopo hui'ninpitaso', hua'an nicanacaiso nininsopita mapi. Ina masahuatona', coriquinta catoro pa'anacaso' nanirinso' mapi. Naporahuaton, Mincamin quëparahuatona', Iquipitoquë pa'pi huachi. Cosi ya'huérinquë camahuachinara, non-topi. Cosiso', Mincamin quëpiso quënanahuaton, piyapinën camairin:

—Isopita pëinëhuëquë quëpaquë'. Naporahuaton a'nara ohuaca' tëparahuaton, anpiquë'. Ipora camotëchin nisahuaso', inapitaro'co coshatarahuë, itérin. ¹⁷ Napotohuachina, piyapinënso' ina inachachin ninin. Cosi iinpita ina pëinënquë quëparin. ¹⁸ Napoaponahuë', inapitaso quëpasoi pa'yanpi. Pa'yanatona inahua capini ninontapi:

—Nonpintahuatënënpoa', pëinënquë quësarinfoa'. Ihua coriqui ayantërinpoaso marë' quësarinfoa'. Masahuatënënpoa piyapinënpta pochin asacatarinënpoa'. Moranënpoapitarë chachin asacatarinënpoa', nitopi.

¹⁹⁻²¹ Napoaton Cosi pëinënquë yaya'conpachinara, piyapinën itapona':

—Pi'pian sinioro nonchinquëen topiraihuë'. Ihua chachionta o'mapoi, têhuëñchachin trico pa'anapoi o'marai. Pa'anahuatoi panantápiraihuë', huancopi huë'ëconaiquë, costaronëhuëi i'shiriterai. I'shiritopiraihuë', coriqui pahuërëtéraiso' ya'ipi chachin costaronëhuëiquë quënanai. Napoaton quëtaanta'huanquëmaso marë' quëmantarai. ²² Incariso acomara, co quiyaso nitotërhaihuë'. A'na coriquinta ipora trico pa'antohuatëinquëma', pahuërëta'huaiso marë' quëmarai, itopi. ²³ Napopirinahuë Cosi piyapinëniso':

—Sano cancantoco'. Ama pa'yancosohuë'. Naporo' pahuërëtéramaso', nani manahuë. Yosë chinotëramaso nimara costaronëmaquë acotërinquëma'. Inachachin tataparimanta chinotërin, itérin.

Napotahuaton, Simion tashinan pëi quëran ocoirahuaton quëshirin. ²⁴ Ina quëran, ya'ipi chachin Cosi pëinënqué po'morin. Inaque i'sha nipa'morantëcaiso marë' quëtérin. Moranënäpitanta', a'carin. ²⁵ Camotëchin Cosirë' coshatacaiso', nani nitotopi. Napoaton ninapona pochin, nicanacaiso marë' quëshipiso', taparapi huachi.

²⁶ Cosi canquihuachina, nicanacaiso marë' quëshipiso' quëtopi. Naporahuatona', isonpi quëran no'paqué huarë' monshorahuatona', moshapi. ²⁷ Cosiri iinpita nontahuaton itapon:

—I'hua o'mapoma': ¿Tatahuëi ya'huëarin itëramaco pora? ¿Noya ya'huëarin? ¿Nanpiarin ipora huanta ti? itérin. ²⁸ Inapitaso' móñsho tahuatona':

—Tatahuëiso', quëma piyapinën pochin ninin. Noya ya'huëarin. Ipora huanta nanpiárin, itopi. ²⁹⁻³⁰ Cosiso yonquitopirinhuë', Mincamin quënanin. Inaso iya'huain. Ina yo'nanquëranchin nipiso'. Ina tasatahuaton, natanin:

—¿Isona: “Iya'hua a'na huëshirai” tënamaso ti? itahuaton, iin itapon: “¡Yosë chachin hua'hua catahuainquën!” itérin. Napotoso chachin iin ni'sahuaton, na'nëchináchin cancantérin. Napoaton a'naroáchin patoananënqué ya'conahuaton, na'nérin.

³¹ Na'nérinso' pa'cotohuachina, nipa'morayaton, pipiantarin. Pipirahuaton piyapinënpita camairin: “¡O'huinco huachi!” itérin. ³² Cosiso', a'na misaqué nisha o'huintopi. Cacopo hui'ninpitanta a'na misaqué nisha o'huintopi. Iquipitoro'santa Cosirë' coshatopiso', a'na misaqué nisha o'huintopi anta'. Iquipitoro'saso',

iprioro'sarë' coshatacaiso', na'in pochin ni'pi. Napoaton nisha coshatopi. ³³ Cosi iinpitaso', misaqué yahuënséhuachinara, Cosiri a'naya a'naya sha'huitérin huënsëcaiso marë'. Paninan'ton, ahuënsërahuaton, ina quëran niantarinso' ahuënsërin. Inapotaton, huinshoin nininquë huarë' ahuënsërin. Napoaton: "Pi'ipinënpoa no'téquën tantiarinpoa'", topi. Napoatona itohuara capini nini'pi. Nini'sahuatona', pa'yanpi. ³⁴ Cosiso inaora ca'ninsa chachin, iinpitanta a'carin. Mincaminso nimirinhuë' o'huintohuachinara, a'napita iinpita quëran na'con na'con acotopi. Nani coshatohuachinara, napopináchin o'opi. Inapoatona capa cancantopi.

44

Cosi, iinpita ténirinso'

¹ Nani ca'pachinara, o'opachinara, Cosiso piyapinën camairin:

—Isopita quëmapi'sa costaronënaqué, trico amëntatéquë'. Naporahuaton coriquinëna pahuërëtopisonta', a'naya a'naya costaronënquë chachin acotaantaqué'. ² Minënëhuë prata quëran nininsonta', hua'hua nininsa costaronënquë acotéquë'. Coriquinën, trico marë' pahuërëtérinso' pirayan acotéquë', itérin. Napotohuachina, piyapinënso' ina inachachin ninin.

³ Tahuëririnquë pi'i pipirirahuaso Cosiso', iinpita nontahuaton a'parin. Napohuachina moranënapitarë chachin pa'pi huachi. ⁴⁻⁵ Ninano quëran pipitona iinpitaso co aquëyátërasoihuë', Cosiso piyapinën itapon:

—Apira quëmapi'sa pa'piso', imaqüë'. Cantonahuaton napotëquë': “¿Onpoatonta canpitaso nosoropirinënquémahuë', co noyahuë' ninama'? Prata quëran minë nininso', hua'anëhuë o'oton nиноринсо chachin ihuatërama'. ¡Pa'pi co noyahuëchi ninama paya!” itëquë', itërin.

⁶ Cantonahuaton piyapinënso' Cosiri sha'huitërinso chachin itërin. ⁷ Napotohuachina, inapitariso itaantapi:

—¿Ihuatërama', itërancoi ti? ¡Co'chi quiyaso onporo téranta', inapo'itoihuë! ⁸ ¿Co'ta Canan parti quëran huarë' coriqui costaronëhuëquë quënanpatoira, quëshiantaranquën pora? ¿Onporahuatoita iporaso', pratahuë nípon, orohuë nípon, hua'anën pëinën quëran ihuachitoihuë'? ⁹ Quiyaso' piyapinënpita pochinchoco ninai. Incoi téranta minë quënapahuatancoi, chimiin. Quiyanta', piyapinënpita pochin asacatocoiténai, itopi. ¹⁰ Napotohuachina, Cosi piyapinënso' taantarín:

—Noyapa'. Naporama ni'quëhuarë', inapochinquëma nipachin. Nipirinhuë', insosona minë quënaparahuësoíchin, piyapinëhuë nisarin. A'napitanquëmaso', co manta onpoaramahuë', itërin. ¹¹ Napotohuachina, a'naya a'naya costaronëna chinohuaratona', i'shiritapi huachi. ¹² I'shiritohuachina yonisarin. Paninan nininso costaronën quëran caniaritahuaton, hua'hua nininso costaronënquë huarë', yonirin. Yonípachina, Mincamin costaronënquë quënanin huachi. ¹³ Ina nicatona iinpitaso', pa'pi sétahuatona a'moanpiso oshapi. Napohuachina, a'naya a'naya pë'pétonëna moranënaquë a'mitahuatona', naquëranchin ninanoquë ayaimantapi.

14 Cotaso', iinpitarë chachin Cosi pëinënqué canconpachina, inaso ya'huéarin quénamantapi. Quénanahuatona', isonpi quérان no'paquë huaré' monshorahuatona', moshaipi. **15** Moshasoi', Cosiso iinpita itapon:

—¡Co'chi canpitaso yonquinahuano'sa pochin-huë ninama paya! ¡Caso chiníquën nanantérahuë ni'ton, nito ninorahuë! itérin. **16** Napotohuachina, Cotari itapon:

—Tëhuëñchachin co onpo a'pania'huainso nanitérahuë! ¡Co naporaihuë', co ta'cahuaiso ya'huérinhuë! Oshahuanaiso', nani Yosë nitotérin. Ma'tana ya'huarai. Minénën maninsorë chachin asacatocoi, itopi. **17** Napotopirinahuë', Cosiriso itapon:

—Co napoarinhuë'. Insosona minénéhuë quénapapisoíchin piyapinéhuë nisarin. A'napitanquémaso', tatama ya'huérinquë noya panantaco'. Co insonta ma'sha onpotarinquémahuë', itérin.

Cota, Mincamin ya'huérénomén yaquéparitérinso'

18 Cosi napohuachina, Cotari amasha ya'carirahuaton, itapon:

—Pi'piyan sinioro nonchinquéen topirahuë. Yonquirahuëso no'tequën sha'huichinquën. Quémaso' huaraon pochachin chiníquën nanantérän. Napoaton ama no'huitonco ana'intaancoso maréhuë' napotaranquéen.

19 I'hua huë'naiquë, quémaso natanancoi tatahuëi ya'huétérincoiso'. A'na iyahuëinta ya'huétérincoiso', natanancoi. **20** Quiyarinta naporo sha'huitérinquë: “Tatahuëi ya'huétérincoi,

nani máshoya," itérainquën. A'na iya'huanta hui'napi ya'huétérincoiso', sha'huitérainquën. Inaso', tatahuëi nani máshoya niso' hua'huatérin. Naporo chachin sha'huitérancuën tatahuëri na'con nosororinso'. Ina yo'nanquéranchin hua'huatopisopita cato ya'huépirinahuë', a'naso ayarin ni'ton, inaíchin quëparitérin. Napoaton nosoromiatérin. ²¹ Naporo' sha'huitérancoi nohuitamaso marë' quëca'huaiso'. ²² Napotohuatancoira, sha'huitérainquën: "Iya'huaso', co nanitérinhue' pa'pin huëshicaso'. Huëshirin naporini, pa'pinsos' sëtori tëpa'itonhuë'," itérainquën. ²³ Napotopiranquënhue': "Co'so' iya'huá quëpatamahuë', co onporonta tahuérëtaranquëmahuë'," itérancoi.

²⁴ Tatahuëitaquë canconpatoira, ya'ipi quëma napotérancoiso' sha'huitërai.

²⁵⁻²⁶ Hua'quimiachin quëran, tataso' camairincoi: "Pa'sahuatomá' trico pa'amantaco'," itopirincoihuë', quiyariso': "Co nanitérainihuë'. Iya'huá a'paantohuatancoira, naporo huarë' pa'sarai. Co'so' ina quëpahuatoihuë', co hua'an tahuérëtarincoihuë'," itërai. ²⁷ Napotohuatoira, tatahuëi sha'huitérincoi: "Canpita nitotërama sa'ahuëco' catoíchin hua'huaninso'. ²⁸ A'nasos', ayarin. Napoaton naporo quëran huarë' co quënanchinahuë'. Pa'piniri ca'mara tënahuë. ²⁹ In ya'huérë' quëparamaquëya ma'sha onpohuachin, canpita tëhuëarama'. Canpita tëhuëñëmaquë caso mashoco sëto tëpaponco huachi," itérincoi.

³⁰⁻³¹ Tatahuëso', iya'huarë' a'naíchin pochin nipi. Co'so' quiyarë' pantahuachinhue', tatahuëso chiminapon. Quiya tëhuëñëhuëiquë

tata mashoyaso' sëtori tëpapon. ³² Co'huara huë'shamátërapoihuë' sha'huitërahuë: "Iya'hua a'paantohuatancoi, cari ni'sarahuë. Ma'sha onpohuachinso', ca ana'intoco huachi," itërahuë. Naporahuaton napotomantarahuë: "Co'so' quëshintahuatënquënhuë", chiminaquë huarë' na'inarahuë," itërahuë. ³³ Napoaton nontaranquën natanco topirahuë. Ca iya'hua ya'huërënamën quëma piyapinën quëparichi tënahuë. Inaso iinpitarë', pananta'in. ³⁴ Co'so' iya'hua pantahuachinso', co caso nanitërahuë tatahuëtaquë, pananta'huaso'. Tatahuë ma'sha onporinso', co yani'nahuë', itërin.

45

Iinpitari Cosi nohuitopiso'

¹ Ya'ipi piyapinënpita ni'tonënquë Cotari nontérinso tonitohuachina, Cosiso co huachi ahuantérinhuë'. Co huachi ahuantatonhuë', Iquipito nananquë chiníquën nonin: "¡Ya'ipinquëma pipico!" itërin. Napotohuachina, ya'ipi piyapinënpita pipipi. Iinpitarëáchin nicaso', nohuitacaiso marë' sha'huirin. ² Sha'huiton Cosiso', na'nëmiatarin huachi. Chiníquën na'nërin ni'ton, ya'ipi iquipitoro'sa nitotopi. Huaraoñ pëinënquë huarë' a'naquënso pa'sahuatona', sha'huitonpi. ³ Naporoo huarë' Cosiso', inahuara nanamënaquë iinpita nontérin:

—¡Ca mini Cosico! ¿Nanpiárin iporahuanta tata? itërin. Napotopirinhuë', iinpitariso pa'pi të'huatatona', co nanitopihuë' nonacaiso'. ⁴ Të'huatopirinahuë', Cosiriso itapon:

—Ama iyaro'sa tē'huatocosohuë', ya'caritoco', itérin. Naporo huarë' iinpitari ya'caririn. Ya'carihuachinara, itaantarin:

—Ca mini iyaparimaco. ¿Co'ta iráca nicatono'sa Iquipitoquë huëcasoi pa'anamaco?

⁵ Napotéraramacoso marë' ama campitaora nino'huicosohuë'. Co canpitaso yonquipiramahuë', Yosë chachin aquëchitiirinco. Notohuaro' piyapi'sa ananpicaso marë' aquëchitérinco. ⁶ Ipora huarë' iso no'paqué, cato pi'ipi nisarin tanarotopiso'. A'natérápo pi'i chachin, pahuanarin. Ina nápo pi'i sha'topirinahuënta', co manta nitérinso' macaponahuë'. ⁷ Napotéraranquémaso chachin nisarin. Yosëso nípirinhuë', aquëchitiirinco. Canpitanta shiparima ya'huëtiinquémaso marë' naporin. Canpita chachinta', huëhuëpiro ninin quëran nicha'ëinquémaso marë' aquëchitiirinco. ⁸ Inapocaso ni'ton, co campita nohuanton isoporinquë huë'nahuë'. Yosë chachin a'parinco ni'ton, huë'nahuë. Ina nohuanton, huaraon ayonquina'pi nica'huaso marë' ya'conahuë. Ya'ipi ma'shanënpita a'paiato, piyapinënpitanta', camaica'huaso marë' ya'conahuë. Naporahuaton, ya'ipi Iquipitoquë huaraon ya'huérënamën hua'anënta'huaso marë' acorinco.

⁹ Manóton paantatom'a', tata sha'huitonco': "Cosi ya'huëarin, iso pochin nanan a'patiarinquë: Ya'ipi Iquipito no'paqué hua'anënta'huaso marë' Yosë acorinco. Manóton o'maton, ni'quimaco. ¹⁰ Ya'ipi hui'nanpita, shia'huaros'a', inapitarë chachin, o'maco'. Pë'tahuanëmapita, ma'shanëmapita, ya'ipi ya'huëtérinquémaso',

qui qui imaco'. O'mahuatama', Cosin parti acoaranquëma'. Inapohuatama', co aquëya quëranhuë' nini'sáparihua'. ¹¹ Naro'pa huachi carima cosharo quëtáponquëma'. Ya'ipi huë'namaso nápo chachin co manta ichipahuantaranquëmahuë'. A'natérápo pi'ipi pahuanarin tanaro tahuëri'sa na'huëcaso ni'ton, napotápënquëma', itoco'. ¹² Iya'huanta', canpitanta', ya'ipi naporahuëso', nani natanamaco. ¹³ Chiníquën nanantato Iquipitoquë hua'anëntérahuësonta', nani ni'nama'. Ya'ipi ni'namaso' tata sha'huitonco'. ¡Manóton paantatoma tata macontaco!" itérin.

¹⁴ Napotahuaton, iya'huain iporin. Ina iporin quëran na'nérin. Mincaminta', Cosi iporin quëran na'nérin. ¹⁵ Ina quëran Cosiso', ya'ipi iinpita noya nontaton së'quërin. Inapitanta iporahuaton na'nérin. Ina piquëran inapitarinta co huachi té'huatatonahuë', noya nontopi huachi.

¹⁶ Huaraon pëinënquënta', a'naroáchin nanan nincanin: "Cosi iinpita canquipi," itopi. Ina natanahuaton, huaraonso catahuarinsopita hua'ano'sarë chachin noya cancantopi. ¹⁷ Noya cancantaton huaraoniso', Cosi itapon:

—Iyaro'sa sha'huitéquë', pë'tahanenäquë trico a'mitahuatona', Canaan parti pananta'ina'. ¹⁸ Paantatona', pa'pina quëma'ina'. Ya'ipi quëmopinënpitarë chachin, o'ma'ina'. O'mahuachina', Iquipitoquë noya noya no'pa' niniso', cari quëtarahuë. Napoaton inapitaso', iso no'paqué ma'sha noya noyatérinsopita, capona'. ¹⁹ Sa'ina', hui'nina', pa'pina', inapita quëmacaiso marë', camaiquë toronano'sa isëran

quëpa'ina'. Sha'huitëquë a'naroáchin huë'ina'.
20 Naporahuaton, ama aquëtë ma'shanënapita yonqui'inasohue'. Iquipitoquë ma'sha noya noya nininsopita, inapitari hua'anëntapona', itëquë', itërin. **21** Napotohuachina, Cacopo hui'ninpitaso' ina inachachin nipi. Huaraon camaitérinso chachin, Cosiri toronano'sa quëtérin. Naporahuaton cosharo iraquë caracaisonta', quëtérin. **22** O'nanpiracaisonta', ya'ipi iinpita ananitëra'piarin. Mincaminso nimirinhue', cara pasa coriqui prata quëran nininsos' quëtahuaton, a'natérápo a'mocaso quëtérin. **23** Pa'pionta', shonca moraquë, noya noya ma'sha Iquipitoquë ya'huérinso', a'patontarin. Naporahuaton shonca moraquë chachin, trico, pan, cosharo', inapita a'patontarin. O'mahuachina carimacaiso marë' a'patontarin. **24** Pacacaiso marë' nontohuachinara, Cosiso iinpita itapon:

—Osharan paco'. Amana iraquë nino'huíracosohue', itërin. Napotohuachina pa'pi huachi.

25 Inapitaso', Iquipito quëran pipirahuatona', Canaan parti canconpi. Pa'pina ya'huérinquë chachin canconpi huachi. **26** Pa'pina nontatona sha'huitopi: “¡Cosí nanpiárin tata! ¡Inari ya'ipi Iquipito no'pa' hua'anëntérin!” itopi. Ina natanahuaton, Cacoposo pa'yanënquë tachianantérin. Sha'huitopirinahuë', co natëtérinhuë'. **27** Napoaponahuë', Cosiri nanan a'patérinso natanin. Ina natanahuaton, toronano'sa quëpamacaiso marë' a'patontarinsonta', ni'nin. Naporu huarë' capa cancantomiatérin huachi. **28** Capa cancantaton tapon: “¡Téhuëñchachin Cosí

nanpiárin! Co'huara chimiantërasocohuë' pa'mato nimai," ténin.

46

Iquipitoquë pa'mapiso'

¹ Cacoposo' ya'ipi huëntonënë chachin pa'sarin. Ya'ipi ma'shanënpitarë' pa'sarin. Piirsipaqué canconpachinara, ma'sha tëparin. Tëparahuaton, pa'pinco' Yosë chinotérinso chachin chinotérin.

² Naporo tashi Yosëri hua'narëso pochin ya'notérin. Ya'notahuaton, nininën quëran pérarin: "Cacopo" itérin. Napotohuachina, inariso itapon:

—Ma'ta Siniro ya'huarahuë, itérin.

³ —Caso Yosëco. Tataparionta chinotérinco. Iquipitoquë pa'macaso marë' ama të'huaquësöhüë'. Inaquë shiparinpita na'atona', panca nacion ocoiapona'. ⁴ Canta quëmaro'co Iquipitoquë, pa'marahuë. Naporahuaton ca chachin, ina no'pa quëran shiparinpita ocoiarahuë. Inaquë chiminpatan, Cosi nocorinquën, itérin.

⁵ Ina quëran Cacoposo', Piirsipa quëran paantarin. Hui'ninpitari toronanquë a'mitopi. Huaraoni quëpamacaiso marë' toronano'sa a'patontarinquë, inapotopi. Sa'ina', hui'nina', inapitanta a'mitopi. ⁶⁻⁷ Cacoposo', hui'ninpitarë chachin pa'sarin. Hui'ninpitanta sa'ina hui'ninpitarë chachin pa'sapi. Ya'ipi inapitarë chachin pa'sápatona', Iquipito no'paquë huarë' camapi. Ya'ipi ma'shanënapitanta Canaan parti ya'huëtopiso', quiquipi. Pë'tahuanënapitanta', Ohuicaro'sa', ohuacaro'sa', chiporo'sa', inapitanta quiquipi.

⁸ Isopita, Cacopo quëran pipipisopita Iquipitoquë pa'mapi. Inapita chachin israiro'sa itopi anta': Paninantérinso', Nopino. ⁹ Ina hui'ninpitaso': Anoco, Huaron, Isron, Caromi, inapita. ¹⁰ Simion hui'ninpitanta', Quimoino, Camin, Ohuato, Caquin, Sohuaro, Saono, inapita. Saonoso', Canaan sanapiquë hui'nahuaninso'. ¹¹ Nihui hui'ninpitanta', Coirison, Quiato, Mirari, inapita. ¹² Cota hui'ninpitanta', Iri, Onan, Sira, Parisi, Saro, inapita. Iri, Onan, inapitaso', Canaan parti chachin chiminpiso', nani nitotéröhua'. Parisi hui'ninpitanta', Isron, Amoro, inapita. ¹³ Isacaro hui'ninpitanta', Toran, Popan, Copo, Simiron, inapita. ¹⁴ Saporono hui'ninpitanta', Siriti, Iron, Cariri, inapita. ¹⁵ Ina nápo Cacopo hui'ninpita quëmapi'sa Niaquëya ya'huëpi. Sanapinta a'nara ya'huëtérin: Tina itérinso'. Inapitaso', Patan-aranqué ya'huapon hui'nahuaninsopita. Nia quëran pipipisopitaso', cara shonca cara ya'pi', sanapirë chachin icanpi.

¹⁶ Caro hui'ninpitanta', Sipion, Aqui, Ispon, Soni, Iri, Aroti, Ariri, inapita. ¹⁷ Asiri hui'ninpitanta', Imina, Isopa, Isopi, Piria, inapita. Oshinanta ya'huërin: Sira itopi. Piria hui'ninpitanta', Ipiri, Mariquiri, inapita. ¹⁸ Caro, Asiri, inapitanta Cacopo hui'ninpita Siripaquéya nipiso'. Ina quëran nipisopitaso', ya'ipiya quëran shonca saota ya'pi', icanpi. Siripaso' Napanori Nia catahuacaso marë' nicanarinso', nani nitotéröhua'.

¹⁹ Naquiranta Cacopo sa'in chachin ninin. Ina hua'huinpitanta', Cosi, Mincamin, inapita.

²⁰ Cosiso', Asinaquë hui'nahuaninsopita:

Manasisi, Iprain, inapita. Inapitaso', Iquipitoquë nasitopi. Asinanta', ayonquianta'inquëma'. Inaso', Potihuira hui'nin. Potihuiranta', On ninanoquë corto hua'an ya'conin. ²¹ Mincamin hui'ninpitanta', Pira, Piquiri, Asipiri, Quëra, Namano, Iqui, Nosi, Mopimo, Opimo, Arato, inapita. ²² Ina nápo Naquira quëran nipisopita ya'huëpi. Shonca catapini ya'pi ya'ipiya quëran icanpi.

²³ Tanoso', a'naíchin hui'nahuanin: Osimo itérin. ²⁴ Nipitari hui'ninpitanta': Casiiri, Coni, Quisiri, Sirimo, inapita. ²⁵ Tano, Nipitari inapitanta Cacopo hui'ninpita nipi. Inapitaso', Piraquëya nipiso'. Ina quëran nipisopitaso', ya'ipiya quëran canchisë ya'pi', icanpi. Piranta', Napanori Naquira catahuacaso marë' nicanarinso', nani nitotérëhua'. ²⁶⁻²⁷ Iquipitoquë pa'mapisopita, saota shonca saota ya'pi icanpi. Ya'ipi inapitaso', Cacopo quëran pipipisopita. Hui'ninpita sa'inaso' co pichipihuë'. Cosi hui'ninpitaso' cato. Inapitaso' inaquë chachin nasitopi. Cacopo, Cosi, inapitarë' canchisë shonca ya'pi ya'ipiya quëran icanpi.

²⁸ Co'huara Cosin parti camayátërasoihuë', Cacoposo' Cota camairin: "Cosi sha'huitéquë huë'in, Cosin parti nacapi'inco," itérin. Inaquë Cota paaso', Cacoposo ya'ipi huëntonëñ chachin Cosinquë camapi huachi. ²⁹ Iin cantomarahuaton Cotaso', pa'pini nanan a'patérinso sha'huitérin. Sha'huitohuachina Cosiso', a'naroáchin piyapinënpita camairin toronanëñ tapacaiso marë'. Inaquë huënsërahuaton, Cotarë chachin pa'nin. Pa'sahuaton pa'pin quënanconpachina, iporin. Iporinquëranchin hua'qui na'nérarin.

30 Naporō' Cacopori, itapon:

—Ayapiranhuë', quënaantaranquën ni'ton: ¡Iporaso' chiminpatonta noyatapon huachi tēnahuë! tēnin.

31 Pa'pin nani nontahuaton Cosiso', ya'ipi iinpita, quëmopinënpita inapita itapon:

—Huaraon nicapo pa'sarahuë. Pa'sahuato itapo: Ya'ipi quëmopinëhuëpita Canaan parti ya'huépirinahuë', yacapainacoso marë' o'mapi.

32 Ohuacanënapita, ohuicanënapita, ya'ipi ma'shanënapita quiquiimapi. Inapitaso pë'tahuatona'piro'sa', itarahuë. **33-34** Napotohuato, huaraon përasarinquëma'. Përatënquëma' maquësona sacatëramaso' natanpachinquëma': "Quiyaso', shimashonëhuëpita pochachin, ohuica pë'tahuana'piro'saco," itoco'. Napohuatama', Cosin partiquë ya'huapoma'. Iquipitoro'saso', ohuica pë'tahuana'piro'sare', napopináchin ya'huëcaiso', na'in. Napohuatama', canpitaráchin inaquë ya'huapoma', itérin.

47

1 Cosiso', pa'pin, iinpita, inapita nontahuaton huaraon sha'huitapon pa'nin: "Tatahuë, iyahuëpita, inapita Canaan parti quëran o'mapi. Ya'ipi ohuicanënapita, ohuacanënapita, ma'shanënapita, inapitarë chachin o'mapi. Nani Cosin parti niquipi," itérin. **2** Ina piquëran a'natérápo iinpita huayonin. Huayonahuaton, huaraoni nohuitacoso marë' quëparin. **3** Naporō' inari natanin:

—¿Maquëta canpitaso sacatërama'? itérin.

—Quiyaso' quëma piyapinënpita pochinchon
ninai. Shimashonëhuëipita pochachin
ohuica pë'tahuatona'piro'sacoi. ⁴ Canaan parti
ya'huëpiraihuë', na'con tanarotërai. Pastonta',
ohuicaro'sa capacaiso', yanirin. Napoaton
no'panënqué o'marai ya'huapoi. Yosë marë'
nohuantëquë', Cosin parti ya'huë'i topiraihuë',
itopi. ⁵ Napotohuachinara, huaraoniso' Cosi
itapon:

—Yacapainënquënso marë' tataparin, iyaparin-
pita, inapita o'mapi. Nani o'mapi ni'quëhuarë',
⁶ ya'ipi Iquipito no'pa' hua'anëntërahuëqué, noya
inapita ya'huëcaiso'. Cosin parti noya noya no'pa'
ninin. Inaquë ya'huëcaiso marë' quëtëquë'.
A'naquën quëmopinënpita pë'tahuatacasó' noyá
nitotohuachina', caquën pë'tahuanëhuëpita,
a'paicaiso marë' acoquë', itérin.

⁷ Ina piquëran Cosiso', huaraon anohuitacaso
marë' pa'pionta quëparin. Cantontahuaton Caco-
poso', monsho ténin, nontacaso marë'. ⁸ Huaraoni
ni'sahuaton natanin:

—¿Onpo pi'ita ya'huëtérinquën? itérin.

⁹ —Nani pasa cara shonca pi'ipi
ya'huëtérinco. Co ya'huëmia ya'huëatohuë', patë
patérantarahuë. Inapoato na'con parisitërahuë.
Shimashonëhuëpitaso', na'con na'con tahuëri ni'pi.
Co caso inapita icantapohuë' nimara ténahuë,
itérin. ¹⁰ Cacoposo nani huaraon nontahuaton,
Cosirë chachin pa'nin huachi.

¹¹ Ina quëran Cosiso', Iquipitoquë noya noya
no'pa' nininso' quëmopinënpita quëtërin. Huaraoni
camairinso chachin ninin. Inapoatona Cacoposo'
hui'ninpitarë chachin Namisi parti no'pahuanpi.

Namisiso', Cosin itopi anta'. ¹² Naporahuaton Cosiso', ya'ipi quëmopinënpita cosharo quëtárin. Panca huënton nininso' na'con na'con, quëtérin. Caraya nininso', pi'piyan quëtérin. Inapotérin.

Iquipitoquë onpo sacataciso', Cosi camaitérinso'

¹³ Co insëquë téranta trico ya'huërinhuë'. Napoaton na'con na'con tanarotopi huachi. Canaan partiquënta', Iquipitoquënta', piyapiro'sa tanari tiquirarin. ¹⁴ Inaquëpita ya'huëpisopita, Cositaquë trico pa'anápirinahuë', nii'quianapi huachi. Ya'ipi coriqui trico marë' pahuérëtopiso', Cosiso yontonin. Yontonahuaton huaraon pëinënquë taparin.

¹⁵ Canano'sa', iquipitoro'sa', inapita coriquinëna i'quihuachinara, iquipitoro'saso', Cosi nontapona pa'pi:

—¡Yosë marë' cosharo quëtocoi! Capa nii'quianarai huachi. Capa coriqui ni'ton, co huachi cosharo quëtohuatancoihuë', tana tëpaponcoi quiyaso'. Ina marë' quëmanta co huachi noya nisaranhuë', itopi.

¹⁶ —¡Naporinchi paya! Capa coriquinëma ni'quëhuarë', pë'tahuanëmapita nipachin quëco'. Ina quëpatama', trico quëtarainquëma', itérin Cosiri.

¹⁷ Napotohuachina iquipitoro'saso', pë'tahuanëna quëshipi: Cahuarionëna', ohuicanëna', ohuacanëna', moranëna', inapita quëshipi. Inapita marë' naporo pi'iquë trico canpiatérin.

¹⁸ Ina pi'i na'huëanatopi. A'na pi'i maantarinquë naquëranchin iquipitoro'saso', Cosi paapan-tapi nontaantacaiso marë':

—Nani quëma nitotëran capa coriqui ya'huëterincoisohue'. Ya'ipi pë'tahuanëhuëipitanta canpitansonqüen ninin. Co huachi ma'sha tेranta ya'huëterincoihuë' pahuëréta'huaiso'. No'panëhuëichin ya'huërin. Naporahuaton quiyanta ya'huëarai. ¹⁹ Quiyaora chachin nipachin, no'panëhuëirë'coi pa'ancoi. Ina ya'huërenamën trico quëtocoi. Inapohuatoi huaraon piyapinënpitaco nisarai. Ina marë' no'panëhuëiquë chachin sacachi. Cosharo quëtohuatancoi, no'panëhuëiquë sacatarai ni'ton, co nitapiarinhuë'. ¡Taquiuhatoiso', no'panëhuëinta' pantatarin. Inapohuatoi, quëmanta co manta canaponhuë'! itopi.

²⁰ Napotohuachinara, Cosiso ya'ipi iquipitoro'sa no'panëna huaraon marë', pa'antëra'piarin. Co manta capacaisohue ni'ton, no'panëna pa'ana'piapi. Inapopi ni'ton, ya'ipi Iquipito no'pa', huaraoni hua'anëntërin huachi. ²¹ Naporahuaton ya'ipi Iquipito no'paquë iquipitoro'sa ya'huërinso', Cosiri pa'anaton piyapitërin. ²² Corto hua'ano'sa no'panënáchin co Cosiri pa'antërinhuë'. Inapitaso' huaraoni topinan trico quëtárin ni'ton, co no'panëna pa'anacaiso ya'huërinhuë'.

²³ Ina quëran Cosiri piyapi'sa itapon:
—Iporaso', huaraon hua'anëntërininquëma huachi. No'panëmanta hua'anëntërin. Ma'tana ya'pirin ya'huëarin quëpatoma', sha'co'. ²⁴ Napoaponahuë', sha'namaso' nanitohuachin, a'natérápo costaro quëran a'na costarora huaraon quëtamaso ya'huërin. Catapini costaroso niperinhuë', canpitaora marë' nisarin. Hui'namapita, yacaparininquëmasopita, inapitanta

capacaiso marë' nisarin. Naporahuaton ina quëran chachin shacacamaso ya'huërin, itërin.
25 Napotohuachina, inapitaso taantapi:

—Noyapa'. Inapochin nisarai. Quëmaso noya piyapinquën ni'ton, tana tēpainaicoiso nimirinhüë', nicha'érancioi. ¡Huaraon nipachin piyapichincoi! itopi. **26** Inapoaton Cosi camaitërin ya'ipi Iquipito no'paquë piyapinënpita ma'sona nicacaiso'. Sha'topiso nanitohuachina, a'natérápo costaro quëran, a'nara huaraon quëtacaiso ya'huërin. Iso quirica ninshitasoco huarënta', ina camaitërinso', ipora huanta Iquipitoquëso ina chachin nisapi. Corto hua'ano'saso nimirinhüë', co huaraon marë' quëtacaiso ya'huërinhüë'. Inapita no'panënaso', co huaraoni pa'antérinhüë' ni'ton, co quëtopihuë'.

Cacopo nohuantërinso'

27 Israiro'saso', Iquipito no'paquë ya'huëapi huachi. Cosin parti no'pa' mapi. Inaque ya'huëapona pochin na'amiatopi. **28** Cacoposo shonca canchisë pi'ipi, Iquipitoquë ya'huëantarín. Ya'ipiya quëran pasa catapini shonca canchisë pi'i icanin.

29 A'na tahuëri Cacoposo', nani chiminacaso ya'caritërin ninatanin. Napoaton Cosi sha'huitacaso marë' a'nara a'parin. Huë'pachina, itapon:

—Tëhuëñchachin nosorohuatanco, no-huantërahüeso' niqué'. Ina yanipatanso', tonaroana së'huatoco. Së'huatatonco: “Yoscoare' nohuantëranso' nisarahüë,” itoco'. ¡Caso chimimpato, ama Yosë marë' isëqué pa'pitocosohüë!
30 Shimashonëhuëpita quënanconahuaso tahuëri nanitohuachinco, Iquipito no'pa quëran quëpacó.

Quëparahuatonco, inapita po'mopiquë, canta po'moontaco, itérin.

—Noyapa'. Inapochinquën nipachin, itérin Cosiri.

³¹ —Yoscoarë' inapochinquën itoco, itaantarin pa'pini. Napotohuachina, Cosiso': “Yoscoarë' inapotaranquën,” itérin. Ina natanaton, Cacoposo, pë'saranenquë huënsérin. Inaquë huënsérin quëran, “Yosparinquën,” ta'caso marë' móntsho ténin.

48

Iprain, Manasisi inapita noya ya'huëcaiso marë' sha'huitérinso'

¹ Ina piquëran miachin Cacoposo' caniorin. Napohuachina Cosi sha'huitopi. Ina natanahuaton, nicapon pa'nin. Hui'ninpitanta cato chachin quëparin. Manasisi, Iprain, inapita. ² Cosiri nicapon huë'ninso sha'huitohuachinara, chiníquën cancantaton pë'saranenquë huënsérin. ³⁻⁴ Cosiso', hui'ninpitarë chachin ya'coontarahuaton pa'pin nontoonin. Ina quëran Cacoposo' Cosi itapon:

—Yosë ya'ipi nanitaparinso', Noso ninanoquë ya'notérinco. Inaso ninano', Canaan parti ya'huërin. Ya'notahuatonco, iso pochin noya ya'huëca'huaso marë' sha'huitérinco: “Ni'quë”. Ca nohuanto, notohuaro' hui'nanpita ya'huëtarinquën. Quëmá quëran pipipisopita, na'a naciono'sa ocoyapona'. Naporahuaton, inapita, iso no'pa' quëtarahuë. Inapitari hua'anëntomiatapona',” itérinco. ⁵ Hui'nanpita Iprain, Manasisi, inapitaso co'huara yacapaponquën huë'shamátérasocohuë' ya'huëterinquën.

Inapitaso' caquën nicapona'. Napoatona', Yosë no'pa' hua'anënta'huaso sha'huitérincoso', hua'anëntapona'. Nopino, Simion, inapita pochin ni'tona', hua'anëntapona'. ⁶ Inapita piquëran hui'nahuapanatan, quëmaoranquën nisapi huachi. Inapitaso' Iprain, Manasisi, inapita iya'huainpita nicapona'. Ina ni'tona iin mashonëna no'panëna quëran, inapitanta', no'pa' macapona'. ⁷ Co topinan napotaranquënhuë'. Mamaparin co aquëtë hua'huaninso marëhuë', napotaranquën. Quëmanta nani nitotëran: Patan-aran quëran huënantasëhua', Canaan parti quëmaquën mama tëparëhua'. Iporata ninano ya'cariya nicasëhua', chiminin. Chiminpachina, inaquë chachin ira pirayan pa'pitérëhua'. (Ina ninanosö', ipora marë' Pirin itopi anta').

⁸ Ina ta'sochachin a'nanaya Cacoposo' tahuërtahuaton ni'pirinhuë', Cosi hui'ninpita quënanin. Inapita quënanaton, hui'nin natanin:

—¿Inpitata isopitaso'? itërin.

⁹ —Isopita mini hui'nahuëpita. Yosë nohuanton naro'pa' ya'huëtérincoso', itërin Cosiri.

—Amashachin aya'carico. Noya ya'huëcaiso marë' sha'huichi, itaantarín Cacopori.

¹⁰ Cacoposo' noyá mashoya ni'ton, co huachi ina inahuë quënantërin. Napoaton Cosiri hui'ninpita aya'caririn. Napohuachinara, Cacoposo shinpita iporahuaton apinorin. ¹¹ Ina quëran Cosi itapon:

—Co huachi onporo têranta quënnana'huanquënsö' yonquipirahuë', Yosë nohuanton hui'nanpitanta quënanahuë. ¹² Pa'pin to'topitënqué hui'ninpita huënsëápirinahuë', Cosiri ahuanirin. Ahuanirahuaton, pa'pin notënanquë isonin. Isonin quëran

no'paquë huarë' monshorin. Noya nicaton napotérin.

¹³ Ina quëran cato hui'ninpita chachin manin. Iprainso', inchinanën quëran së'quérin. Ya'huërë' Manasisiso' ahuënanën quëran së'quérin. Inapo së'quérin quëran pa'pin aya'caririn. Napoaton Iprainso', shiin ahuënanën quëran acorin. Ya'huërë' Manansiso', shiin inchinanën quëran acorin. ¹⁴ Cacoposo nimirinhuë', tanpaquënpita chi'huaratahuaton, inchinanën quëran Iprain së'huamotorin. Manasisiso paninan nimirinhuë', ahuënanën quëran së'huamotorin. ¹⁵⁻¹⁶ Inaporahuaton Cosi noya ya'huëcaso marë' iso pochin sha'huitérin:

"Shimashonëhuëpita Apraan, Isaco, inapita Yosë natëpi.

Canta hua'huatérahuë quëran huarë' ina chachin noya a'pairinco.

Ina Anquëninën* chachin ya'ipi ma'sha onporahuë quëran, nicha'érinco.

Inari chachin isopita hui'napi'sa catahuain.

Notohuaro' hui'ninpita ya'huëchina'.

Hua'huayátérahuë, isoro'paquë na'aina'.

Inapita nicatona piyapi'sa', yonqui'inaco.

Tata Isaco, tata masho Apraan, inapitanta yonqui'ina'," itérin.

¹⁷ Cosiso nimirinhuë', paninantérinso' ahuënan quëran shiini së'huamotorinso' ni'nin. Ina nicaton co noyahue' cancantérin. Napoaton pa'pin inchinan imirin masahuaton, Iprain motën quëran chi'huincatérin. Chi'huincatahuaton Manasisi

* **48:15-16** Yosë Anquëninën topachinaso': Yosë chachin ta'tona napopi.

motënqué acotërin. ¹⁸ Inapoapon pochin pa'pin itapon:

—Co tata. ¡Ama inapoquësohuë! Isocha paninanso'. Inchinan imira quëran, ina së'huamotoquë', itërin. ¹⁹ Pa'pinso nimirinhue', co nohuantërinhue' inapocaso'. Napoaton itapon:

—¡Naporin mini conpa, nani nitotërahuë! Manasisinta shinpita quëran panca nacion nisarin. Iyaa'huainso napoaponahuë', noya noya nicaton shinpita quëran na'con na'con naciono'sa pipiarin. ²⁰ Naporor tahuëri chachin, Cacopori shinpita nóya yonquirapiton iso pochin sha'huitërin:

—Israiro nacionquë ya'huëpisopita noya ya'huëcaiso marë' yasha'huitohuachina', canpita nininëma yonquiatona iso pochin sha'huitapona': “Yosë quëmanta catahuainquëen. Iprain, Manasisi, inapita catahuarinso pochachin catahuainquëen,” niitapona', itërin. Inapoaton, Cacoposo Iprain'ton acorin. Manasisiso nimirinhue', piquëran acorin.

²¹ Ina quëran Cosi tahuërëtahuaton itapon:

—Ni'quë'. Caso chiminapo huachi. Yosëso nimirinhue', ya'huëmiataton catahuarinquëma'. Inari chachin shimashonëma no'panënquë quëpanantaponquëma'. ²² Quëmaso' ya'ipi iyaparinpita quëran, panca pancana no'pa' quëtëranquëen. Siquimo motopi quëtëranquëen. Inaso' no'pa', amororo'sa ahuëato osërëtërahuëso', itërin.

49

Cacopo yachiminaton, hui'ninpita nontërinso'

- ¹ Nani shinpita noya ya'huëcaiso marë' sha'huitohuachina, Cacoposo' ya'ipi hui'ninpita amatérin. Huë'pachinara itapon:
“Amasha ya'carico comparo'sa'.
Ma'sona a'na tahuëri onpocamaso', carinquëma sha'huichinquëma natanco'.
- ² Canpitaso hui'nahuepitanquëma'.
Caso Cacopoco naporahuë', Israiro itérinaco anta'.
Carima sha'huitaranquëma ni'ton, natanco'.
- ³ 'Quëmaso' Nopino, paninanquën.
Chiníquën nisoco, ya'nan hui'nahuananquënso'.
Chini chiníquën nanantaton, noya noya nicamaso'
ninan.
- ⁴ Inapocamaso nipuranhüe', co huachi inapoaran-
huë'.
I' pa'pi chinii' nipachina, co onpo asanoiréhuë'.
Ina pochachin nicaton cosonanëhuë monshitérin,'
itérin.
- ⁵ 'Simion, Nihui, canpitaso, napopináchin can-
cantërama'.
A'napita ma'sha onpotamaso marë' nisha nisha
ohuararama'.
- ⁶ Niyontonamaquë', ama onporo téranta
ya'noisohuë'.
No'huitatoma piyapi téparama'.
Co natantonquëmahuë' nicatoma', tororo'sa
nishitetëntëntërama'.
- ⁷ Tanan ni'niro'sa pochin no'huitërama'.
Napopiramahuë', co onporonta inachachin
nisápomahuë'.
Carima ya'ipi Israiro nacionquë, ayan-
quëmiataranquëma', itérin.
- ⁸ 'Quëmaso' Cota, iyaparinpita pa'yataponën.
Inimiconënpita minsëra'piapon.

Iyaparinpita quëran huarë' moshaponën.

⁹ Quëmaso' conpa masho, Cota itëranquën.

Pa'pinia'huá pochin chinimiatérán.

Mapintahuaton pa'pini' pë'inihuachina,

mónsho móñsho térarinquëran quëhuënin huachi.

Panca pa'pini' pochin ninan.

¡Pa'pini' chinotaso', co incari téranta apesarinhue'!

Inapochachin quëmanta inimiconënpita nitaponën.

¹⁰ Co inso téranta hua'an quëran, quëmaso' Cota, ocoiarinënhue'.

Huara së'quéranso co insonta mataponënhue'.

Hua'anën chachin o'maquë huarë' co nanitapanponënhue'.

Ina o'mahuachin, ya'ipi naciono'sari natëpona huachi.

¹¹ Cotaso notohuaro' oparohuanaton, mora'huanënta', co apiratarinhue'.

Inaquë capacaso marë' a'sonpitérapon.

Huinoquë chachin a'morinso pë'sapon.

¡Opa huayo no'huiquëñquë chachin, inapotapon!

¹² Ya'pirinpitanta', huino quëran quëhua quëhuashin ninin.

Natëquënpitanta', sho'shoi' quëran huiri huiríchin ninin,' itërin.

¹³ 'Quëmaso' Saporono, marë yonsan parti ya'huapon.

Panca nancharo'sa nonshinanëna ya'huërinquë, ya'huëapon.

No'panënsö', Sitonquë huarë' naniarin,' itërin.

¹⁴ 'Quëmaso' Isacaro, chiníquën mora pochin nisaran.

Pë'tahua pëiro'saquë pë'pëtëranquéranchin chino-taràn.

15 “;Noyachi iso no'pa' paya! Yashi yashin chinochachináchin,” tēcapon.

Co pahuérëpirinénhuë', noya cancantaton patron marë' sacataran,' itérin.

16 ‘Quëmaso Tano, quëmaora huëntonénquë ya'huëpisopita catahuaran.

Nanan ya'huëtohuachina', anoyatacaiso catahuaran.

A'napita Israiro huëntono'sa pochachin nisaran.

17 Ya'huan yaquëtëtérinso pochin nisaran.

Inaso', ira pirayan yamorin quëtëtacaso marë'.

Cahuario tocanën quëtëhuachina, piyapi ya'mitérinso', anotapon.

Inapochachin quëmanta', inimicoro'sa nitaran,' itérin Cacopori hui'ninpita nontaton.

18 Ina quëran Cacoposo' Yosë nontaton tapon:

“;Sinioro, quëmaso' nicha'ësaranco tënahuë!” itérin.

19 A'napita hui'ninpitanta yonquiaton taantarín: “ ‘Quëmaso Caro, matararoro'sa huënton ya'contarinquën.

Quëmariso napoaponahuë', nita'atahuaton imasaran,' itérin.

20 ‘Quëmaso' Asiri, noya noya cosharo ya'huëtarinquën capacaso'.

Copirnoro'sa ca'ninsø pochin ca'sápon.

Napoaton quëmari quëtohuatan inapitanta ca'sapi,' itérin.

21 ‘Quëmaso' Nipitari, co camainénquënso costaponhuë'.

Tanan yo, noyanpia'huaráchin hua'huinpitarë' pa'ninsø pochin nisaran.

Inapochachin quëmá quëran pipipisopitanta',
na'a nisahuatona', noyanpia'huaráchin nicapona',
itérin.

²² Quëmaso Cosi, i'sha yonsanquë huayo
huanirinso pochin ninan.

Inaso' huayo pa'pi notohuaro' nitérin.
Së'paquënpitanta', paira pa'térin.

²³ Pë'chinan camayoro'sa', no'huirinquën.

No'huiténën pë'chinan shinérëquë yaohuaninën.
Napotaténën, co noya quëran ya'huëchináchinhue
nitarinën.

²⁴ Quëmaso nipurinhue', chini chiníquën
tanpatëran.

Pë'chinanënquë inimicoro'sa të'yanantohuatan, co
pacoitaranhuë'.

Yosë imarahuëso', chini chiníquën nanantérin.

¡Ina catahuarinquën inimicoro'sa minséaran!

Sinioroso' ohuica hua'anën pochin ni'ton,
a'pairinco.

¡Ina chachin quëmanta a'paiatënquën catahuarin-
quën!

²⁵ Yosënëhuë chachin, catahuapënquën.

Inaso', ya'ipi nanitapaton catahuapënquën.

Ina nohuanton, o'nanpachina catahuainquën.

Acoporonta i' ya'huérinso', ina nohuanton pipiton
catahuainquën.

Pë'tahuanëmapita, sanapinëmapita, inapitanta huai-
huachina catahuain.

²⁶ Tata mashocoro'sa iráca, noya ya'huëca'huaso
marë' sha'huitérinaco.

Carinquënso', ipora noya noya sha'huitaranguën.

Motopiro'sa ya'huérarinso ta'huantaquë huarë',
Yosë catahuaráponquën.

A'napita iyanpita quëran, noya noya nicatënquën huayonanquën.

Napoaton së'huamotorahuatënquën quëma marë' Yosë nontérahuë, itérin.

²⁷ 'Quëmaso' Mincamin, pa'pi mapinton tanan ni'nira pochin nicapon.

Tashiramiachin inaso mapintahuaton, ca'miatérin.

Naporor i'huanahuanquë chachin pë'sotérinsonta', a'napitari ca'papi.

Inapochachin quëmanta', yaata'huantéransopita nitaran.

Inapotahuaton ma'shanënanta', nipatomat-apoma', " itérin.

²⁸ Ina pochin Cacopo shonca cato hui'ninpita noya ya'huëcaiso marë' sha'huitérin. Inapita quëran shonca cato Israiro huëntono'sa pipipi.

Cacopo chimininso'

²⁹ A'na tahuëri Cacoposo', hui'nipita camairin: "Co hua'quiya quëranahuë' chiminarahuë huachi. Chiminpato, shimashonëhuëpita pa'pitopiso pirayan po'moontaco. Iti huënton piyapi, Ipron itopisori, ina no'paso' hua'anëntopirinhüe".

³⁰ Maquipiraquë nanin ya'huërinso yonquiazo napotarahuë. Inaso', Canaan parti ya'huërin. Mamiri notënanquë ya'huërin. Ina no'pa' mini iráca tata mashoco Apraan nipa'pitacaiso marë' pa'anin. Ina pirayan no'pa' ya'huërinsorë chachin naporor Ipron pa'antérin. ³¹ Inaquë

Sara, Apraan, inapita chiminpachinara ya'conpi. Tata Isaco, mama Nipica inapitanta inaquë chachin ya'conpi. Inaquë canta', sa'ahuë Nia itérahuëso ya'conin. ³² Ina no'paso' naninë

chachin, Iti huënton piyapi'sa pa'antopi," itérin. ³³ Cacoposo' hui'ninpita camairinso tonitohuachina, pë'saranenqué quëhuëntarin. Quëhuënaso chachin, chiminin huachi.

50

¹ Pa'pin chiminpachina Cosiso', ina nonën iporin quëran na'nérin, apinorin, napotérin. ² Ina quëran notoronénpita camairin pa'pinco' nonën tapacaiso'. Camaihuachina, ama chanatacaso marëhuë' taparapi. Pa'pincoso', Cacopo itahuatona', Israiro itopi anta'. ³ Catapini shonca tahuëri quëran nonën tapapi huachi. Ina nápo tahuëri nohuantérin tapacaso marë' ni'ton, ina nápo tahuëri sacatopi.

Iquipitoro'saso', canchisë shonca tahuëri Cacopo marë' sëtopiso' imapi. ⁴⁻⁵ Ina tahuëri'sa na'huëhuachina, Cosiso' huaraon catahuapisopita hua'ano'sa', nontérin:

—Tëhuëñchachin noya ni'patamaco, ca marë' huaraon nontoonco'. Naporin Cosi: "Co'huara tata chiminyátéraponhuë', camairinco Yoscoarë' ta'to natëca'huaso': 'Nipa'pita'huaiso marë' taparahuëqué chachin, po'moontaco. Inaso', Canaan parti ya'huërin,' itérinco. Quëtoco paato tatihuë pa'pitonta'i, topirahuë. Nani pa'pitontahuato, o'mantarahuë tënин," itoco', itérin. ⁶ Sha'huitohuachinara, huaraoniso hua'ano'sa itapon:

—Cosí sha'huitonco': "Paaton tataco', pa'pitontaqué'. Sha'huitérinquenzo chachin nitontaqué'," itoco', itérin.

7-8 Huaraoñi napotohuachina, Cosiso', pa'pin pa'pitacaso marë' pa'nin. Ya'ipi copirno catahuapisopita hua'ano'sa pa'pi. Iinpitanta', quëmopinënpitarë chachin pa'pi. Cosin partiso', hua'huar'o'saráchin pë'tahuar'o'sa a'paicaiso marë' patopi. **9** Sontaro'santa', a'naquën toronano'saquë, a'naquënso cahuarioro'saquë, Cosi ca'tanpi. Napoaton hua'huayáterahue piyapi'sa pa'pi.

10 Pa'sápatona', Corin-a-atatiquë canconpi. Inaquë niyontonatona panca sëtopi. Inaquë Cosi pa'pin marë' canchisë tahuëri sëtérinso', nani-antarín. (Corin-a-atatiso', trico to'norapiquë) Ina no'pa quërango', Cortanii' pi'i ya'coninso parti acorin. **11** Canano'sa inaquë ya'huëpisopitari, napopiso ni'pi. Ina ni'sahuatona', inahua capini ninontopi: "Iquipitoro'sa pa'piapona huëcatona', panca sëtapi," topi. Napoaton ina no'paso', anini-huanpi: Apiri-misraimo, itopi. Iquipitoro'sa sëtopiquë, tapon naporin. Ina no'pa quërango', Cortanii' pi'i ya'coninso parti acorin.

12-13 Cacopo hui'ninpitaso', pa'pin nanpipon camaitérinso chachin ya'ipi nipi. Canaanquë quëpantarahuatona', Maquipiraquë nanin ya'huërinquë po'moontapi. Iti piyapi, Ipron itopisori, ina no'paso' hua'anëntopirinhü', Apraani iráca nipa'pitacaiso marë' pa'antérin. Ina naninso no'parë chachin, Mamiri ya'huërin quëran, pi'i pipirinso parti quëparitérin. **14** Nani pa'pin po'oroquë po'mohuachinara, Cosiso' iinpitarë chachin Iquipitoquë pa'mantapi. Ya'ipi ca'taninsopitanta', pa'mantapi.

Cosi iinpita napopiso'

¹⁵ Cacopo chiminpachina Cosi iinpitaso', ina tē'huatatona inahua capini ninontopi: "Iráca aparisisitérēhuaso marë' tapona Cosi no'huitonpoa yai'huérëtápironpoahuë'," niitopi. ¹⁶⁻¹⁷ Ina yonquiatona', iso pochin nontacaiso marë' a'napita a'papi: "Co'huara tata chimiyantéraponhuë', camairincoi nonta'huainquënso': 'Iyaparinpita aparisisitopirinënquënhuë', co noyahue' nicatona oshahuapiso', Yosë marë' nariantéquë', itoco', itérincoi. Napoaton, quiyarionta nontarainquën nanan anoyataancoiso marë'. Quiyanta', tatapoa chinotérinso Yosë chachin imarai ni'ton, inapotocoi," itopi. Napo nontasoi', Cosiso na'nérarin.

¹⁸ Naporo chachin iinpitanta', canquipi. Canquiuhachinara, isonpi quëran no'paqué huaré' monshorahuatona', moshaipi. Mosharahuatona', itopi:

—Ma'tana iya, ya'huarai. Hua'anëntatoncoi yacamaihuatancoi, inapotocoi, itopi.

¹⁹ Napotopirinahuë', Cosiriso itapon:

—Ama iyaro'sa pa'yancosohue'. Caso piyapico ni'to, co nanitérahuë' Yosë ya'huérënamën pochin nica'huaso'. ²⁰ Canpitaso mini, ma'sha onpotamacoso yonquipiramahuë', Yosëso nimirinhue', inaporamaso anoyatérin. Ama notohuaro' piyapi'sa taquicaiso marëhuë', inaporin. ²¹ Napoaton ama pa'yancosohue'. Carinquëma cosharo quëtáponquëma'. Hui'namapitanta quëtapo. Naponontaton, Cosiso iinpita asanocancanin. Noyasha nontérin.

Cosi chimininso'

²² Cosiso iinpitarë chachin, Iquipitoquë ya'huëhuantopi huachi. Inaso', pasa shonca pi'i icanin. ²³ Hua'qui ya'huaton, Iprain hui'ninpita ni'nin. Inahuanta hui'nahuanpiso shi'ahuainpitaquë huarë', ni'nin. Naporahuaton Manasisi shiin Maquiri itopiso hui'ninpitanta', macaton aso'sorin. Ina marë' to'topitënquë ahuënsëra'piarin.

²⁴ A'na tahuëri Cosiso', iinpita itapon: "Co hua'quiya quëranhuë', chiminapo huachi. Napoaponahuë', Yosëso catahuainquëmaso marë' o'mararin. Iso no'pa quëran ocoiarinquëma'. Apraan, Isaco, Cacopo, inapita quëtacaso marë' sha'huitérinso no'paquë, quëpantarinquëma'," itérin. ²⁵ Ina quëran iinpita camairin: "Yoscoarë' ta'toma', nohuantérahuëso nitoco," itérin. Napotohuachina: "Yoscoarë' nohuantéranso', nisarai," itopi. Naporo' Cosiri itapon: "Tëhuëñchachin Yosë o'mararin catahuainquëmaso marë'. Ina tahuëri nanihuachin, nansënëhuë isëquëran quëpanantamaso ya'huérin," itérin. ²⁶ Pasa shonca pi'ipitaso', Cosi Iquipitoquë chiminin. Chiminpachina, nonën ama chanatacaso marëhuë taparahuatona', a'na atahuaroquë po'mopi. Ina pochin Cacopo hui'ninpita nipi.

Yosë nanamë_n

New Testament in Chayahuita (PE:cbt:Chayahuita)

copyright © 2011 Wycliffe Bible Translators, Inc.

Language: Chayahuita

Translation by: Wycliffe Bible Translators, Inc.

Chayahuita

cbt

Peru

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chayahuita

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

2b907844-bec1-5cc7-a0e4-401d867c40e7